

IRA MATEO ISANGUENATOCOQUERI JESOQUIRISITO, ATI ICANTA IRIRO CARA YOGABISAICOONTI

**Isanguenaquero iripajiro
imatsiguengajegui Jesus.**

(Ir. 3.23-38)

1 ¹Yamai nasanguenataiguëmiro iripajiropague icharineegui jirai Jesoquisito. Irirori imatsiguenga David aisati Abaram.

²Aro jirai itimi Abaram. Ainta itomi ira jítacha Isac. Aisati Isac itomintacari Jacob. Jacob itomintaigari ira Jorá aisati ireintiegui. ³Jorá ijinantacaro Tamar. Itomintacari Baris aisati Tsara. Baris, iriro iriri Esiromo. Esiromo iriri Aram. ⁴Aram itomintacari ira Aminarab. Aminarab iriri Nasón. Nasón iriri Saramón. ⁵Saramón itomintaari ira Bos. Iniro Bos ojita Rajab. Itomi Bos ijita Oberi. Iniro Oberi jítacha Irot. Oberi iriri Isaí. ^{6,17}Itomi Isaí jítacha David, ira itingomi jorójegui. Cara Abaranquë irooti David ainta icarati 14 sërari. Yaguimintacari Orías David, itomintaari Saromón. ⁷Saromón iriri Roboam. Itomi Roboam, Abías. Itomi Abías, Asa. ⁸Asa itomintaari ira Josabá. Itomi Josabá irianti Joram. Itomi Joram, Osías. ⁹Osías iriri Joatam. Itomi Joatam jítacha Acás. Acás iriri Esequías. ¹⁰Ira itomi Esequías, Manasés. Itomi Manasés: Amón. Amón iriri Josías. ^{11,17}Josías itomintaari ira Jeconías aisati

ireintiegui. Aro cara Daviriquë irooti Jeconías, ainta 14 sërari. Cara itimi Jeconías, ipocaiguë tojai sororo paniaigacha Babironiaquë, yágaiganaqueri omagaro jorójegui canta Babironiaquë.

¹²Aique iconijapë Saratieri itomi Jeconías. Itomi Saratieri irianti Sorobabé. ¹³Sorobabé iriri Abió. Itomi Abió: Eriaquim. Eriaquim iriri Asoro. ¹⁴Asoro itomintaari Saroco. Itomi Saroco, Aquim. Aquim iriri Erió. ¹⁵Itomi Erió: Eriasari. Eriasari iriri Matán. Itomi Matán irianti Jacob, ¹⁶ira tomincari José ojimetsari María. María iniro Jesus Ira aisati jítacha Quirisito Agabisaicoontatsiri. ¹⁷Ainta 14 sërari cara yágaiganaqueri jorójegui canta Babironiaquë irooti cara iboguë Quirisito.

Cara iboguë Jesoquisito.

(Ir. 2.1-7)

¹⁸Yamai nongomantëmi ati ocanta jirai cara inë Jesoquisito. Ainta José aisati iinatsari ojita María. Aroque iquengaigaca irágbaguima, carari teraiquerai iraneiro. Iroro cantënguicha poguë María, itasongancaro Isëre Tosorintsi. ¹⁹Cara igóquero José cara poguë María iquengasëretaca: “Te onganinate ca poguë. Ainiro oniaguetiri sërari. Quero náguero. Nojocajironi

comanoroni. Quero nocomantiri omatsiguenga. Paniro nanganquero: ‘Nojocajimini yamai’”. Irianti caninari José, icoque ingábintsero María, te iraninte iraguipasinguero. ²⁰Irootita iquianca José irojoqui, irigueto yoniagapari ironomire Tosorintsi cara iquisaniqueri. Icantasingapëri:

—José, obiro imatsiguenga jirai David, quero pitsorogui cara páguëro María tenta iriro ogaguirone sërari pijinatsari. Ira ojaniquite itasongancaro Isëre Tosorintsi. ²¹Ontsomaaquenica poro Otomi, pijitiri Jesus Irironta agabisaicoquerine imatsiguenga, irojocajineri ora icantagueti te onganinate.

²²Antagaisati ocanca nega arota omoncaratima ora icanque Tosorintsi jirai cara isanguenatacaqueri comantantatsiri jitacha Isaías:

²³Ainta omënibaque tsinane te oneiri sërari, ontsomaquero Otomi Ira jitënguichane Emanoel.

Emanoel ocanti irinibarequë jorío: itsibatacái Tosorintsi.

²⁴Aro icabirica José iquemisanquero ora icomantasiringaqueri ironomire Atingomi. Iátasiquero María, icanquero:

—Aro caraquenta nágasantëmi nobangoquë.

²⁵Carari terai iraneiro irooti cara ontsomaqueri Otomi. Cara aroque iboguë ijiqueri Jesus. Aique yágasantëro ijinantacaro.

Ipoçaiguë ogótasantiri jonogasaki iraniaquerini Jesus.

2 ¹Aro iboguë Jesus canta poeboroquë jitacha Berén cara quibatsiquë jitacha Jorea. Igáantë Eroris itingomi cara Jerosarénquë cara yaretaiga sërari ogótasantiri jonogasaki. Ipaniaca jaanta cara iconteti paba.

²Yosamitaigapëri Jerosaresati:

—¿Nega ini yamai ira Itingomi joríojegui? Cara nopaniaca naniaigabaqueri ionogasatite, aro nigóiguë, irirai iboguënguetsi. Yamai nipocasitaiguëri nomanocotaiguëri.

³Cara iquemocotobëri itingomi jitacha Eroris, iquenganeintasantanaca aisati itsoroganë. Itsorogaiganaque aisati omagaro Jerosaresati. ⁴Aique Eroris yapatotaiguëri antagaisati saserirotipague obatatsiri aisati omagaro iraequi ogomeantiro isanguenare Moisés. Aro yosamitaigabaqueri

—¿Nega iriboguë ira jitënguichane Quirisito?

⁵Yotabitaiguëri:

—Cara poeboroquë jitacha Berén yaca quibatsica ojita Jorea. Jirai isanguenato-coqueri ira comantantatsiri jitacha Miqueas:

⁶Aiti Berén cara Joreaquë. Quero itsoinguiro Berén otiomijani poeboro: querootisati ijitiro carantatsiro aronta Berénquë iriboguë Irirosonor, Itingomi omagaro jorío.

⁷Aique comanoroni Eroris icaimagantaiguëri cogatsi iraneiri Jesus. Yosamitaiguëri:

—¿Ati ocanta cara iconijatompëmi jonogasaki cara pinaigabaqueri ora pigóontacari cara iboguë Itingomi? Pingomantasantina.

⁸Aro icomantaiguëri. Aique Eroris igáqueri aisati:

—Atsi pijáigue yamai. Pingogaigueri Ira Janequi. Pinetsaigueri atiraca itimi aisati atiraca icanta. Aique popigaima yaca, pingomantaigapëna naro. Nocoguini naneiri naro aisati, nantingomimpëmari.

⁹Aique iáiguë, iniaigairi jonogasaki ibaqueri irooti cara yaratingopë jonoica pongotsi cara ini Janequi. ¹⁰Cara iniaiguëri jonogasaki icaninatasantaiga-

naque. ¹¹Icanaque pongotsiquë, iniaigapëri Ira Janequi aisati María iniro. Aro yobaticagueritotasipari, yamanocotaiguëri, ijitaiguëri Itingomisonori. Aique itatarecoquero itsibogotequë ipasitaigacari maba ora pënatacha tojai: oro, aisati pite casangajengaro. ¹²Aique isamaiguë ira maba matsiguenga. Iquisanitaiguë. Aro Tosorintsi icamanaasiringaqueri, icanqueri:

—Quero pipiganaja Eroriquë. Popiganajima piguebatsitequë cara basiniatiquë abatsi.

Aro iquenantaigaaro basiniati abatsi irooti cara ipaniaca.

Isiganaca José Ejípitoquë, yáganëri Jesus aisati María.

¹³Aroqueque iátaigai ira ogótasantiri jonogasati aique iquisanique José. Aisati iconijatomopëri ironomire Atingomi irisaanganetsite, icomantasiringapëri icampëri:

—José, pingabiritima, páganëri Ira Janequi aisati iniro; pisiganëma cara Ejípitoquë. Pintime irooti cara nongomantaimi, cara popigaima, icoguirininta Eroris Ira Janequi iróguiri.

¹⁴Aro irooti tsitiniriquë iáiguë. Yáganëri Janequi aisati iniro canta Ejípitoquë. ¹⁵Canta, itimaigapë irooti cara icamaque Eroris. Aique ipigaigapaa iguebatsitequë. Icanque irooti ora isanguenatoqueri jirai ira comantantatsiri jitacha Oseas. Atingomi isanguenatacaqueri:

Icanque Tosorintsi: “Itimabeta Notomi canta Ejípitoquë. Nacaimairi iripigapaima aisati”.

Ira Eroris yógaganëri janequipague cara Berénquë.

¹⁶Cara te iripigaima ira ogótasantiri jonogasati, aro igótanë Eroris cara te

inguemisantiri. Aro iguisasanotanaca Eroris, igátaiguëri isorarote, icanqueri:

—Pijáigue cara Berénquë, pógaiguëri antagaisati janequi sërari. Póguiri ira irirai ibogatsi aisati ira agabisatsi pite osarini. Popoguiriaiguëri omagaro.

Icanque negaca Eroris aroquenta icomantasantapëri ira ogótasantiri jonogasati, ati ocanta iniaiguëri jonogasati. ¹⁷Jirai isanguenatoquero oca comantantatsiri jitacha Jeremías.

¹⁸Oquemocoquengani tsinane ocaimëgotasantëri otomijegui tojai piraicoqueri. Iroronta cantaca Iraquel, piraicotaiguëri ojaniquite cara Iramáquë jirai. Te onganinasëretanae yógaiguërinta otomijegui.

Ipiganaja José Nasarequë, yáganëri Jesus aisati iniro.

¹⁹Icamaque Eroris. Aro iquisaniqueri José. Iconijatomopëri ironomire Atingomi irisaanganetsite cara Ejípitoquë. ²⁰Icantasiringapëri: —José, atsi yamai pijátaje popiganajima piguebatsitequë. Páganëri Ira Janequi aisati iniro aroquenta icamaque ira cogabitacha iróguirime Janequi.

²¹Aro yáganairi Ira Jesus aisati iniro, iáque cara iguebatsitequë imatsiguenga. ²²Cara yaretaja José iquemocopëri Ariqueroo itingomi Joreasati. Ariqueroo itomi Eroris ógueri. Aro itsorogopëri. Aisati Tosorintsi icamanaasiringaqueri: —Pigamemari Ariqueroo.

Aro yogaganaca José canta Garireaquë. ²³Cara yaretaja, itimopë poeoroquë jitacha Nasaret. Aro omoncaraca ora icanque comantantatsiripague jirai: Quirisito Nasaresati.

**Joan baotisantantsiri icomantagueanti
cara tera ontimingani.**

(Mr. 1.1-8; Ir. 3.1-18; Jn. 1.19-28)

3 ¹Aro aique íaque Joan baotisantantsiri cara tera ontimingani cara Joreaquë. Icomantaguetaigapëri imatsiguenga ²icantopiantë:

—Pingantaigaima yacaqueroca, pijocajiro ora picantagueti te onganinate, pomasiniaitajate, quero picantaja pibega jirai. Pabentimari Tosorintsi pënibaquenta orequima cara intingomibintaiguëmi Tosorintsi.

³Jirai ira Joan isanguenatocoqueri comantantatsiri jitacha Isafás. Icanque Isafás:

Ainta ira cajemaquenguitsine cara te ontimingani; inganque: “Coraguetaque Atingomi; págacananatobëri; pinguemisantsantobëri, piganinatiro paneingomento pibega cara pobeticoboguitineri irabo itingomi pigatingineri”.

⁴Ora iguitsagare Joan irianti cameyopiti, imatsaguitari imasitsa. Irianti yaagui ira tsiguëriquipague. Aisati itsimiri pitsia. ⁵Ipocasitaigapëri tojai Jerosaresati iquemisantaiguëri, aisati omagaro Joreasati, antagaisati ira timaigatsi aronisati nijaaquë jitacha Jorirán. ⁶Ainta tojai icampëri:

—Aiti nacantaguetiro ora te onganinate. Nocoguini ingábintsena Tosorintsi iragabisaicotajina.

Aique ibaotisatiguëri Joan Joriránquë.

⁷Aisati íatasitaigabitacari tojai bariseo aisati arosonori saroseo icogabetaigaca imaotisatiguemame, carari iguisatsataigabaqueri Joan icabëri:

—Te pinganinataigue, obirojegui aisa picantaigacari marangue. ¿Pairi comantaiguëmi pisigopitanëmaro cara

iratsipiriacagaiguëmi Tosorintsi cantaquibi maranguepague cara isigopitaigacaro pamari? ¿Pijitasitaiguemame cara quero itsipiriacaguimiro?

⁸Pinintica nomaotisatiguëmi, aro caninataque pintimaigue caninasati arota nogótimi pijocasantëroca ora picantagueti te ongomeite pinguemisan-tasantiri Tosorintsi. ⁹Quero picantaigui: “Naroequi imatsiguenga Abaram. Iroro inicaninataguëtaiguëna Tosorintsi; quero iguisina”. Pamatobica obiati. Ingoqueca Tosorintsi, imiaguetiro ocaegui mopë imatsiguenga Abaram carari quero pogabisaicotiri iriro, quero íati Jonocaguetequë irironta jorío imatsiguenga Abaram. Querootisati pabisaicoti obironta imatsiguenga Abaram. ¹⁰Carari pënibaque inguisaiguëmi Tosorintsi. Picantaigacaro pibega anchato te ine oguitso; iritotëro casintaro, irojoquero tsitsiquë. Aisa picanta obiro te pinguemisantiri Tosorintsi, te pingantineri, irojocaguëmi Sharincabeniquë. ¹¹Aroca nogóque ijocajiro matsiguenga ora icantagueti te onganinate, nobaotisatëri nijaaquë. Carari pënibaquenta iribocapë basini sërari, teni aisa ingantina nibega naro. Ibaquina Irironta Natingomisonori, nitsoingaa naronta cantaca iromeraro Iriró. Naro baotisatiguëmi nijaaquë, carari pinguemisanguerica Iriró ogaiguëmirone Caninaro Isère Tosorintsi inasërequimi. Aisati ingasitgatëri Sharincabeniquë ira tsoengatsi te inguemisantiri. ¹²Aroca omposaguiquero antianquero arosa, aique opoteguiquero. Ataquero omasiqui, iroonti oguitso águë oguëro cara ogantaroriquë. Aisati ingantima Atingomi iraniantimari antagaisati matsiguenga. Ingábintsanguëri ira quemisantaiguërine, irianti cantaguetiro te onganinate irojoquero tsitsiquë cara te otsibague.

Cara ibaotisataca Jesus.*(Mr. 1.9-11; Ir. 3.21-22; Jn. 1.31-34)*

¹³Aique iáque Jesus Joriránquë, ipaniaca Garireaquë. Iátasiqueri Joan cara imaothisatobëri. ¹⁴Te iraninte Joan imaothisatobëri, icabëri:

—Quero nobaotisatimi. Caninataque pomaotisatina naro Obiati. ¿Pairo picogobiti nomaotisatimi Obironta Natingomisonori?

¹⁵Yotabitanëri Jesus:

—Pinintacaguina yamai. Nocogasanti pomaotisatina icocaquinaronta Tosorintsi.

Icanque Joan:

—Aro nomaotisatëmi.

¹⁶Aro ibaotisatëri nijaaquë. Cara yagatanai Jesus, aique inioberö Isëre Tosorintsi, opaniaca Jonogaguítequë, pamasobingopë paguëpëri Jesus, ocampari sompaguiti, pinampari. ¹⁷Iriguito iquemagabaquitiguiuri Tosorintsi canta Jonogaguítequë, icanque: —Icari ica Notomi nanintasanotirini. Tojai nacaninabentasantobiqueri.

Icogabeca camagari irantacaquerime**Jesus ora te onganinate.***(Mr. 1.12-13; Ir. 4.1-13)*

4 ¹Aique Isëre Tosorintsi páganëri Ira Jesus cara tera ontimingani. Cara, icoque camagari iraniantimari. Icofabeca irantacaquerime Jesus ora te onganinate.

²Cara, itica Jesus 40 cataguiteri, te irapëmate pairoraca. Págasantëri itasegane. ³Aro iátasiqueri Jesus camagari, iraniantëmari. Icantabepari:

—Obiersonorica Itomi Tosorintsi, pomeguiro oca mopëca pan, popero.

⁴Yotabitanëri Jesus:

—Quero nopeguiro. Ocanti Sanguenari jirai isanguenati comantantatsiri:

Te patiro intimantimaro pan matsiguenga, carari intimantëma-

rotisati Irinibare Tosorintsi cara inguemisanqueroca.

⁵Aique yáganëri camagari cara Jerosarénquë. Cara, yoguëri jonoica oquibe pongotsi irasi Tosorintsi. ⁶Aro icantabecari:

—Obiroca Itomi Tosorintsi, atsi pomatsecanë osobinta quibatsiquë.

Pinguenguero ocanti Sanguenari:

Tosorintsi iragáquimiri ironomire irisaanganetsitepague iromisanquemi. Irágaigabaquemi arota quero poparigopë mopëquë.

⁷Yotabitanëri Jesus:

—Quero picantiri Tosorintsi ora inganque; posamitiri ora icogui inganque. Aisati ocanti Sanguenari:

Quero piniantari Pitingomi Iriantinta Pitosorintsite.

⁸Aisati yáganëri Jesus camagari jonoquë oquibequë oguitoja. Ijgotëneri omagaro quibatsi, ⁹icantabecari:

—Pinetsaigueri antagaisati timaigatsi quibatsiquë. Aroca pintingominquina naro, pobaticagueritotasiquinaca, aro nomëmiro omagaro, nangantaiguëri antagaisati intaegui cara intingomintai-guëmi iriro.

¹⁰Yotabitanëri Jesus aisati:

—Pijáte, jaara, obiro Satanás. Ocantiti Sanguenari negaca:

Pintingomintimari paniro Atingomi Irironta Pitosorintsite. Paniro Irirö pomanocoqueri pinguemisanqueri.

¹¹Aro iátaji camagari ijocanëri. Aique ipocasitaigapëri ironomirepague Tosorintsi irisaanganetsite, imitocotai-gapëri Jesus.

Iáque Jesus Garireaquë.*(Mr. 1.14-15; Ir. 4.14-15)*

¹²Cara Jesus iquemocoqueri Joan cara yomianquengani, iáque Jesus cara Garireaquë. ¹³Te intime Nasarequë, carari iáque Caperinaoquë. Caperinao

iroonti poeboro onamijaquë oquibe angaare jitacha Garirea. Aisati pini aronisati iguebatsite Saborón aisati irasi Nejatari. ¹⁴Aro omoncaraca ora isanguenatocoque Isaías comantantatsiri jirai cara icanque:

¹⁵Ainta matsiguenga timaigatsi quibatsipaguequë: Saborón aisati Nejatari timatsi onamijaquë angaare jitacha Garirea; aisati aiqhero basiniquë angaare oquibeguintesonori; aisa antatinta Jorirán; aisati Garirea canta itimaigui tojai matsiguenga cagarijegui jorío. ¹⁶Jirai icantabetaigacari ibega irægüi timatsi tsitiniriquë tenta irogóigüeri Tosorintsi. Iriátaiguëme Sharincabeniquë, carari yamai aisati icantaigari ira timaigatsi cataguiteriquë, aroquenta iquemocotaigabaqueri Jesos.

¹⁷Aro iparintaca Jesos iquenguitsatomo-taiguëri matsiguenga canta, icantaiguëri: —Pingantaigaima yacaqueroca, pijocajiro ora picantaguëti te onganinate, pabentimari Tosorintsi pënibaquenta orequima iragáantane cara intingomibintaiguëmi.

Jesos icoigaguëri irogomere.

(Mr. 1.16-20; Ir. 5.1-11; Jn. 1.35-51)

¹⁸Iroontita yanëisigui Jesos cara onamijaquë angaare jitacha Garirea, iniopëri Simón aisati ireinti, Antiris. Simón aisati ijita Peroro. Isiriatasegui simaguitinta ini. ¹⁹Iniopëri Jesos aro icampëri:

—Intsome, piguiatanëna. Jirai pitarobacaati pisiriatiri sima carari nomëmi irorai pitarobacaare; pinguemisantacaguinari matsiguenga.

²⁰Aito cara ijocanëro isiritite, yoguiataiganaqueri. ²¹Yogagaiganaca

negaqueronta, Jesos iniopëri pite basini, Santiago aisati ireinti, Joan. Iriro pitirooti itomi Sebereo. Yobetsicaigase-guiro irisiriamiento cara ibitoquë. Aisati icaimaigapëri Jesos. ²²Aito cara ijocaganaqueri iriri cara ibitoquë, yoguiataiganaqueri.

Icomantagueanti Jesos cara Garireaquë.

(Mr. 1.35-39; 3.7-8; Ir. 4.42-44; 6.17-19)

²³Iquenagueque Jesos cara Garireaquë; yogomeanti omagaro poeboropaguequë cara yapatoitaiga jorío. Aisati iquenguitsatocotagueantëro iragáantane Tosorintsi cara intingomibintaiguëri matsiguenga. Aisati Jesos yogaguibegajiri tojai janaitatsiripague. ²⁴Iquemocotaiguëri Jesos omagaro Siriasati. Aro yamaigapëri tojai imatsiguenga janaitaguetatsiri aisati catsibaguetatsiri arota iraguibegajiri. Yamapëri Jesosiquë ira inanca camagari, ira tingaraachari, aisati ira emëngari. Yogaguibegajiri antagaisati. ²⁵Yoguiataigapëri tojaisonori matsiguenga: Garireasati, Tecaporisiasati, Jerosaresati, Joreasati, aisati ira paniacha antatinta Jorirán.

Iquenguitsaque Jesos cara oguitojaquë; icomantëgotaiguëri ira

iraganinasëretaiguë Tosorintsi.

(Ir. 6.20-26)

5 ¹Cara Jesos iniaiguëri tojai matsiguenga ira botoibiritaigacari, aro itonganaque oguitojaquë, isobigopë. Ishongaigapari irogomerejegui. ²Aique yogometaguëri, icantaiguëri:

³—Iraganinasëretaiguëri Tosorintsi antagaisati ira cantatsi: “Nantingomintimari Tosorintsi. Nocoguini irojocajinaro ora nacantaguetomotiri quimingari, iragabisaicotajinata tenta nagabisaicotajima naneni”. Aro iragabisaicotajiri Tosorintsi. ⁴Iraganinasëretaiguëri

Tosorintsi omagaro ira agasëretai-gacha, omagaro ira aragacha. Aro inganinasë retagaiganaqueri Tosorintsi.

⁵Iraganinasëretai-guëri antagaisati ira te inguengasantima, quero iguisabacaga. Aro Tosorintsi ingábintsasanoiguëri, imëri ora caninaro. ⁶Iraganinasëretai-guëri Tosorintsi omagaro ira cogasantatsi ingante caninasati.

Iromitocotaiguëri intime caninasati.

⁷Iraganinasëretai-guëri Tosorintsi antagaisati ira cantaneintëgotiri ira basini. Aisati ingantaneintëgotasantëri irirojegui Tosorintsi. ⁸Iraganinasëretai-guëri Tosorintsi omagaro ira quingasëretai-gacha caninasati aisati cantatsi caninaro. Aro ironijagaiguëmari iriro Tosorintsi. ⁹Iraganinasëretai-guëri Tosorintsi antagaisati ira aguimairen-queri quisachari. Aro intomintai-guëmari Tosorintsi. ¹⁰Aroca inguisaiguëmi aroquenta picaninataiguë, pinganinasë retai-gue. Aro iragasobicaiguëmi Tosorintsi cara igáanti Irro. ¹¹Aisati inganquímica catsimari, irinibatocotimica ora te onganinate, intoisoguëgotimica aroquenta piquemisantaiguëna, pinganinasëretai-gue. ¹²Jee, pinganinasë retasantaiguë: imai-guëmi Tosorintsi ora caninaro cara Jonogaguítequë aisa icanta ipaiguëri comantantatsiri jirai cara iguisaiguëri imatsiguenga. Iroro quero pipëgataguëtari, ingantocoquiminta Tosorintsi caninaro.

Ira quemisantatsiri yosiacaro pibega patiari aisati pibega michero.

(Mr. 9.50; Ir. 14.34-35)

¹³Aisati icantaiguëri Jesus:

—Pigóiguë obotiatëri ibatsa arota quero isititi. Carari omasangatanëca patiari ora cochotacaguero, quero ocomeitanai, ojoqueroti sotoquë iranëiro ogatiquengani. Obirojegui posiacaro pibega patiari: poganinatai-

guiu matsiguenga. ¹⁴Aisati obirojegui picantaro michero yaca quibatsica. Iniaiguëmi matsiguenga ora picantaiguë aisa ocanta iniaiguëro poeboro inatsi oguitojaquë. Quero pimána. ¹⁵Aisati posanguëguitocotaiguëri matsiguenga ora caninaro aisati picantaro michero. Cara poboquerotica, quero pimániro osobica cantiri, carari poguërotica jonoquë arota osanguëguitocotiri omagaro timatsi pongotsiquë. ¹⁶Aisati obirojegui, pintimaigüe caninasati arota iraniaiguëmi pomatsiguengajegui cara caninasati picantaiga. Aro iraniacaninataiguëri Pabati Ira timatsi Jonogaguítequë.

Jesús icomantëgotëro isanguenare Moisés.

¹⁷Përosati yogomeque Jesús:

—Teri iroro nopocasite nojocaguimiro cara piquemisantaiguëro isanguenare Moisés aisati isanguenare comantantatsiri. Nipocasique nogometai-guëmiro ora icantantati. Nomoncaraquero.

¹⁸Aisonori nangantaiguëmiro oca: otsonguëmaca quibatsi aisati Jonogaguíte carari quero pitsonga isanguenare Moisés irooti cara omoncaraquima antagaisati ora icanque.

¹⁹Queroca piquemisantasantiro isanguenare, aisati aroca pogometiri pomatsiguenga cara quero iquemisantasantiro, quero iniacaninatsantimi Tosorintsi cara iragáantanequë. Carari aroca pinguemisantasantëro omagaro isanguenaque aisati pogometai-guërica pomatsiguenga inguemisantasantiro, aro imëmi Tosorintsi pomitocotaiguëri cara igáanti. ²⁰¿Pijitasitaiga Tosorintsi iniacaninataiguëri bariseo aisati ira ogomeantiro Sanguenari? Yamai nongomantaiguëmi, teni iromoncarataigüero ora icocagaigabitari Tosorintsi. Aisati obiro, queroca pabisiri iroro,

queroca picaninatasantaigui, quero piáti obiro cara iragáantanequë Tosorintsi cara itingomibintanti.

Icanque Jesus: “Quero piguisabacaga”.

(*Ir. 12.57-59; Ej. 4.26*)

²¹Aisati icanque Jesus:

—Pigóiguë icantaiguë jirainisati: “Quero póganti. Aroca póganque, ingasítgatëmi Tosorintsi”. ²²Carari nongomantaiguëmi Naro: quero piguisaneintiri pomatsiguenga. Aroca pinguisaneinqueri, ingasítgatëmi pitingomi. Aroca pinganqueri: “Te pigóte”, inguisaiguëmi obatacagantatsi-ripague icarati 71. Quero picantëmatiri pairoraca querota pitsipireiro cara Sharincabeniquë. ²³Cara pijáqueca ibangoquë Tosorintsi aroca póguëneri pitaquineri pobira cara itagantariquë, carari piquianca aiti ora iguisëgotantimi pomatsiguenga, ²⁴atsi pijocanëri pobira cara, pijátasitiri ira quisëgotimi. Pobetsicobagaima, págacaninatobagaima. Aique popigaima ibangoquë Tosorintsi, póguineri pobira. ²⁵Aintaca pomatsiguenga irácagantëmi, pobetsicagairi pinguenaguimari. Pingante: “Intsome obetsicobagaima”, queroquerai yáganëmi cara poesitoquë. Aro ira joes iragáqueri soraro: “Páganëri ica”. Aique iromianquemi cara iromingamentoquë. ²⁶Aique queroca pipënabentiro antagaisati pirebetiri, quero yomisotocajimi aisati.

Icanque Jesus: “Quero pintantopitiro pijina; querootisati pintantopitiri pijime”.

(*Mt. 18.8-9; 19.9; Mr. 9.43-47; 10.2-12; Ir. 16.18*)

²⁷Përosati icantaiguëri Jesus:

—Pigóiguë icantaiguë jirai: “Quero pintanguetiro tsinane cagaro pijina. Quero pintanguetiri sërari cagari pijime”.

²⁸Carari nongomantaiguëmi Naro:

pinetseroca tsinane pinebetëmaro, aisati pinguenagasëretëro pintëro, aroque pintëro ora te ongomeite. Aroque paguimintimaro pijina. ²⁹Nosiacagantë miro: oraca antaquemine piroquisonori ora quimingaro, pijocajiro ora picantaguëti te onganinate. Aro pobetsiquiro pisëre aisatime ongantima pinguitsoguïrome piroqui, pijoquintirome. Aro quero piáti Sharincabeniquë. ³⁰Oraca antaquemine pobacosonori ora te onganinate, pijocajiro ora picantaguëti te ongomeite. Aro pobetsiquiro pisëre aisatime ongantima pitotirome pobaco, pijoquintirome. Aro quero piáti Sharincabeniquë. ³¹Aisati ongantingani jirai: “Aroca pingoque pijocajiro pijina, pisanguenatinero pomero ora pijogantaimaro, aro pijoquero”. ³²Carari nongomantaiguëmi Naro: quero pijoquero pijina. Aroca pijoquero, aisati págae basini, aroque paguimintëmaro pijinasonori, picantaguëti ora te ongomeite. Aisati ira ágairone ora pijoque, aiti irantane ora te onganinate. Aintaca tsinane ojoqueri ojime ágairica basini sërari, aroque ontantopitiri paguimintacari ojimesonori. Iroonti patiro caninataque pijoquero pijina aroca aguimintëmi, quero basini.

Icanque Jesus: “Quero pamatobitiri pomatsiguenga”.

³³Aisati icanë Jesus:

—Aisati pigóiguë onganti. Aroca pijoquero, aisati págae basini, aroque paguimintëmaro pijinasonori, picantaguëti ngani jirai: “Quero picantasita: ‘Igóque Atingomi nasatironguëro omagaro nacanquimi. Aroca nomatobiquimi, iróguinata’. Aroca pinganque: ‘Igóque nasatironguëro omagaro nacanquimi’, aro pomoncaratima aisonori”. ³⁴Carari

nongomantaiguëmi Naro: quero picantasiñemata. Quero pinibati: “Aisonorica aiti Jonogaguite, aisa ocanta nanibare, aisonori catinasati nomoncaraquimaro ora nacanquimi”. Nangantaiguëmi Naro: ora Jonogaguite iroonti iragáantomento Tosorintsi. Igóti aisonorica pinibati. ³⁵Querootisati pinibati: “Aisonorica aiti quibatsi, aisati aisonori catinasati ora nacanquimi; nomoncaraquimaro”. Carari ora quibatsi iroonti ora yagatiqui Tosorintsi. Igóque pitsoiganica. Querootisati pinibati: “Aisonorica aiti Jerosarén, aisati aisonori nanibatëmi catinasati”. Carari nangantaiguëmi itingomibintaiguëri Atिंगomi omagaro Jerosaresati. Igóti Iriro aisonorica pinibati. ³⁶Querootisati picanti: “Iritoitinata naguisiquë queroa ninibati catinasati”. Nacanquimi te pigóte ati ongantima pingamaque; paniro igóque Tosorintsi. Pintingomintimari Iriro igótinta pitsoiganica. ³⁷Pinibate catinasati. Quero pitsoiga, querootisati pamatobianti. Caninataque pintëroca pairoraca, pingante: “Jee, nantëro”. Queroa pintiro, pingante: “Quero nantiro”. Aroque. Te onganinate pomitojaiguero pinibare.

Jesos icanti: “Quero pipëgatari ira basini”.

(Ir. 6.29-30)

³⁸Përosati icanque Jesos: —Pigóiguë ongantingani jirai: “Aroca pinguitsoguëneri iroqui basini, caninataque iripëgaquimi inguitsoguëmiro pasi piroqui. Aroca piquëriaitëri pomatsiguenga irai, caninataque iripëgaquimi iriquëriaiquimiro pasi piji”. ³⁹Carari nongomantaiguëmi Naro: quero pipëgatari ira quisimi; aroca iranchotangaborotëmica cara poborosonoriqë, popisitaima pomëtiguimari queroa poboro

ingapojaboroquemi aisati. ⁴⁰Aisati aroca ingoque sërari iráganëmi catinasatiqë joes, ingoque irágopitëmiro pigamisate, pomeri pobasitoro aisati. ⁴¹Aroca iromeratëmi paniro, inganquimi: “Páganënaró oca nasica poro quirometoro”, aro pigabisëneri pite quirometoro. ⁴²Aroca iromanaquemi pomatsiguenga: “Pomenaro”, aro pomëtiguiri. Aisati aroca inganquimi: “Pomirisatinaro oca”, aro pomirisitaqueri, quero pometopitari.

Icanque Jesos: “Pinintaiguëri quisaneinquimi, pingábintseri”.

(Ir. 6.27-36)

⁴³Përo icantaiguëri Jesos:

—Piquemaiguë cara pomatsiguenga cantaigatsi: “Pingábintseri pomatsiguenga, carari pinguisaneintiri ira quisaneintimi obro”. ⁴⁴Carari nangantaiguëmi Naro: pinintaiguëri omagaro ira quisaneintimi aisati cantasitëgotaguetaiguimi, aisati pomanocotaiguëri iragui cantëgotaguetimi catsimari arota ingábintsaiguëri iroto Tosorintsi. ⁴⁵Cara pingantaiguë negaca, poniagaiguema aisati picantari ibega Tosorintsi, Ira piquemisantaiguë, Ira tomintaiguëmi. Ainta Iriro canta Jonogaguitequënta, cara yobetsiquiri paba cara yobariaguitetocotaiguëneri antagaisati, ira caninari aisati ira te inganinate. Aisati angani, yobariatëneri antagaisati, ira quemisantatsi aisati ira te inguemisante. ⁴⁶Aroca pingábintseri paniro ira cábintseri, ¿Pijiqueco iraniacaninatëmi Tosorintsi? ¿Teco aisati ingábintsabacagaiguema ira coigotaiguëmi piguireguite, ipagantineri cobeingari cara Iromaque? ⁴⁷Aroca pobetsataigabaquimari paniro pomatsiguenga, ¿Pairo picantaiguë caninari? ¿Teco aisati irobetsatobagaiquema ira cagari jorío, ira te irogóguëri

Tosorintsi? ⁴⁸Pinganinatasanoitaiganaque, pingantaiguemari ibega Piri Tosorintsi. Icaninatasanoti Iriro; inintasantaiguëri omagaro matsiguenga.

Yogometaijái Jesus ati angantima angábintsante.

6 ¹Aisati icantaiguëri Jesus: —Pigamema. Quero piquemisantomemega arota iraniacaninataiguemi matsiguenga aisonori obiroyoontita pamatobitaigasegui. Aroca pomatobitaiguëri negaca, quero iniacaninatimi Pabati Tosorintsi canta Jonogaguitequë. ²Cara pomasitaiguëmarica pomatsiguenga ira cogatsi pairoraca quero picomantaguetiri basini. Irooti icanque ira quemisantome megacha. Cara ipirica pairoraca ira coguitiacha, icomantaiguëri antagaisati. Icoqui iraniacaninataiguëri iriro. Nangantasantaguëmi oca: iniacaninatarica iriro imatsiguenga, quero iniacaninatiri Tosorintsi. Aroque yáguëro iraisati. ³Carari cara pomasitaiguëmarica ira cogatsi pairoraca, pomániro. Quero pigótacagui basini. ⁴Aro quero igóti pomatsiguenga cara pomitocoqueri ira coguitiacha. Carari irogótocoquimi Tosorintsi, imëmiro ora caninari.

Yogomecái Jesus ati angantima cara omanocoqueri Tosorintsi.

(*lr. 11.2-4*)

⁵Përosati yogomeanti Jesus: —Aisati, cara pomanocotaiguërica Tosorintsi, quero posigari ibega ira quemisantomemegachari. Yamanaigasegui iriro cara yapatoitaiga joríojegui aisati cara abatsiquë arota iraniacaninataiguëri imatsiguenga. Aisonori nacantaiguëmi oca: aroque yáguëro iraisati. ⁶Carari cara pomanocotaiguë

rica Pabati, pinganaque tsomagui, pisitocotanëma, aro pomanocotiri Piri. Iraniaquemi Iriro paniro obiroyo, iraniacaninatëmi, imëmiro ora caninaro. ⁷Aisati cara pomanocotaiguërica, quero pinibatasita aisati picantari ibega ira te irogóiguëri Tosorintsi. Inibatasitaiga iriro bero bero bero aronta ijitaigabita inguemaigabaqueri Tosorintsi cara yomitojaiganaquero irinibare. ⁸Quero posigaigari ibega iriro. Igótasanti Tosorintsi antagaisati ora picogaigui cara queroquerai pamaniri. ⁹Iroto cara pomanaiguërica Tosorintsi, pomanocotiri cantacha negaca: “Pabati nasiatiegui, ainta Obiroyo Jonogaguitequë, nocogaigui cara iraniacaninataiguëmi omagaro matsiguenga Obiroyo Natingomisonori. ¹⁰Nocogaigui pigáantasantaguëna yaca quibatsica; aisati nocogaigui nanganque antagaisati ora picocagaiguëna. Aisati nocogaigui inganque omagaro matsiguengajegui ora picocagaigui aisati ingantaiguë mari iraegui timaigatsi cara Jonogaguitequë icantaigasegui omagaro ora picocagaigui. ¹¹Pomapinintaiguëna noperi antagaisati cataguiteri. ¹²Aiti nacantomotaguequimi ora te onganinate. Pingábintsasantaguëna, pijocajinaro quero piquengainaro aisa ocanta nojocajineri ora icantaguetomotina matsiguenga ora te onganinate, teni nanguisaneintajiri. ¹³Quero pinintacagui camagari cara irantacaguëna ora te onganinate. Përosati cara pigáantasantagueti omagaro. Pasintaguitetaro antagaisati. Përosati pitasangantasantagueti Obiroyo sintsirisonoriguënte. Përosati picobeingaguitetasanti. Aro ocarati, amen”.

**“Pijocajineri ira basini ora
icantomotaguequimi”.**

(Mr. 11.25-26)

¹⁴Aisati icantaiguëri:

—Aitosati aroca pijocajineri ira basini ora icantomotaguequimi te onganinate, ingábintsaiquëmi Pabati Tosorintsi Ira timatsi Jonogaguitequë, irojocajimiro aisati ora picantaguëti obiro te onganinte, quero iquengaimiro. ¹⁵Carari queroca pijocajineri pomatsiguenga ora icanquimi te onganinate, querootisati ijocajimiro Atingomi ora picantaguëti cagaro caninatatsi.

**Yogomecái Jesus ati angantima cara
atitaiguëma.**

¹⁶Përosati yogometaiguëri Jesus:

—Cara pititimaca pomanocoqueri Tosorintsi, quero pigótacaguiri basini matsiguenga. Quero aisa picantaigari ibega ira quemisantomemegacha; cara ititopiantaiga iriro, yogasëretomemegaca arota irogóntëmari cara itita, aisati iraniacaninataiguëri matsiguenga. Nacantocotaiguëri oca: aroque yáguëro iraisati. Quero ipiri Tosorintsi. ¹⁷Carari nacantaiguëmi, cara pititaiguëmaca, caninataque pobetsiquima, pinguibima pibega cara pametaiga. ¹⁸Aro quero igótocotimi pomatsiguenga cara pitita. Carari irogóquimi Pabati jonoquë, imëmi aisati.

**Icanque Jesus: “Pingogue cara imëmi ora
pasi canta Jonogaguitequë”.**

(Ir. 11.34-36; 12.32-34)

¹⁹Aisati icantaiguëri Jesus:

—Quero pomitojaiguero ora pasintagueta yaca quibatsica: yaca aiti ora irapë cajiro, aiti basini oraaquima, basini egatanë, aisati ora ingositëmimo cosirinti. Otsonganaquima omagaro. ²⁰Carari pingogue iromitojaiguemiro tojai

ora pasi përonta cara pinë canta Jonogaguitequë, cara quero yapiro cajiro, quero piraaga, querootisati icositimiro, quero pitsonga. ²¹Aitica ora pasintagueta yaca quibatsica, pinguengasëretapinintiroca ora inatsi yaca quibatsica; carari aitica pasi canta Jonogaguitequënta, pinguengasëretapinintirica Tosorintsi. ²²Aiti piroqui ora piniaanta, ora pigóonta. Posiacaro obotagantsi ora poboonta tsitiniriquë, piniantaro. Aroca ocaninatomoquimi, pigóganaque, ²³carari queroca ocaninati, quero pinei, quero pigóti, pitimi tsitiniriquë. Aisa ocanta aroca pinguengasëretapiniquero ora te ongomeite, quero pigótiri Tosorintsi, përosati pitimi tsitiniriquë.

**Icanque Jesus: “Aroca pintanontabitima
obiati quero picantiro ora icocaquemi
Tosorintsi”.**

(Ir. 16.13)

²⁴Aisati basini icanque Jesus:

—Quero picantiro piquemisantiri pite pobatorote. Aisa ocanta aroca pingantineri Tosorintsi omagaro ora icocaquemi quero picantanonta obiati. Aroca pingoque pingantanontima obiati, quero pintineri Tosorintsi. Quero picantiro pite. Aroca pinintasantëri Tosorintsi, quero picogui popobotiri piguireguita. Aisati pinintirica piguireguita, quero piquemisantiri Tosorintsi.

**“Quero pogasëreta Irironta
omisantimi Tosorintsi”.**

(Ir. 12.22-31)

²⁵Aisati icanque Jesus:

—Yamai nongomantaiguëmi: quero pogasëretocotaro poperi, pomire, piguitsagare, pairorapageraca. Irironta timaquimine Tosorintsi, ¿Queroco ipaiguimi poperi aisati? ¿Queroco icaaguimi pomanchaqui aisati?

²⁶Pinetsaiguerei tsmiripague, pingueinguema. Teni imanguitanon-tima, teatisati iráguero ibanguire iroquero ibangoquë, carari ipagueiguëri Pabati Tosorintsi iraperi antagaisati cataguiteri. Aroca yomisantaiguëri tsmiripague, aisati obirojegui iromisantasantaiguëmi pabisaiguërinta tsmiripague. ²⁷Aroca pinguengasëretëma, ¿Aroco pomitojaiguëro posarinite? Quero. Pitsipirasita cara piquengasëreta. ²⁸Aisati ¿Pairo pogasëretocobiritaro piguitsagare, pairoraca pinguitsagatima? Pinetsaiguero otegapague tobari. Te onguengue. Te onguirique, teatisati ontëmate, ²⁹carari iroso caninarosonori. Jirai itimi Saromón, itingomi jorfojegui. Iquitsagata caninasati iguitsagare carari te aisati ingantimaro pibega orapague otega. ³⁰Tosorintsi aganinatëro otegapague tobari, ora quero ocosamaniti omanapague osiguiricanë, iritaguëro matsiguenga. Cara yoganinatëro otegapague Tosorintsi, ¿Teco iromisantaiguëmi obiro aisati; inguitsagataiguëmi? ¿Pairo pitsoingobitaiguëri? ³¹Iroso, quero piquengasëretaguëta quero posamita: “¿Pairo nopë? ¿Pairo nóguëma? ¿Pairo nanguitsagakuima?” ³²Aisati icogaiguëro ocapague ira te inguemisante. Quero posigari irirojegui, aroquenta igóquero Pabati Tosorintsi cara Jonogaguetequë ora picogaigui obiro. Iromisanquemi. ³³Pingogue obitsita quemisantasantërine Tosorintsi, pintingomintasantimari, aisati pingogue iraniacaninatimi. Aique imagueiguëmiro ora picoguitaiga. ³⁴Iroso, quero piquengasëretaguëta naramani, pairoraca pinganque. Cara orequima naramani, aro pinguenguero. Aiti ora piquengasëreti yamai; te onganinate pigasëretima naramani aisati.

“Quero pini joes, quero picomantëgotiri basini”.

(Ir. 6.37-42)

7 ¹Përosati inibatë Jesus, icanque: —Quero pini joes. Quero picomantëgotiri pomatsiguenga. Aroca pingomantëgotëri: “¡Cara icantagueti iriro ora te onganinate!” aro ingantocoquemi Tosorintsi aisati: “Aiti ora picantagueti obiro”. ²Aroca pinguisaneinqueri basini, iripëgaquimi obiro inguisaneinquimi aisati. Aisa ocanta pingábintsëri basini, aisati ingábintsëmi obiro. Cara picomantëgotëri basini matsiguenga, aisa inganquima ingomantëgotëmi obiro Tosorintsi. ³Aitica picantagueti obiro te ongomeite, quero picantëmatiri pomatsiguenga: “Aiti picantagueti quimingaro”. Nosiacagantëmiro; aitica pairoraca oquibe cara piroquiquë, ¿Caninataqueco piniaquero arosata cara iroquiquë pomatsiguenga? Quero. ⁴¿Pairo picantobitiri: “Majire pine, nãgabitsaque-miroti ora arosata piroquiquë”, carari quero pineiro aintinta oquibe pasi piroquiquë? ⁵Tojai picantasita. Obitsita joquërone ora oquibe pasi piroquiquë. Aique piniasantë cara pijocajineri pomatsiguenga ora arosata inaaqueri iroquiquë. Aisati picoguica pingantiri pomatsiguenga irojocajiro ora icantagueti te ongomeite, pobate pijocajiro ora quimingari picantagueti obiro. ⁶Te onganinate pomapinintiri otsiti caninari ibatsa tenta ingarasiatimiri; teatisati onganinate pomapinintiri chancho irapëro caninari mopë catari jitacha përira, queronta icogui yapiro. Iratsicabitëmaro, irojoquero, inguisanaquima, iratsicanëmi. Aisati ocanta ocaninatasanti Irinibare Tosorintsi. Caninataque pinguenguitsatomotaguetiri pomatsiguenga, carari aroca inguisaneintocoquemiro tenta iranintaigue inguemisantiro, quero picomantairi aisati.

Yogomeque Jesus: “Përosati pomanocotopiantiri Tosorintsi”.

(Ir. 11.9-13)

⁷Aisati icantaiguëri Jesus:

—Aroca pomanakeri Tosorintsi, aro imaiguëmiro. Pomanocotopiantiri, aisa ocanta pingoquero ca pairoraca, aro imaiguëmiro. Aisa ocanta pirequimaca pongotsiquë, pingaimapëri casintaro, “Pisirenaro”, aro irasiriëmiro. Aisati cara përosati pomanocotopiantëri Tosorintsi, imaiguëmiro. ⁸Aisonori imaimi Tosorintsi ora pomanocotopiantëri. Aisati cara pingogaiguëca iranetsacaquimiro. Cara pingaimapërica irasitëcoroquë, irasiriëmiro. ⁹Aroca iromanaquimi pitomi: “Apati, pomena pan”, querosonori popiri mopë. ¹⁰Aroca iromanaquimi: “Pomena sima najaguëni”, quero popiri marangue. ¹¹Pinetsaigue. Te pinganinatasantaigue obiro, carari pigóiguë pingábintsaiduëri pitomi popabaqueri ora icoguitiaca. Icaninatasanti Tosorintsi, Ira timatsi Jonogaguëtequë, igótasanti icábintsaiduëri antagaisati ira manëgotaiguëri. Imaiguëri ora caninaro.

Icanque Jesus: “Pinintobagaiguema”.

(Ir. 6.31)

¹²Aisati yogometaiduëri irogomere Jesus, icanque:

—Aroca pingogue ingábintsaiduimi matsiguenga, pingábintsaiduëri obiro. Pinintica ingantaneintëgotimi iriro, aro pingantaneintëgotiri obiro aisati. Iro ora isanguenataiguë jirai Moisés aisati omagaro comantantatsiri.

Jesus icomantëgotëro pite abatsi.

(Ir. 13.24)

¹³Aisati icomantaiduëri matsiguenga Jesus:

—Aroca pininti pingapë cara itimi Tosorintsi, pingapë otiomijaniquë

omoro. Aiti basini omoro oquibe, aisati basini abatsi oquibe cara te omomirintsite iriáiguë matsiguenga, Carari iraegui quenantaro abatsi oquibe iriáiguë cara Sharincabeniquë, iratsipiriantëquero përosati. ¹⁴Irari quenantaro otiomijaniquë omoro aisati otiomijani abatsi iraretaiguëma cara Jonogaguëtequë. Arosanori quenantaigaro oquibe abatsi, carari arosantaanti matsiguenga icaigapë omoroquë otiomijani aisati iquenantaigaro otiomijani abatsi.

Jesus icomantëgotëri matobiantatsiri.

(Ir. 6.43-44)

¹⁵Aisati icantaiguëri Jesus:

—Pigamemari matobiantatsiri ingomantomemeguëmiro Irinibare Tosorintsi. Ingantabepëmarime ibega oisha; pijiataigabaqueri quero icantimi pairoraca. Carari irianti cantapëmarine ibega secari irianti cobeingarisonori. ¹⁶Pinetsasantaiguero ora icantaguëti, ora pigóontëmari caninatica. ¿Páguëroco oba cara totseisiquë? Teni. ¿Paguëroco igo cara jirinasiquë? Teatisati. Aisati icantaiga matobiantatsiri: tiguëti ingantiro caninari. ¹⁷Pigóiguë caninaroca anchato aisati caninaro oguitso. Aisati teca onganinate anchato teatisati ongomeite oguitso. ¹⁸Ora caninaro anchato tiguëti ongantima onguimigate oguitso. Aisati ora anchato ora te ongomeite tiguëti ongantima onganinate oguitso. ¹⁹Pigóiguëro anchato te onganinate oguitso, otoquero ataquero aisati. ²⁰Aisati pigóigabaquero ati icantaigapa ira cogatsi irogometimi. Pigóiguë itimica caninasati, aisati irogomepëmiro Irinibare Tosorintsi caninasati. Carari teca intiomotimi caninasati, teatisati irogomeante catingasati.

**Ira játaiguënguetsine cara
Jonogaguítequë.**

(Ir. 6.47-49; 13.25-27)

²¹Aisati icanai basini Jesus:

—Aintaca pairiraca cantënane:

“Natingomi, Natingomi”, quero iáti cara Jonogaguítequë cara nigáanti Naro. Aintanta inabita inganquina: “Obiro Natingomi, natingomintasantëmi”, carari quero iáti cara nagáantanequë. Irianti játénguetsine Jonogaguítequë iraegui quemisanqueri Pabati aisati icantasantineri ora icocaqueri omagaro.

²²Aiquenta cara nopocaje nongomantë gotaigapëri antagaisati matsiguenga, nanganqueri negaraca iriátë aisati pairoraca inganque. Ainta tojai cantasitënane “Natingomi, nocomantë gotëmi. Aisati nacantaiguëri matsiguenga inancari camagari: ‘Naquemisanquerinta Jesoquirisito Natingomisonori, iroro pijátotipitiri ica, pijocanëri’. Aro iátaji, ijocanëri. Aisati nitasonganti Obironta omitocoquena”.

²³Carari nangantaigapëri: “Teni nogóiguemi. Pijáigue jaanta, tenta pinguemisantasantina. Piquemisantome-megasita. Tojai picantagueigui ora te onganinate. Picantanonta obiati”.

²⁴Pinetse, aroca pinguemobëro ora nogometaiduëmira pinguianquero, pinguemisanquero ora nococaquimi, pintaiguëro, aro naniacandinataiguëmi. Obiro pingantimari ibega sërari ogótatsiri yobetsiquëro ibango coshobatsariquë. ²⁵Opariaque oquibe angani, pipoque jarini omotoncaatapa, ocoquintimatasantapë sintisiri. Carari përosati pini ibango iroronta yobetsiquë coshobatsaroquë. Coshori pongotsi.

²⁶Carari teca pinguemobëro ora nogometaiduëmira, te pinguenguero, te pinguemisantiro ora nococaquimi, te pingantiro, aro nangantaiguëmi: obiro

ibega sërari te irogóte. Yobetsiquëro ibango cara sibitabatsaroquë.

²⁷Opariatapë oquibe angani, pipoque jarini omotoncaatapa, ocoquintimatasantapë sintisiri. Aito cara pitëanë pongotsi catsiguero; páganëro jarini. Itsipiriasicaro ira obetsicabitaro. Aisa onganquima pitsipiriasiquima queroca picantasantiro omagaro ora nococaquimi.

**Itsonquero Jesus yogomequeri
imatsiguenga cara oguitojaquë.**

(Mr. 1.22)

²⁸Aroque itsonquero Jesus yogometaiduëbaqueri matsiguenga cara oguitojaquë. Iquenganeintasantaigapëri. Icantobagaiganaca matsiguenga:

²⁹—Tojai igóti Iriro. Teni asi anguemiro cantacha nega. Yogomeanti aisati icantari ibega Atingomi; teni aisati ingantima ira ogomeantiro isanguenare Moisés.

Jesus yogaguibegajiri ira iribatsasetaga.

(Mr. 1.40-45; Ir. 5.12-16)

8¹Aroqueque icomantanque Jesus cara oguitojaquë, yanongopa. Aro yoguiataganaqueri arosonori matsiguenga. ²Aro iátasiqueri poro sërari iribatsasetaga. Yobaticagueritotasi pari, yamanopëri:

—Natingomi, pinintica piguëtetainaro nobatsagoro. Nigóque picoguica pigaguibegajina.

³Aro itimagonaguítasitanacari Jesus yotsagaqueri icanqueri:

—Nocogui yamai; nagabisaicotajimi.

Aito cara opeganaa ora iribatsagoro ibeganaa. ⁴Aro igáqueri Jesus, icanqueri:

—Quero picomantaguetiri pairiraca, carari pijáte catinasati, poniagapëmari saseriroti, ira nibabintimiri Tosorintsi. Pingantiri: “Nibatsagabeta, carari

pinetsena yamai, abisëgotaina”. Aisati pomeri pobira: iróquimiri saseriroti iritaguëneri Tosorintsi cara igáqueri Moisés jirai. Ora irogóontimi cara piquëtetanaí.

Jesús yoguibejajiri ironomire capitán.
(*Ir. 7.1-10*)

⁵Aro yogaganaca Jesús, aisati ira aguiataiguëri, yaretaigacaro poeboro jitacha Caperinao. Ipocasipëri sërari cagari jorío, irianti Iromasati. Iriro capitán, igátaiguëri 100 soraro.

⁶Icampëri Jesús:

—Natingomi, ainta nonamire cara nobangoquë, emëngatëni. Ainta icatsitasantëni. Nocogui pigabisëgotairi.

⁷Icanëri Jesús:

—Aro najáque cara, nagaguibejajantiri.

⁸Carari yotabitanëri capitán:

—Nigóquimi, Obiro Natingomi caninari; nitsoingaa naati, te nanganinate. Quero piáti nobangoquë. Nigóque aroca patiro pinibate, aro irobegajima. ⁹Ainta agátinari, aisati ainta soraro ira nigátaigui naro. Aroca nagáqueri nosorarote: “Pijáte”, aro iriátë. Aroca nanganqueri basini: “Popoque”, aro iribocapë. Aisatica nagáqueri nomeraro: “Pingantiro oca”, aro inganquero. Aisati ocanta pibega Obiro. Omoncaraquima pairoraca pinibati.

¹⁰Aro iquenganeintacari Jesús, icantaiguëri iraugui aguiataiguëri:

—Nacantasantaiguimini: tojai iquemisantasanti ica, yabisanaqueri antagaisati joríojegui quemisantatsi.

¹¹Aiqueta cara igáanti Tosorintsi, iribocaigapë arosonori basiniati matsiguenga paniaigacha omagaroquë quibatsi. Irisobicaigapë intsibataigapë mari nomatsiguengajegui Abaram, aisati Isac, aisati Jacob cara iragáantanequë

Tosorintsi. ¹²Carari quero ipoqui tojai jorío cara tenta inguemisantaiguëri Tosorintsi. Icogabeca Iriro iriáigue jorío cara iragáantanequë, carari itsoingaiiguëri Iriro jorío. Iroro iragátaiguëqueri cara otsitinitasanti. Tojai iratsipiriasantaiguë cara aisati iratsitsiaguitetanë.

¹³Aique icanqueri capitán Jesús:

—Yamai, pijáte pobangoquë.

Aroquenta piquemisanquina noguibejajiri ponamire.

Aro irooti ibeganaa ironomire.

Jesús yogaguibejajiro iraguero Peroro.
(*Mr. 1.29-31; Ir. 4.38-39*)

¹⁴Cara iáque Jesús ibangoquë Peroro, icanaque iniopëro iraguero pinariasega osamamentoquë. Ojanaitë ocatsingae-guisigui. ¹⁵Aro yotsagaquero obacoquë, yoguibejajiro. Aito cara ocabiritaja, opëri iraperi.

Jesús yogaguibejajiri tojai basini janaitaguetatsiri.

(*Mr. 1.32-34; Ir. 4.40-41*)

¹⁶Cara ochapinitanë, iátasitaiguëri, yáganëri tojai matsiguenga ira inanca camagari. Ijocajineri Jesús igamagarite, aisati yogaguibejajiri omagaro janaitaguetatsiri. ¹⁷Icanquero Jesús negaca arota iromoncaraquero ora isanguenatocoqueri jirai comantantatsiri jitacha Isaías:

Aiqueta iribocapë Quirisito agabaisaicoquerine tojai janaitaguetatsi, tojai ingábintsai-guëri.

Icanque Jesús: “Piguiatapëna”.
(*Ir. 9.57-62*)

¹⁸Cara yapatobiritaigapari Jesús arosonori matsiguenga, icanqueri irogomere:

—Intsome antatinta.

¹⁹Ainta inasegui paniro ogomeantiro isanguenare Moisés, yotsitipari Ira Jesus, icampëri:

—Ogomeantatsiri, negaraca pijáque nocoguini naguiatanëmi.

²⁰Yotabitanëri Jesus:

—Aiti imoro somani cara isami, aisati aiti imagosi tsmiripague cara isami, carari te ine nasi nobango cara nanareaguima Naro aronta nopaniaca Jonogaguitequë, nomatsiguengatapë cara niboguë yaca quibatsica.

²¹Ainta basini irogomere icanqueri:

—Natingomi, nocoguini naguiatanëmi, carari pënibaque ingamaque apati. Pinintacaguina natianëri; aique coshoni naguiatanëmi.

²²Yotabitanëri Jesus:

—Piguiatina obiro. Ainta tsoengatsiri, ira te inguemisantiri Tosorintsi; iritjairita piri.

**Jesos yoguimairenquero
sintsiri coguentima.**

(Mr. 4.35-41; Ir. 8.22-25)

²³Aro yotetanaca Jesus pitotsiquë, aisati itsibataiganacari irogomere. ²⁴Aro inariopa Jesus isamapë. Omanapague coraque pipoque oquibeguinte coguentima, omotoncaatapa, potiatanaca pitotsiquë. Përosati isamasegui Jesus. ²⁵Aro itsorogasantanë irogomerejegi, icabocapëri icanqueri:

—iNatingomi, atsiticoiguëni!

iPigabisaicotaiguena!

²⁶Icabirica icantaiguëri:

—¿Pairo pitsorogobitaiguë? ¿Pairo te pinguemisantobitina?

Aique yoguimairentajiro sintsiri coguentima aisati yoguimairenquero angaare aro omairiatasantanai.

²⁷Inetsaiguëri Jesus irogomere, iquenganeintasantaiganacari, icantobaca:

—¿Ati icanta ica? Inibatë, aro oquemisantasantanëri coguentima aisati angaare.

**Jesos yogabisaicoqueri pite matsiguenga
inancari tojai camagari.**

(Mr. 5.1-20; Ir. 8.26-39)

²⁸Aro yaretocotaigaca antatinta quibatsiquë jitacha Garara. Cara ainta pite sërari cara itiangani igamaga aroque inantaigacari camagari itonguibocari yotsitipari Jesus. Ira camagari tojai icatsimatacaqueri ira pitirooti sërari. Aro itsorogasantëri imatsiguenga, te inguenaigae cara itiaiguiri igamaga. ²⁹Icamaigapë:

—Obiro nigóquimi, Jesus, Obiro Itomi Tosorintsi. ¿Pairo pipocasibiriquina? ¿Naroco pipocasique yamai pitsipiriaca-gaiguëna? Terai omoncaratima naro cara natsipiriaque canta Sharincabeniquënta.

³⁰Ainta inagasegui arosonori chancho yapaisigui. ³¹Aro yamanaiguëri Jesus camagari:

—Aroca pigabisaicoqueri ica sërarica, pigátaiguena cara chanchoeguiguëra ninampëmari iriro.

³²Jesos icantaiguëri:

—iPijáigue!

Aro íaiganaque, inantaigapari ira chanchoegui. Isigaiganaca chancho cara tarangaquë, imatsematseiganaque angaarequë tobotn tobotn tobotn. Itsiticaiganaque ijogataiganaca omagaro chancho. ³³Aro ira omisantiri chancho isigaiganaca cara poeboroquë, icomantagueigapëri imatsiguenga omagaro ora iniaque. Aisati icomantëgotëri sërari ira inantabeca camagari. ³⁴Aro íatasitai-guëri Jesus tojai Gararasati, icantaigapëri:

—Atsi pijáte yamaica. Quero pipocaji yaca aisati.

Yogaguibegajiri emëngari Jesus.

(Mr. 2.1-12; Ir. 5.17-26)

9¹Aro yotetanaca Jesus cara pitotsiquë, íatocoiguë Iriro aisati irogomerejegi cara Caperinaoquë. ²Yamapëri sërari

emëngari te iranëibintsataje, yamëgotan-
taigacari jatasintsi. Igóque Jesus cara
iquemisantaiguëri, icabëri:

—Pinganinasërete, nomatsiguenga.
Nojocajimiro ora picantaguëti te
onganinate. Quero iguisëgotaimiro
Tosorintsi.

³Ainta inasegui irapague ogameantiro
isanguenare Moisés. Icantaneintobaganaca:
“Icantocotaguetasitari Tosorintsi Ica”.

⁴Igóque Jesus ora iquenganeintaigaca,
icantaiguëri:

—¿Pairo picantocobiritaiguëna ora te
ongomeite? ⁵Aroca nanganque oca:
“Yamai noguibegajimi, panëitanae”, ¿Teco
pinetsaigabaqueri? Queroca nacantiro,
picabíntsátaiguëna. Carari pijitaiguë
nacantasita cara nacanqueri: “Nojocajimiro
ora picantaguëti te onganinate”. ⁶Nocogui
noniaguëmi te nangantasitima.
Nopaniaca Jonogaguitequë, nomatsigue-
ngatapë cara niboguë yaca quibatsica.
Icanquena Pabati: “Pijocajineri ira
cantaguëtiro te onganinate; aique quero
aguisëgotëtajari ora icantaguëti”. Nocogui
pigóigue aiti nojocajineri ira cantaguëtiro
quimingari yaca quibatsica.

Aique icanqueri ira emëngari:

—Pingabiritima, págairo pijatasi,
pijáte pobangoquë.

⁷Aro icabiritanaca, iátaji ibangoquë.

⁸Iniaigabaqueri omagaro ira bototaigacha,
iquenganeintasantaigaca iniacandinatai-
guëri Ira Tosorintsi, icantocotaiguëri:

—Aisonori icaninatasanti Tosorintsi.
Icantocotajiri Ica, cara yogaguibegajiri
janaitaguëtsiripague.

Icaimëri Mateo Jesus: “Piguiatanëna”.

(Mr. 2.13-17; Ir. 5.27-32)

⁹Aro yogaganaca Jesus cara nisobiqui
naro, najita Mateo. Iniopëna cara
nocoicotaguëtiri nomatsiguenga
iguireguite, nomagantairi nogobeinga-
rite canta Iromaquë. Icampëna:

—Intsome. Piguiatanëna.

Aro nacabiritanaca, noguiatanëri.

¹⁰Aique náganëri cara nobangoquë
napaaguëri. Yapaiguë basini nagaimane
tojai: irogomere Jesus, aisati ira
natsibataiga coigotantatsi iguireguite
nomatsiguenga ipagantaiguëri
cobeingari Iromaquë, aisati ainta basini
ira cantaguëtiro te onganinate. ¹¹Aro
iniaigapëna bariseogui, yosamitaiga-
përi irogomere Jesus:

—Te ingomeite Ogometimiri.

Yapëgotaiguëri coigotantatsiri aisati ira
cantaguëtaigatsi te onganinate. ¿Pairo
icantobica negaca? Icantaguëtiro ora te
onganinate Iriro.

¹²Cara iquemaigabaqueri bariseo
Jesus, icanqueri:

—Ira cajigatatsi te ingogui
jompiantatsi, carari ira janaitatsi iriro
cogui. ¹³Pijáigue, pinguenguero ora
icanti Tosorintsi, jirai isanguenaquero
Oseas:

Te nongogue póguinari pobira,
pitaguinari; iroonti nocogui
pingábintseri pitimanamireegui
pingantaneintëgotiri.

Te iroro nopocasite nangaimaguëtiri
caninatatsiri, irianti nangaimagueque
ira cantaguëtiro te onganinate arota
ingantaigaima yacaquero.

**Icomantë Jesus paio te iritibiritima
irogomere.**

(Mr. 2.18-22; Ir. 5.33-39)

¹⁴Aique ipocasitaiguëri irogomere
Joan baotisantantsiri, yosamitaigapëri
Ira Jesus:

—Pinetse, nititopianta narogui aisati
bariseo. ¿Pairo te iritibiritaiguema pasi
pogomere?

¹⁵Yotabitaigabaqueri Jesus:

—Pigóiguë ora ametaiga cara irágantë
sërari. Ingaimaiguëri imatsiguenga,
irapajaqueri inganinataiganaque

omagaro. ¿Pairo te iragasërebiritima igaimane? Carari cara iriátë jaanta ira águërone iina, aro iragasërequima, irititaiguëma. Aisati nacanta Naro, aiquenta najátaje, aro iragasëretocovina, irititaiguëma nogomere. ¹⁶Aisati pigóiguë cara pigabitëro inaga piguitsagare, páguëro inagasite manchaguinsisite. Aroca pigabitanti-maró iroraisite, cara ámanaquima ontisaraanaïro oquibe ora inagasite piguitsagare. ¹⁷Aisati pigóiguë ametaïga eïro oguëro irorai oja oba cara irirai imasiquë oïsha. Cara onguëchotanë obaa iritopiganëma imasi, quero paparaata. Quero pairi ogantarone oja oba irinagamasiquë. Igóque cara onguëchotanë oja oba intonganë irinagamasí, oparaatëma obaa. Aisati oca nogometaiquëmi te onganinate ongonaguero ora yametaïga omatsiguenga jirai.

Yoguibegajiro araasetatsiri Jesus; aisati yoganiataïro irisinto Jairo.
(*Mr. 5.21-43; Ir. 8.40-56*)

¹⁸Iroontita inibatasegui Jesus, ipocasiqueri itingomi jorío ira omisantiro pongotsi cara yapatotaïga, yobaticagueritotasipari, icampëri:

—Yamaïca ocamaque nasinto, carari nocogui pijáte cara nobangoquë, potsagatiro piganiataïnaro.

¹⁹Aïto cara yoguiataïguëri Jesus aisati irogomere. ²⁰⁻²¹Aïnta tsinane piraaseti cosamani ocarati 12 osarini, piátasiqueri Jesus itisitaquë potsagapëri, oquianca: “Aroca notisagaitëri onamiquë iguitsagare, aroje iragaguibegajina”.

²²Aro yapisitanaca Jesus, iniobëro, icabëro:

—Pinganinate, nomatsiguenga. Piquemisanquinanta, aroque pibeganaa yamai.

Aïto cara pibeganaa.

²³Aro iátaji, yaretaïgaca ibangoquë itingomi jorío, iniaïgapëri arosonori matsiguenga icobëbensiguero ogamaga irisinto aisati iragaïgaca tojai. ²⁴Aro icantaïguëri Jesus:

—Pijáïgue. Teni ongame oca piracotaïguica, pisamini.

Icabíntsaïgabaqueri Jesus matsiguenga.

²⁵Cara yomisotocaiquëri iïro Jesus, icanaque tsomagui, yágobagotapëro irisinto itingomi, aro ocabiritanaa.

²⁶Aïque iquemocotaguetaiquëri Jesus antagaisati ira timaguetatsi cara aronísati.

Jesus iniacagajiri pite comarajari.

(*Mt. 20.29-34*)

²⁷Cara yogaganaa Jesus, yoguiataïguëri pite sërari comarajari icaibataïgabaqueri icanque:

—Obiro imatsiguengasonori David jirainísati, pingantaneintëgotaiquena naro.

²⁸Icanaque Jesus pongotsiquë, aisati yoguiataïguëri ira pite comarajari. Yosamitaïgabaqueri Jesus:

—¿Pijitaïguëna quero naniacagajimi? Yotabitaïganaqueri:

—Jee, Natingomi. Nigóiguë naro aro pingantaïgainaro piniacagajina caninasati.

²⁹Aro yotsagaïguëri Jesus iroquiquë. Icantaiçgabaqueri:

—Aro nanganquemi ora pijitobitaiquëna.

³⁰Aïto cara iniasantanai. Aisati icantasantaïguëri Jesus:

—Quero picomantiri basinipague: “Iniacagajina Jesus”.

³¹Iïro cantënguicha iáïganaque icomantaguetaiçganaqueri imatsiguenga icanque:

—Iniacagajina Jesus Natingomi.

Inibatagairi Jesus ira te irinibate.

³²Cara isotocaji pite, yamaïgapëri Jesusiquë sërari inancari camagari. Te

irinibate. ³³Aro yomisotocajineri igamagarite Jesus inibatagajiri caninasati. Iraegui jorío niaiguëri Jesus iquenganeintasantaigacari icantobagai-ganaca:

—Jirai te aniaigueri sërari cantacha negaca.

³⁴Carari icantaiguë bariseoegui:

—Imitocoqueri itingomi camagari; iroso ora igátaguëquineri matsiguenga igamagarite.

Icantaneintëgotaiiguëri matsiguenga Jesus, icoque inguemisantaigueri.

(Mr. 6.34)

³⁵Aro iquenagueque Jesus omagaro poeboropaguequë. Yogomeantagueque cara yapatotapinintaiga jorío, aisati icomantëgotantaguequero iragántane Tosorintsi. Aisati yogaguibegajiri tojai janaitatsiripague. ³⁶Iniaiguëri Jesus arosonori matsiguenga ira botoibiritari icantaneintëgotaiiguëri, icanque:

—Tojai itsipiriaiguë, ijocaigaca aisati icantaigari ibega oisha ira te irine omisantirine.

³⁷Aique icanqueri irogomere:

—Aisati, icaegui icantaigaro tojai oguitso panguirintsi, carari te irine tojai ira obiguitirone. ³⁸Pomanocotiri Pitingomi iragátaiiguëri tojai comantantatsiri iriáiguë, inguemisanta-cagaiiguëri matsiguenga.

Jesus icoigaiiguëri irogomere.

(Mr. 3.13-19; Ir. 6.12-16)

10 ¹Aique icoigaiiguëri Jesus ira irogomere icarati 12. Ipaiguëri itasorintsi ora irojogantaguequimari camagari quimingari. Aisati ipaiguëri iragaguibegajiri iraegui janaitaguetatsi.

²Ainta irogomere icarati 12. Iritsita Simón aisati ijita Peroro, aisati Antiris ireinti Peroro, aique Santiago itomi Sebereo, aisati Joan ireinti Santiago.

³Aique ainta Jeripe aisati Baritoromé; aique Tomás aisati naro najita Mateo ira coigotantatsiri; aique Santiago itomi Arijeo, aisati Tareo; ⁴aique Simón ira nintasantiro ibaísite aisati Joras Cariotisati ira ágaganterí Jesus.

Igátaiiguëri irogomere Jesus cara ingomantagueantë.

(Mr. 6.6b-13; Ir. 9.1-6)

⁵Aro igátaiiguëri Jesus iraegui irogomere, icantaiguëri:

—Quero piáigui basiniatiquë matsiguenga cagari jorío, querootisati piáti cara itimaigui Samariasati.

⁶Caraanti pijáiguë joríojeguiquë ira naniaiguë cantaca oisha te irine omisantaiguërine. ⁷Atiraca pijáiguë pinguenguitsataguetiri pomatsiguenga: “Pënibaque orequima cara iragántëri ira quemisanqueri Tosorintsi”. ⁸Piguibegajiri ira janaitaguetatsiri, piguëtetairi ira iribatsasetaga, pijocajineri matsiguenga igamagarite. Tojai nacábintsaiguëmi, carari te nongoicotimi. Yamai atsi obirojegui, pingábintsaigueri matsiguenga quero picoicotiri cara pomitocotaiiguëri. ⁹Quero páganë piguireguite, ¹⁰querootisati páganë pitsaguine, querootisati páganë pite piguitsagare, querootisati pisapatote querootisati pigotiqui. Caninataque imasitaiiguëmi poperi ira quemaigaba-quemi aisati ora pingogaiguë. ¹¹Cara piquequima poeboroquë, pingogopëri quemisantasantsiri, pintiomotiri iriro irooti cara pigaganëma basiniquë poeboro. ¹²Cara pingapë pongotsi, piniacaninatapëri ira timatsi cara, pobetsatapëmari caninasati. ¹³Aroca iraniacaninataigabaquemi iriro, pomanocotiri Tosorintsi ingábintseri casintaro pongotsi, carari quero ca iniacaninataigabaquemi, quero picantiri

Tosorintsi icábintsiri. ¹⁴Queroca iniacaninatobëmi, querootisati iquemisantobëmi, popotetanineri pojongabatsari pisapatotequë, aro pigaganëma. Pingantiri: “Tenta pinguemisantobëna, aiquenta iratsipiriacaquemi Tosorintsi”. ¹⁵Aisonori nacantasantaiguëmi: itsipiriaguëro Soromasati aisati Gomorasati, carari aiquenta cara ingomantëgotaiquëri matsiguenga Tosorintsi iratsipiriacagasantaiquëri iraugui te iraniacaninataiga-baquemi.

Icanqueri irogomere Jesus: “Aiquenta inguisaiguëmi matsiguenga”.

(Mr. 13.9-13; Jr. 12.2-13; 21.12-19)

¹⁶Përosati icomantaiguëri irogomere Jesus:

—Yamai nagátaiguëmi, carari picantari oisha ira nagáque cara cobeingariquë. Tojai iratsipiriacaquemi tsoengatsiri. Pinguengasantaiquaniquima, pingante ora caninaro. Quero pitsipiriacaguiri pomatsiguenga. ¹⁷Pigamemari matsiguenga. Irágaiganaquemi catinasati pitingomipaguequë, iratsipiriacaguëmi. Aisati irágaiganaquemi matsiguenga cara yapatotaigaca iripasataiguëmi. ¹⁸Cara irogóiguëca piquemisanquina, irágaiganaquemi cara itingomipaguequë. Aro pinguenguitsato-coquina pigótacaguinari basiniati matsiguenga cagari jorío ati ongantima nagabisaicotajiri cara inguemanquena. ¹⁹⁻²⁰Cara irágaiganaquemi quero piquenga quero picanti: “¿Pairoroco nanganqueri?” Irogomeantëmiro Isëre Tosorintsi ora pinganque. Quero pigótasita obirojegui ora pingomantë carari onibataquemi Isëre Tosorintsi. ²¹Aiquenta tojai inguisëgotaiquëna matsiguenga. Paniro irácagantëri ireinti irócagantëri, basini irócagantëri iraisati itomi, aisati basini irócagantaguequeri

ira casintaigari. ²²Piquemisantaiquë nanta, inguisaiguëmi matsiguengajegui, carari quero pijoquiro cara piquemisanquina. Aroca përosati pinguemisanquena nagabisaicotaiquëmi nágaiganaquemi cara Jonogaguitequë pintiomotai-gapëna.

²³—Cara inguisaiguëmica iraugui timatsi patiroquë poeboro, aro pisiganëma, pigaganëma basiniquë poeboro. Aisonori nongomantaiguëmi oca: quero piátaguëti omagaroquë poeboro cara itimaiguë joríopague queroquerai nipocaji Naro, Naronta paniënguicha cara Jonogaguitequë, nomatsiguengatapë. ²⁴Quero ibatiri ira ogometiri irogomere. Querootisati ibatiri ira meratari iromerataga. ²⁵Aisati irogomere inganquima ira ogometiri, aisati iromeraro ibega ira meratari. Aro yamai tojai iguisaiguëna omatsiguenga ijitasitaiguëna Naro Berisebó itingomi camagari. Piquemisanquinanta, aisati inguisaiguëmi, irajitasitaiguëmi pairiraca, ²⁶carari quero pitsorogaiguiri. Yamai aiti tojai ora te irogóiguero, carari aiquenta irogóiguë omagaro cara Naro Pitingomi aisati obirojegui nogomere caninari. Aisati irogóiguëro ora icantaguëti antagaisati matsiguenga te onganinate. ²⁷Yamai patiro nocomantaiguëmi obiro, te irogóiguero tsoengatsiri, carari aiquenta pigótacaguëri. Yamai nimánabecaro, carari aiquenta pingomantasantaiguëri antagaisati oca nacanquímica. ²⁸Ainta coguënguitsine iróguimi, carari quero pitsorogaiguiri quero ronta icantimi igátimi cara Sharincabeniquë. Irianti pintoroque Tosorintsi: ingoqueca Iriro iróguimi aisati iragáquemi Sharincabeniquë. ²⁹Pinetse, pigóiguë ipimantagani tsimiripague iraugueri matsiguenga, carari teca iranintacaguiri Pabati Tosorintsi quero icami paniro tsimiri.

³⁰Aisati igótiro atiraca ocarati piguisi, igótasantëro. ³¹Pinetse. Tojai pobataiguëri tsimiripague, tojai iquengasëretaiquëmi Tosorintsi. Iroero quero pitsoroguëti. ³²Aroca pinganqueri matsiguenga: “Ira Jesoquirisito Natingomi”, aique cara Jonogaguitequë, nanganqueri Pabati: “Itingominquena iriro, nomatsiguengatacari”. ³³Carari pinganquerica matsiguenga: “Cagari Jesus Natingomi”, aisati canta Jonogaguitequënta, nanganqueri Pabati: “Tenta intingomintina iriro, iroero te nogótaguëtiri iriro Naro”.

“Popomirintsibentiri Quirisito”.

(Mt. 16.24-25; Mr. 8.34-35; Ir. 9.23-24; 12.49-53; 14.26-27)

³⁴Aisati icanë Jesus:

—Quero pijitasita cara nipoque irágacaninatobagaiguëma omagaro matsiguenga. Quero yágacaninatobaga. Nipoque nanganqueri iroonti inguisabacagaiguëma. ³⁵Nipocasique iroonti inguisasëretiri sërari iriri, onguisasëretiro tsinane oniro, onguisasë retiro tsinane aguiro, ³⁶inguisasëretiri sërari imatsiguengasonori. ³⁷Pigóiguë caninataque pinintaiguëri piri aisati piniro, carari caninatasantaque pinintasantina Naro. Queroca pinintasantina Naro, quero naniacananatimi obiuro. Caninataque pinintaiguëri pitomi aisati pisinto, carari caninatasantaque pinintasantina Naro. Queroca pinintasantina Naro, quero naniacananatimi obiuro. ³⁸Nocogui pingantanaro omagaro ora nongocaquëmi irooti cara pingamobiquina. Pinintica piguiatanëna pinguemisasantantina, aro pinatanëro pigorosite, quero picantanonta obiati. Cara inguisatsataiguëmi matsiguenga aroquenta piquemisanquina, queroca popomirintsibentina obiuro, quero naniacananatimi Naro. ³⁹Aroca

pingábintsasantëma obiati yamai, pitsipiriasantanë aiquenta. Carari pinguemisasantantina yamai, irooti cara iragamagaiguëmi pomatsiguenga, aiquenta pintiomopëna Jonogaguitequë, pintimasanotapë caninasati.

⁴⁰Antagaisati ira ágacaninataiguëmine obiuro, irágacaninatëna Naro aisati. Ira ágacaninatënane Naro, aisati irágacananatëri Pabati Ira agáquina. ⁴¹Cara irogóquímica obiuro comantëgotëri Tosorintsi, irágacananataigabaquëmi, aro imëri iriro Tosorintsi aisa ocanta imëmi obironta comantantatsiri. Aroca irágacaninatobëmi caninasati obironta caninari, imëri Tosorintsi aisa ocanta imëmi obiuro. ⁴²Aisati cara irogóquímica piquemisanquina, iroero imëgotaguë quimi nija catsingajari, iraniaqueri Tosorintsi imëri aroquenta icábintsabaquëmi obiuro.

Iroero oca yogomequeri irogomere Jesus.

Joan igáqueri irogomere iraniaqueri
Ira Jesus.

(Ir. 7.18-23)

11 ¹Aro, cara itsonquero Jesus yogometaiguëri irogomere icarati 12, yogaganaca cara poëboropaguequë. Yogometaguequeri ira timaigatsi cara aisati icomantagueiguëri. ²Aroque yomianquengani Joan cara iromingamentoquë. Yamai cara iquemocoqueri Jesus ora icantagueque, Joan igátaiguëri irogomere:

³—Pijátasitaiguëri Jesus, posamitaigapëri: “¿Obiuro Agabisaicootatsiri ira noguiaque, basinico naguiaiguë?”

⁴Aro yaretaigapari Jesus yosamitaigapëri. Yotabitobëri Jesus:

—Popiganajima, pingomantapëri Joan omagaro oca piniaque aisati ora piquemaque. ⁵Pingantiri cara inianai comarajatabetachari, yanëitanai

carancaratatsi, ibeganaa iribatsasetaga iquëtetanai; iquemaiganaji maguemitari, icaniatanai camabitachari, iquemisantaigabaquero Caninaro Nibarinti ira coguitiacha, yogabisaicotaigairi Tosorinti. ⁶Yoganasëretai-guëri Tosorinti iraegui te iritsoengüena, te ingomëtina.

Jesos inibacananatëgotëri ira Joan.

(Ir. 7.24-30; 16.16)

⁷Cara ipiganaja irogomere Joan, aique inibatëgotëri Joan Jesos. Yosamitaigabaqueri iraegui botoibiricari;

—Caní piátaiguë cara tera ontimingani, piquemisantaiguëri Joan. ¿Pairo piábiritaiguë? Pigóiguërinta iriro caninari sërari, iquemisantasantërinta Tosorinti. Isintsisëreti. Cagari iriro icantaro choco ora posebati coguentima aiquero yaca aiquero cara. ⁸¿Pairo piátasitaiguë? ¿Pinaquericico iquitsagaca caninasati? Teni. Pigóiguë cara ira quitsagatacha iguitsagare caninaro sibitaro itimaigui cara ibangoquë itingomi. ⁹¿Pairo piábiritaiguë? ¿Teco pigóiguëri iriro comantanquero Irinibare Tosorinti? Aisonori ora nangantaiguëmi ibataiguëri basiniegui igomantantatsirite Tosorinti. ¹⁰Irirori sanguenatëgotënguicha jirai cara ingantocopëna Naro:

Icanë Tosorinti: “Notomi, aiquenta nagáqueri ira obatacuemine, ingomantaigapëri imatsiguenga: ‘Aique naro coraque Natingomi. Piganinataigueneri paneingomento’”.

¹¹—Nacantasantaiguëmi ora aisonori, ainta tojaisonorori comantantatsiri, carari noguibatëri Joan, ira baotisantantatsiri. Irironta ogótasantëri Tosorinti, ibataiguëri basini matsiguenga. Carari antagaisati imaiguëmari Tosorinti, intingomintasantaiguëmari, irobotasan-

taiguëri ira Joan, irogótasantanëri Tosorinti. ¹²Jirai icomantagueque Joan; yamai nocomantagueetaiganaquemi Naro. Iroso pigóontaiganacari Tosorinti. Yamai icogasantaguëri tojai matsiguenga cara iragabisaicotajiri Tosorinti, inganaque iragáantanequë, intingomintaiguëmari. ¹³⁻¹⁴Jirai antagaisati comantantatsiri iquenguitsatocotaiguëri Quirisito, aisa icanta Moisés icomantëgotëri. Icantaguë: “Queroquerai ipoqui Quirisito, irobatacuqueri Erías”. Aique yamai ipoque Joan. Irroso aisati icampari ibega Erías. Pijitaigue cara imoncarapëro Joan Sanguenari. ¹⁵Aítica piguemita ora piquemanta, pinguemisantiro ora nocomantimi.

Caninasati inibatëgotëri Joan Jesos.

(Ir. 7.31-35)

¹⁶Aisati icantaiguëri matsiguenga Jesos:

—Aisati picantaigari janequipague imaguimpitaigui saatëriquë icanqueri basini: ¹⁷“Natamporatabeca carari te piguiataigüena; nosoncatabitaca carari teatisati piguiatina; nacántatabitaca nogasëretabeca, carari teatisati piragasëretaguema”. ¹⁸Pinetse, picogaigabitaca ingantaiguërome pomatsiguenga pairoraca picocuqueri. Pinaigabaqueri Joan itica aisati te iróguima piari, aro picantocotaquetasi-taigari: “Oo, inancari Joan camagari, irroso ititaguëca”. ¹⁹Aro nopaniaca Naro Jonogaguëtequë, nomatsiguengatapë; te natitima, aisati nógacaro piari. Aro picantocoiguëna: “Tojai yapasanti Irroso, aisati Irroso singuitachari, imatsiguengatacari ira coigotantatsi aguireguite aisati itsibataigari ira cantagueetaigatsi ora te onganinate”. Carari igóque Tosorinti cara icanque Joan caninasati aisati Naro nacanque caninasati antagaisati ora

icocaquena; aisati omagaro quemisantina, irogóiguëro caninaro ora icocaquena Pabati.

Iroero oca icantaiguëri Jesus.

Iratsipiriaiguë antagaisati ira tsoenguiri Ira Jesus.

(Ir. 10.13-15)

²⁰Aique icomantëgotaguëri Jesus ira niaigabitari cara itasonganti carari përosati itsoingaguëro. Icanque:

²¹—¡Tojai pitsipiriaiguë obirojegui, Coraseisati! ¡Tojai pitsipiriaiguë obirojegui, Betsairasati! Tojai piniaigabitëna cara nitasongagueanti, carari te pingantëmatima yacaquero, te pinguemisantina. Carari iraniaquiname cara nitasongagueanti Tirosati aisati Sirósati, inguengasëretaguemame iriro, irojocaguërome ora icantagueti te onganinate, inguemisantaiguëname, imasiniatiquerome imanchaqui aisati irisobicaiguëme samomoguë arota ironijaguëmari imatsiguenga cara iragasërequima. ²²Aiqueta, cara ingomantëgotaguëri Tosorintsi, iratsipiriacaguëri ira Tirosati aisati ira Sirósati tojainta te inganinataigue. Carari iratsipiriasantagaguëmi obirojegui Coraseisati aisati Betsairasati aroquenta piniaigabitobëna cara nitasonganti, carari te pinguemisantina. ²³Aisati obirojegui Caperinaosati pijitasitaigabitaca pijáiguë Jonogaguëtequë, carari pamatobitaigaca obiati përosatinta pitsoingaguëna. Iroero pijátaguëque canta osobinta. Iraniaiguë rome ira Soromasati omagaro iniaiguëro Caperinaosati, inguengasëretaguëmame iriro, querome itsongaquirime jirai Tosorintsi, inëme iboeborote irootime yamai. ²⁴Aiqueta Tosorintsi iratsipiriacaguëri ira Soromasati aisati, carari tojai iratsipiriasantagaguëmi obirojegui Caperinaosati.

Aroque inibatëri tsoengatsiri Jesus.

“Popocasitina”, icanque Jesus.

(Ir. 10.21-22)

²⁵Aique yamanocoqueri Tosorintsi Jesus, icanqueri:

—Pabati, Obiro caninarisonori.

Nacarasiaquemi Obironta Itingomi antagaisati Jonogaguëtesati aisati omagaro quibatsisati. Ainta cantasitacha: “Nigótasanti naro”, carari pimánopitaiguëri ati picanta Obiro aisati ati ongantima pigabisaicotaiguëri. Irianti pigótacaguëri ira quemisanquena ira te inguengasitima igótasantëmi iriro. ²⁶Caninataque piganinataiguëri iriro, picoquenta pigótacaguëri.

²⁷Aroque icanqueri Iriri, aique icantaiguëri imatsiguenga Jesus:

—Ira Pabati ipëna omagaro igótacaquina antagaisati. Paniro igótasanataquina Naronta Itomi; te irogótocotina basini matsiguenga. Teatisati pairi ogótirine Iriro. Paniro nigótiri Naro, Naronta Itomi. Irianti Tosorintsi nigótasantacaguëri ira nogometaguë. ²⁸Cara pitsipiriaiguëca, aisati cara omomirintsitomoquimi pairoraca, popocasitina Naro, pingomantinaro antagaisati. Aro nangantaneintëgotaguëmi, nomagoriasëretaguëmi arota quero opomirintsitomotaguëmi aisati. ²⁹Pinguemisantina Naro, pingoguro ora nogomeantane, aro tojai nangábintsai-guëmi nantsibatëmi tenta nanguengasantima Naati. Nanintasantë minta, nomagoriasëretaguëmi. Aroca pinguemisanquina aro tojai nangantaneintëgotaguëmi, nomitocoquemi pabequero pairoraca. ³⁰Quero nimeratimi quero nobomirintsitimi, quero natsipiriaguëmi iroonti nomitocotopiantaguëmi.

Yogometocoquero sábaro Jesus.*(Mr. 2.23-28; Ir. 6.1-5)*

12 ¹Aro basiniquè sábaro íaiguè
Jesus aisati irogomerejegui cara
panguirintsisiquè. Itasegaiguè
irogomere, yágaiguèro oguitsoterei
tirigo yapaiguèro oguitso. ²Cara
iniaigapèri bariseo, icantaigapèri Ira
Jesus:

—Pinetseri pogomere. Yamai sábaro
iroonti cataguiteri comagoriantague,
teni ongomeite yamai irobiguitanti-
maro.

³Yotabitobèri Jesus;

—¿Teco pinibatapinintiro Sanguenari
ora comantègotaiguèri David aisati ira
itsibata cara jirai págaiguèri itasegane?

⁴Aro icanaque ibangoquè Tosorintsi,
icampèri saseriroti: “Nitasegaiguèni”.
Aiti pan ora yobetsiquineri Tosorintsi
aique poguèngani catingsatiquè Iriro.
Te iranintacagaiguèri irapero
matsiguengapague; irianti saseriroti
paiguero. Carari ícábintaigabaqueri
saseriroti, ipaigabaqueri. Aro yapaigapè
David aisati ira itsibata. Yamai te
pingante: “Te onganinate irape David”,
aro ¿Pairo picantobique yamai: “Te
onganinate irape icaegui”? ⁵Aisati
isanguenaque Moisés:

Quero pitarobacaati sábaroquè.
Pigóiguè antagaisati sábaroquè
íátopianti saseriroti cara ibangoquè
Tosorintsi intapinintaiguè, carari te
pinguésègotimari iriro. Piniacaninatai-
guèri. ⁶Nacantaiguèmi cara ainta yaca
Ira obaquero ibango Tosorintsi. ⁷Teco
pigóiguero oca Sanguenarica jirai:

Icanque Tosorintsi: “Te nongogue
póguinari pobira, pitaguinari;
iroonti nocogasanti pingantanein-
tègotanèri pomatsiguenga”.

—Pinguemisanquerome oca icanque
Tosorintsi, querome picantocotirime

icantagueti te onganinate icaegui
nogomere obiguitèro tirigoguitso.
⁸Nopaniaca Naro Jonogaguitequè,
nomatsiguengatapè cara niboguè yaca
quibatsica. Iroro nocomantègotaguè
quero sábaro pairoraca anganque
sábaroquè.

**Cara sábaroquè yogaguibegajiri ira
camabocori Jesus.***(Mr. 3.1-6; Ir. 6.6-11)*

⁹Aro yogaganaca, icaigapèro pongotsi
cara yapatotaiga jorío. ¹⁰Ainta sèrari
camabocori. Aintasati bariseo
yosamitobèri Ira Jesus:

—¿Caninataquero piguibegajiri ica
camabocorica sábaroquè?

Icogaiguè bariseo cara iragaguibega-
jiri arota ingantocotasiqumari Jesus:
“Itarobacaati Jesus sábaroquè, te
inganinate tenta inguemisantiro
isanguenare Moisés”. ¹¹Aro
yotabitaiguèri Jesus:

—Pinetse, aroca sábaroquè imariaque
omoroquè poishate, ¿Queroco págairi,
pomisotocajiri? Caninataque
pingábintsairi. ¹²Aroca pingábintsairi
oisha sábaroquè, ocaninatasanti
angábintsairi matsiguenga sábaroquè.

¹³Aique icanqueri ira camabocori:

—Pintimagonaguitima pobaco.

Aro itimagonaguitanaca, ocaninatanai
ibaco pibega basini. ¹⁴Iniaqueri bariseo,
iguisaneintaiganaqueri. Íatagueque
yosamitobagaigaca:

—¿Ati anganqueri Jesus, agamaguèri?

**Jirai ora Sanguenari
ocomantègotèri Jesus.***(Mr. 3.7-12; Ir. 6.17-19)*

¹⁵Cara igóque Jesus cara icogaiguè
iróguiri, yogaganaa yoguiataiganaqueri
tojai matsiguenga. Aintasati tojai
janaitaguetatsiri ira yogaguibiaguetaji
Jesus antagaisati. ¹⁶Aro icantaiguèri:

—Quero picomanti: “Yogaguibegajina Jesus”.

¹⁷Cara icanque negaca, imoncaraquero ora icomantëgotëri jirai comantantatsiri jitacha Isaías. Isanguenaquineri Irinibare Tosorintsi cara icanque Iriro:

¹⁸Pinetseri Quirisito Ira nogoigane inganque antagaisati nococaquero. Tojai nanintasantiri, tojai naniacaninatëri. Nagáquineri Nasëre coshoni oguëri, omitocoquero. Ingomantaiguëri basiniati matsiguenga, cagari jorío, ora caninaro aisati ati ongantima ora naganinatantimari omagaro. ¹⁹Quero ipëgatsataro pairoraca; quero icaimasita; quero iquemacagari matsiguenga. ²⁰Quero itsipiriacaguiri agasëretachari ingantaneintëgotëri. Querootisati yamatobitiri ira cogatsi irogótina. Përosati ingábintsantë, irooti cara intingomibintaiguëri antagaisati matsiguenga caninasati. ²¹Irogótocoquero basiniati matsiguenga cara iragabisaicontë Iriro. Aisati intingomintaigabaquimari Iriro.

Iro ro oca icantocoquero Tosorintsi jirai.

**Ira bariseo icantocotaguetasitaigari
Ira Jesus.**

(Mr. 3.20-27; Ir. 11.14-23; 12.10)

²²Aique yamaigapëri Jesus poro sërari inancari camagari; te iranee, teatisati irinibate. Yogaguibegajiri; iniacagajiri aisati inibatagairi. ²³Iquenganeintasan-taigacari antagaisati ira niaiguëri. Yosamitobagaigaca:

—¿Iriroco Quirisito, imatsiguenga David, Ira oguiaiguë?

²⁴Carari yotabitaiganaquero bariseopague:

—Imitocoquero Berisebó aisati ijita Satanás, itingomi camagarijegui. Iro ro ijogantaguëcari camagari Ica.

²⁵Aro igóque Jesus ora iquengasëretai-gaca, yotabitaiganaquero:

—Aroca irógobaguimame matsiguenga timaigatsi quibatsiquë, ¿Queroco ipoguirobaga? Aisa icanta iraequi timaigatsi poeboroquë; aroca inguisabacagaiguëma quero përosati itimaigui cara. Aisa icanta matsiguenga pongotsiquë; quero ca iquengaiga, querootisati itiomotobaga përosati.

²⁶Tesonori iromitocotina Satanás. Ipëgatina. Pinetse: arome iromitocoqui-name Satanás cara nojoquero jaanta camagari, ¿Queroco itsongabacaga iriati Satanás? ²⁷Aisati irirome omitocoquinane cara nojoquero camagari, ¿Iriatisatico camagari omitocotaiguëri pogomere cara ijoquero camagari iriro? Iriro ogótacagaiguëmi pogomere cara pamatobita obiati. ²⁸Carari Iroonti Isëre Tosorintsi omitocoquina cara nojoquero camagari, ¿Teco iro ro pigóntaiguema ainta yaca Tosorintsi, icogabeta iragáante, icogui pintangomintimarime? ²⁹Aintaca cogatsi ingositiri sintisiri, ¿Teco iritsita águërine, iraguëshotë queri? Aique irágopitëri pairorapague-raca queronta ipëgatari casintaro.

Querome nagobeiri Satanás, querome nojoquiri camagari. ³⁰Ira te inguemisantina, iguisaneinquina, irianti iquemisanti Satanás. Aisati ira te iraguiatina, te iromitocotina.

**Jesus icomantëgotëri ira
cantëgotaguetasitaro Isëre Tosorintsi.**

(Mr. 3.28-30; Ir. 12.10; 6.43-45)

³¹Aisati icantaiguëri bariseopague Jesus:

—Tosorintsi ingábintaiguëri antagaisati ira cantaguëtiro te onganinate aisati omagaro ira

nibataguetasitacha te ongemeite, irojocajineri, quero iguisasëretajiri. Carari quero icábintsiri ira cantëgotaguetasitaro Isëre Tosorintsi.
³²Nocomantaiguëmi cara nopaniaca Jonogaguitequë, nomatsiguengatapë cara niboguë yaca quibatsica, carari ingábintaiguëri Pabati antagaisati ira nibatocotinane ora te ongemeite. Quero icábintsiri ira cantëgotaguetasitaro Isëre. Quero icábintsiri yamai, querootisati icábintsiri aiquenta. Iroonti iratsipiriaca-gaiguëri përosati. ³³Aroca ocaninati anchato, aisati caninaro oguitso; teca onganinate anchato, querootisati ocaninati oguitso. Aroca piniaquero oguitso, ¿Teco pigóte ocaninatica ora anchato? ³⁴¡Obirojegui cantaquibi marangue! Te pingomeitaigue; tiguëti ongantima pigóte pinibataigue caninaro inibatinta matsiguenga ora iquengasëretata. Te onganinate pinguengasëretai-guema, iroto te onganinatuëte ora pinibataigui. ³⁵Ira caninari sërari iquengasëretapinintiro caninaro, iroto icantaguëtiro ora caninaro. Ira te ingomeite iquengasëretapinintiro ora te onganinate; iroto icantaguëtiro ora te onganinate. ³⁶Aiquenta ingomantëgotai-guëmi Tosorintsi: inguiancagaiguëmiro antagaisati pinibarepague ora pinibatasi-taiga yamai. ³⁷Ocaninatica ora pinibataigui, aro iraniacaninataiguëmi, carari teca onganinate pinibare, inganquemi: “Aiti pinibataguëti te onganinate, tojai pitsipiriaque”.

Jesús icomantëgotëri tsoengatsiri iraegui cogatsi iraniaiguëro itasorintsite.
(Mr. 8.11-12; Jr. 11.29-32, 24-26)

³⁸Aique icantaigabitacarí bariseopague aisati irapague ogomeantiro Sanguenari:
 —Ogomeantatsiri, nocogaigui nanetsëmi pitasonguinaro pairoraca arota nogótimi Obiroca Quirisito.

³⁹Yotabitanëri Jesús:

—Te pinganinataigue tojainta pitsoingauguëri Tosorintsi. Quero nitasongomotaiguimi ora pigóontëname. Aiti ora icanque Jonás: pinguengasëretiro cara yosiguina nibega Naro, aro pinguemisantina. ⁴⁰Jirai ainta iguibeguente sima iniguëri ira Jonás omaganiro canianiro. Maba cataguiteri inë isegotoquë aique ijocajiri sotoquë. Aisa nanganquima Naro, nangamaque-nica, natiacquima, maba cataguiteri ninë omoroquë quibatsi, aique nangabiritanaima. ⁴¹Aiquenta, cara ingomantëgotai-guëmi Tosorintsi, ingabiritaiguëma Nínebesati ingantocotaiguëmi inganque: “Aiti picantagueiguë obirojegui te onganinate. Jirai naquemisantaigabaqueri ira Jonás nopasiniatica nojocaigairo ora te onganinate, nacantaigaa yacaqueroca. Obirojegui, piniagabaqueri Agabisaicoontatsiri, tojai ibaqueri ira Jonás Irironta Atingomi, carari te pinguemisantaigabaqueri. Inguisasantaguëmi Tosorintsi”.
⁴²Aisati jirai ainta tsinane itingomi omatsiguenga, Sebasati. Cara opaniaca parigoti, oquemocoqueri Saromón cara tojai igóque iriro, aro piátasiqueri jaanta oniopëri oquemisampëri. Yamai aintana Naro obirojeguiquë, nobaqueri Saromón carari te pinguemisantaiguena. Aiquenta, cara Tosorintsi ingomantëgotai-guëri antagaisati matsiguenga, ongabiritanaima ora tsinane Sebasato ongantocotaiguëmi: “Picantasantaguetaiguëro obirojegui te onganinate cara ipocasitaiguëmi Ira Agabisaicoontatsiri, carari te pinguemisantaigabaqueri Iriró. Inguisasantaguëmi Tosorintsi”.
⁴³Obirojegui jorío picantaigari ibega sërari inancari camagari quimingari. Ijocajiri camagari sërari, yogabisaicotaja iriati. Íatagueque igamagarite cara piriaguiteroquë quibatsi. Icogabeca iromagoriaque, carari tiguëti

iromagoriaque. ⁴⁴Aique iquianca; “Nopiganajima nobangoquë, cara sërariquë cara nopaniaca”. Ira sërari icantaro ibango camagari. Aro ipiganaja inio però ositaga otarogaga obetsicaga irisobicomento irisomaminto, antagaisati. ⁴⁵Aro iátasitaiguëri basini camagari quimingarisonori icarati 7. Icampëri: “Intsome antime nobangoquë”. Aro yagobiaiguëri icasëretaigapëri sërari. Jirai itsipiriaque sërari arosata; yamai inantasantacari camagari. Yogatsitasantata. Aisa picantaiga obirojegui. Jirai pitsipiriaigabitaca tenta pigóigue. Yamai piniabetobëna carari te pinguemisantina. Iroro pigatsitaguëtaiguëma, pitsipiriasa-noiguë.

Jesos imatsiguengataigacari antagaisati quemisantaiguëri.

(Mr. 3.31-35; Ir. 8.19-21)

⁴⁶Iroontita iquenguitsati Jesos, icomantaguetaiguëri ira botoibiritaigapari cara pongotsiquë, aro pipocasiqueri iniro Jesos, aisati ireintiegui. Ainta sotoquë, ocaimagantaigapëri.

⁴⁷Icomantëqueri Ira Jesos:

—Parepa piniro, aisati pirentijegui.

Ainta sotoquë; ocoguini onibatimi.

⁴⁸Yotabitanëri Jesos:

—¿Pairoroco inato? ¿Pairiroco

igueegui?

⁴⁹Aro ijigotaiguëri irogomere, icanqueri:

—Icaegui nogomere, irianti igueegui,

aisati iroontiegui inato. ⁵⁰Pairiraca cantatsi ora icocaqueri Tosorintsi Ira timatsi Jonogaguitequë, irianti nomatsiguengasonori: najitaiguëri igue, aisati tsio, aisati inato.

Icomantëgotëri ira panguitatsiri Jesos.

(Mr. 4.1-9; Ir. 8.4-8)

13 ¹Irooti cataguiteri isotocaji Jesos cara pongotsiquë, iáque cara onamijaquë angaare, isobiaque.

²Yoguiataiganaqueri irogomere, aisati yapatoibiritaigapari tojai matsiguenga. Iniaquero Jesos pitotsi otsatocotaga; aro yotetanacaro isobiaque. Iraegui matsiguenga però cara inaiguë onamijaquë. ³Aro tojai yosiacagantaguecaro quingabaguientsipague. Icanque:

—Iáque panguitatsiri imiongaguitaguequero oguitsopague tirigo iritoganequë. ⁴Opariguitagarantapë arosata oguitso abatsiquë; aique ipogopë tsmiripague, yapapëro oguitso.

⁵Basini oguitso opariguitagarantapë mopësiquë cara te ine tojai quibatsi aropirigasata arosonorinta mopë osobibatsaquë. Omanaanti piabitanaca;

⁶cara ijonogatapë paba yogasiguiricapëro tenta ine oparipague; aro ocamaguetanai. ⁷Aisati basini opariguitapë cara totseisiquë; aro piabitanaca carari pomatobairo totsei, te ine oguitso tirigo. ⁸Basini opariguitagueque cara caninabatsariquë quibatsi, iroro caninatënguitsi. Pianë piquibianë caninasati pinanë oguitsopague. Aiti panguirintsi oguitsotanë ocarati 100, aisati basini ocarati 60, aisati basini ocarati 30 oguitso. ⁹Aitica piguemita ora piquemanta, pinguemisantiro ora nacantaiguëmira.

Pairo yogomebirique Jesos quingabaguientsiquë.

(Mr. 4.10-12; Ir. 8.9-10)

¹⁰Aique yosamitaigapëri irogomere:

—¿Pairo pogomebiriantaigari quingabaguientsi ira basinipague? Te inguemaiguemi ora picantaiguëri.

¹¹Yotabitanëri Jesos:

—Nocogui pigóigue ati icanta Tosorintsi cara igáanti, carari ira matsiguengapague te nongogue irogóigue irirojegui. ¹²Aintaca igótabeca, aro nogótacagasantëri. Carari basinipague, te ingogue inguemisantina,

quero iquemaiguina. Quero nogometiri iriro catingasati. Aisati nágabitsaqueri nobegopitëri ora igótabeca. ¹³Iroso nogomeantaguëcari quingabaguientsi nosiacagantineri tenta iraninte irogóigue. Inetsabetaiga carari te iranee, iquemaigabitaca carari te ingueme, te irogótaigabaquero ora nacantaigabitacari. ¹⁴Jirai isanguenaque Isaías comantantsiri, isanguenatocotaiguëri icaegui matsiguengaca:

Icanque Tosorintsi: “Pinguemaigabibitëmaro Nanibare, carari quero pigótobëro; pinetsabequima ora noniaguëmira carari quero piniasantaiguero. ¹⁵Te pinintaigue pigóigue aisatime pinganquima te ine pisëre; iroso quero piquengasëretaguëta. Tenta pinintaigue pinguemiro, irroso oshabituëpëmi piguemita, quero pigóigui. Querootisati piniasanti tenta pinintiro. Queronta pipocasitina, quero nogabisaicotajimi”.

—Ocarí oca icomantëgotaiquëri jorío jirai. ¹⁶Carari obiromo nogomere piniasantaiguero ora noniaguëmira, piquemisaiguina, irroso yoganasëretaguëtaiguëmi Tosorintsi.

¹⁷Nangantaiguëmiro ora aisonori: icogaigabitaca jirai comantantsirijegui aisati caninatatsiri iraniaiguërome oca piniaqueca obiromo. Icogaigabitaca inguemirome oca piquemaiguëca yamai, carari te iraneina teatisati inguemaiguena.

Jesos yoniaguëri ora ocanti quingabaguientsi.

(*Mr. 4.13-20; Ir. 8.11-15*)

¹⁸Aisati icantaiguëri Jesos:

—Yamai noniaguëmiro quingabaguientsi irasi panguitatsiri.

¹⁹Nocomantëgotëro iragántane

Tosorintsi. Ainta quemaigabitacaro, carari te inguemobëro. Aro ipoque camagari yágabitsaqueri nanibare ora iquengaigabitaca. Irroso aisati icantaro pibega oguitso pariaquenguitsi abatsiquë. ²⁰⁻²¹Ainta basini tojai iquemabetobacaro ora nogometiri, icaninabentabecaro, carari cara inguisaneintocoqueri imatsiguenga, te përo cara inguemisantiro nanibare, opomirintsitomotanacari, ijocajiro yomaguissantajiro ora iquemisantabeca tenta irogótasantiro. Aisati icantaro oguitso pariaquenguitsi mopësiquë.

²²Ainta basini tojai iquematsatabecaro nogomeantane, carari iquengasantiro pairoraca inaguetatsi yaca quibatsica, aisati inintasantiro ora yasinta. Irroso te inguemisantaguëtina. Irroso cantaca oguitso pariaquenguitsi totseisiquë ora te onintacaguero ontojaigue, te ine oguitso. ²³Aintasati basini matsiguenga arosatapague iquemisantantobëro ora nogometiri. Përosati iquemisaiguina, icanque antagaisati nococaqueri.

Icantaro pibega oguitso pariaquenguitsi caninabatsarokuë quibatsi, ora tojaiganaquenguitsi. Aiti openguiterei ora inënguitsi oguitso 100, aiti basini cara pinë 60, aisati basini cara ocarati 30 oguitso.

Ocarí oca yoniagantaro Jesos quingabaguientsi irasi panguitatsiri.

Jesos icomantëgotëro tobari te ongomeite.

(*Mt. 13.36-43*)

²⁴Aisati yogomeanti Jesos basiniquë quingabaguientsi. Icanque:

—Nosiacagantaiguëmiro basini. Cara igánti Tosorintsi ocantari ibega sërari panguitiro caninaro tirigoguitso. ²⁵Aro tsitiniriquë isamë irroso aisati iratirite. Cara isamaiguë, ipocasiqueri basini quisaneintirira ira panguitatsiri,

ipanguitaguequineri irootiquë iritogane oguitso tirigoniro ora cantabitaro tirigo. Aique iátaji. ²⁶Aiqueta, cara oquibianë tirigo, onguitsotanë, aique ongonijatanë tirigoniro. ²⁷Aro iniaiguëro iratirite casintaro tirigo, iátasaitaiguëri, yosamitëri: “¿Teco caninaquiroyo tirigoguitso cara pitoganequë? ¿Nega opaniaca ora tirigonirora?”

²⁸Yotabitaiguëri: “Irianti panguiquinaro ira quisaneintina”. Aique yosamitaiguëri iromeraro: “¿Pairoroco picogui nangantaigue? ¿Caninataqueco nasiajiro?” ²⁹Icanque: “Quero yamai. Aiqueta. Aroca pisiajiro yamai pisijatiguiro tirigo aisati. ³⁰Ineta yamai. Ongantimata. Aiqueta, cara osamabinguique, nagátaiguëmi: ‘Irotsita picarataguetaje tirigoniro, piguëshotiro páganëro pitaguiro. Aique pobibinguito-bëro tirigostonori, poguinaroti cara pongotsiquë’”.

Iro ro yosiacagantaiguineri irogomere Jesus.

Yosiacagantëro Jesus oguitso mositasa.
(Mr. 4.30-32; Ir. 13.18-19)

³¹Aiti basini quingabaguientsi yosiacagantëneri matsiguenga Jesus: —Aisati cara iragáantanequë Tosorintsi ocantaro pibega oguitso mositasa ora ipanguitë sërari cara togantsiquë. ³²Ora mositasaguitso iroonti quiripiquiserostonori, carari oquibianë obaquero basini panguirintsi. Ipocai gapë tsmiriripague, yogapëro imagosi otsegopaguequë.

Yosiacagantëro Jesus ora piponganta pan.
(Mr. 4.33-34; Ir. 13.20-21)

³³Aisati basini, iquenguitsataiguëri Jesus:

—Cara itingomibintanti Tosorintsi aisati ocantaro ora piponganta pan. Cara obetsiquëro pan tsinane, águëro

tojai opane tirigo, oconaguëro arosata piponganta pan. Aique oponganë antagaisati.

³⁴Yameca Jesus yogomeantaigari quingabaguientsi ira botoibritaigapari. Iroonti quingabaguientsi inibatantari. ³⁵Imoncaracarero Sanguenari cara isanguenaque comantantatsiri:

Icanque Tosorintsi: “Tojai nosiacagantëneri matsiguenga-jegui nongomantaiguëri ora te irogóigue jirai cara nobetsiquëro quibatsi jiraisonori, irooti yamaica”.

³⁶Aique ijocai ganaqueri Jesus ira botoibritaigacari, icanque pongotsiquë cara yosamitaigapëri irogomere:

—Nocogaiguë pingomantinaro paio ocanti ora tirigoniro ora piquenguitsato-motaiguëna.

³⁷Yotabitanëri Jesus:

—Nopaniaca Naro cara Jonogaguite-quë, nomatsiguengatapë yaca quibatsica. Naro nosiacari ira panguitiro tirigoguitso. ³⁸Ora togantsi ocancaro quibatsi cara atimaigui eiro. Ora oguitso caninaro ocantaigari ibegaiga ira quemisanqueri Tosorintsi. Ora tirigoniro osigari ira quemisanqueri camagari. ³⁹Ira quisaneinqueri panguitatsiri, irianti icantari Satanás. Cara yobiguitanti aisati ocantaro cara otsonquema quibatsi cara nopocaje Naro. Iraegui obliguitatsi irianti ironomire Tosorintsi irisaanganetsite.

⁴⁰Pinguenguema. Yapatotaiguëro tirigoniro, itagaiguëro. Aisa ocanta nanganque aiqueta cara otsonquimaca quibatsi. ⁴¹Nagátaiguëri tojai ironomire Tosorintsi, irapatotaiguëri cara nagáantanequë antagaisati cantaguetatsi ora te onganinate aisati basini ira cantacaqueri quimingari.

⁴²Nojocagantaiguëri cara pamariquë Sharincabeniquë; tojai iratsipiraiaguë

canta, tojai iratsitsiaguitetanë. ⁴³Aique irosanguéguিতৈতানë antagaisati caninataigatsiri inganquimari ibega paba. Intsibataiguëmari Pabati cara igáanti Jonogaguítiquë. Aitica piguemita ora píquemanta, caninataque pinguemisantiro oca nocomantëmica.

Jesos yosiacagantëneri ira quirequi irománaga, aisati imapënequi shaota (ira jitacha périra).

⁴⁴Përosati yogomeque Jesos:

—Cara igáanti Tosorintsi aisati ocantari ibega tojai quirequi irománaga quibatsiquë. Iniasipari sërari, aito cara iquiaque imánanontanaari iriro aisati, te ingomantëgotiri. Aro iáque, ipimantaguequero omagaro ora yasinta, yamanantë quibatsi cara inasegui quirequi. Yamai icaninabenqueri tojai quirequi. ⁴⁵Aisati iragáantane Tosorintsi ocantari sërari manantiri imapënequi shaota caninarisonori ira jitacha périra. ⁴⁶Iniopëri paniro, icaninatasanti ipënatasantaca. Inintasantiri, iroro ipimantaguëquero antagaisati ora yasinta, yamanantëri ira imapënequi shaota.

Yosiacagantëro Jesos siriamentotsi.

⁴⁷Aisati yoniagaiguëri matsiguenga Jesos. Icanque:

—Aisati cara itingomibintanti Tosorintsi ocantaro pibega irisiriamiento sërari yágantari sima. Ijocaguëro angaarequë, inosiquëgotëri yobiriatëgotëri tojai simapague. ⁴⁸Iacaro, aro inosiquëgotaguëri irisiriamientoque cara onamijaquë, isobicaiguë, yágaguetaiguëri simapague caninari yoguëri cantiriquë. Ira te inganinate ijoguequeri. ⁴⁹Aisa ocanta cara otsonquima quibatsi cara nopocaje Naro. Nagáqueri ironomire Tosorintsi irisaanganetsite ingasiriconiatitaguëri antagaisati

matsiguenga caninataguetatsiri. Aique aisati ingasiriconiatiqueri ira te inganinataigue, ⁵⁰irojocaguëri cara Sharincabeniquë cara përosati iratsipiriauë aisati iratsitsiaguitetanë. ⁵¹¿Piquemaiguëro oca nocomantaiguë mica?

Yotabitaiguëri irogomere:

—Jee, naquemaiguëro.

⁵²Aisati icanque Jesos:

—Aroca inguëmisanquena ira ogomeantiro Sanguenari, irogótanëro tojai. Igóquero ora isanguenatagueque jirai, aisati inguëmisanquenaca, irogóque ora nogomeanti Naro yamai. Irogóque ogomeantatsiri ati ocanta cara igáanti Tosorintsi.

Ipiganaja Jesos cara Nasarequë.

(Mr. 6.1-6; Ir. 4.16-30)

⁵³Itsonque Jesos cara yogomeantaro quingabaguirentsi, aique iáiguë Iriro aisati irogomere, ⁵⁴ipiganaja quibatsiquë cara ipaniaca. Icanaque pongotsiquë cara yapatoitaiga jorío, yogomeantapë. Iquenganeintasantaigabacari ira quemaigabaqueri. Yosaminatobaganaca:

—¿Ati icanta cara yogomeanti? ¿Nega opaniaca ora igóque Iriro? ¿Pairo itasangantaguetá? ⁵⁵¿Cagarico Ica, itomi José obetsicaguetatsi mesa, sobicomentotsi? ¿Irorori iniro María? Aisati igóiguëri eiro ireintiegui: Santiago, aisati José, aisati Simón, aisati Joras. ⁵⁶¿Teco aisati ontme iritsiro eiroeuiga? ¿Negaraca opaniaca ora igóque aisati ora icanque?

⁵⁷Aro iguisaneintaiguëri, itsoingaiguëri. Iroro icantaguëtaiguëri Jesos:

—Ainta quemisantaiguëri quinguitsatiro Irinibare Tosorintsi ira paniacha parigotiquë, carari itsoingaiguëri imatsiguengasonori comantantatsiri.

⁵⁸Te tojai iritosongaguete Jesus cara Nasarequë. Tojainta itsoingauguëri imatsiguenga.

Eroris ijiqueri Jesus irianti Joan.

(Mr. 6.14-29; Jr. 9.7-9)

14 ¹Aique iquemocoqueri Jesus Eroris, itingomi Garireasati.

²Icantaiguëri iromerarogui:

—Ira Jesus, iriantijengari Joan baotisantantsiri. Nógagantabitacari, carari najique icabiritaja aisati, iroro itasongantaguëque.

³⁻⁴Aroqueque Eroris yágabitsaqueri iina ireinti jitacha Jeripe; iina ojita Erorías. Icantabecari Joan:

—Te ongomeite págabitsatiri iina pirenti.

Iroto yágagantaguëqueri Joan Eroris yomianqueri yoguëshotiaqueri sogatsaqué coshotsari. ⁵Icogabeca Eroris iróguirime ira Joan, carari itisorogaiguëri matsiguengajegui.

Igóiguë matsiguenga cara Joan icomantëgotëri Tosorintsi. Ijique Eroris: “Aroca nógagantëri, inguisëgotaguë mari matsiguengajegui”. ⁶Aique pareca cataguiteri isantone Eroris.

Icaimaguetaguëri tojai imatsiguenga, yoganinasëretaigapëri. Aro omaninquebintëri osinto Erorías.

⁷Iniacaninatobëronta ora tsinane ira Eroris, aro icanquero negaca:

—Pairoraca pomanaquina, aro nomëmiro. Igóque Tosorintsi cara quero namatobitimi.

⁸Aro ocomantatsaquero oniro, ocantacaquero negaca:

—Nocoguini pógagantiri ira Joan baotisantantsiri, aique pomapënarora iguito cara tsibetaqué aique nomëro inato cara ogóque aisonorica icamaque.

⁹Yogasëreca itingomi cara icantasantëro, aisati cara iquemaiguëri antagaisati igaimane ora icantasantëro

irisintotsari. ¹⁰Aro igáqueri soraro irobatëaquintiri Joan cara iromingamentoqué. ¹¹Aique yapapënero tsibetaqué iguito Joan, ipëro irisintotsari. Iroroque përo oniro. ¹²Ira irogomere Joan ipocaiguë, yágaiganaqueri cara iritijaigairi. Aique iáiguë, icomantaigapëri Ira Jesus: —Yogamaiguëri Joan Eroris.

Yoguibatëro Jesus itasonguëro pan, yomitojaganaquero.

(Mr. 6.30-44; Jr. 9.10-17; Jn. 6.1-15)

¹³Cara iquemaque Jesus aroque icamaque Joan, iátacagaiguëri irogomerejegui canta tenta ontimengani. Yotetanaca pitotsi. Aisati cara iquemocotaigabaqueri matsiguengajegui ijocaiganaquero iboeborotepague yoguiataiganaqueri cara onamijaqué. ¹⁴Cara yagatocotaigapë Jesus, iniaigapëri tojai matsiguenga ira aguiagaseguiri. Tojai icantaneintëgotagapëri yoguibegaigairi janaitaguetatsiri. ¹⁵Aro ochapinitanë cara ipocasitaigapëri irogomere, icantabetaigaari:

—Yaca teca ontimingani, aisati aroque ochapinitanë. Yamai pigátaiguëri icaegui matsiguengaca iriáiganaque poeboropaguequé iromananteta iraperi.

¹⁶Icantaiguëri irogomere Jesus: —¿Pairo iratsipiriobitaiguë iriáigae? Pomaiguëri obirojegui ora irapaiguë.

¹⁷Yotabitanëri:

—Teri ine yaca ora nomaiguëri. Yaca aiti oca pan ocarati pabocorooti aisati piteniantisima. Quero cotonguiboro.

¹⁸Icanque Jesus:

—Pomenaro yaca.

¹⁹Aique yogasobicaiguëri iraugui matsiguenga cara tobarisiquë. Aique yáguëro Jesus ora pan aisati sima. Inetsanaque jonoqué, icanqueri Iriri:

—Pabati, nacarasiatocoquemiro oca noperijeguica popaiguënaca.

Aro itibatsaaguequero pan Jesus, yotsatengaiguëri irogomere cara imaiguëri matsiguengajegui ira aguiataiguëri. Aisati yotsatengaigacari sima. ²⁰Yapaiguë antagaisati, iquemaigaca. Aique yobiitaguetajiro irogomere ora irangarata-neegui, iagajiro 12 cantiri. ²¹Tojai yapaiguë sérari icarati 5,000, aisati tsinanejegui, aisati ojaniquitejegui.

Yanëiatanë Jesus jonoicaa nija.

(Mr. 6.45-52; Jn. 6.16-21)

²²Aique icantaiguëri Jesus:

—Nogomere, potetaiguema pitotsiquë, pobataigue antatinta.

Aique igátaiguëri ira botoibiritaigari:

—Yamai pijáigue pobangojeguiquë.

²³Aro itonganaque Jesus oguitojaquë cara yamanaque, inibatëri Iriri. Ainta Jesus paniro inë cara otsititanë. ²⁴Ora pitotsi aroqueque pinë aganguijaquë, icomatabitacaro irogomerejegui. Te iraretima iroontita omotoncaatasantapa nija aisati poguipigapigatocoqueri coguentima. ²⁵Cara igogaraaque iáque Jesus aiquero pitotsiquë, yanëiaapë jonoicaa angaare, te iritsitigue.

²⁶Iniaigabaqueri irogomere, te irogóiguëri, itsorogasantaignaque, icaibaitanë icantobaca:

—iEeee! iCoraque camagari cara iráganacái!

²⁷Carari yotabitaigapëri Jesus:

—Quero pitsorogaigui. Naanti bocapaatsi, pinganinasëretëgotina.

²⁸Aro icabëri Peroro:

—Obiroca Natingomi, pingaimina najáque nanëiatanë jonoicaa nija irooti cara pinasegui Obiro.

²⁹Yotabitanëri Jesus:

—Omana popogopë.

Aro yaguëtanë Peroro, yanëiatanë jonoicaati nija iáque aique cara

inasequi Jesus. ³⁰Pënibaque irarequimari cara iniaquero nija omotoncaatapa itsoroganë, iparintanaca itsitiganë. Icaibatanëri:

—iNatingomi, págobaina!

³¹Aito cara yacotasitobairi Jesus, yágbagotobairi ira Peroro, icanqueri: —Arosata piquemisanquina, ¿Pairo pitsoingobiquina?

³²Aro yotetaigaaro pitotsi Jesus aisati Peroro. Aro osantocotanai coguentima.

³³Aito cara iraugui inasegatsi pitotsiquë yobaticageritotasaiganacari icantaigabaqueri:

—Aisonori, Obiro Itomi Tosorintsi.

Jesus yogaguibegajiri ira janaitaguetsiri cara Jenesarequë.

(Mr. 6.53-56)

³⁴Aro imontiaiganaja, yaretaigapaa Jenesarequë. ³⁵Ainta timaigatsi cara, igótoberri Ira Jesus, icomantëgotaiguëri, yotsatengaiguëri imatsiguengajegui. Aro yamapëneri tojai janaitaguetsiri.

³⁶Yamanocopëri cara iranintacaqueri irotsagataigapëri ogarasiquë iguitsagare. Aro yogaguibegaigairi omagaro ira otsagaqueri.

Ora yametaiga jorójegui.

(Mr. 7.1-13)

15 ¹Aique iátasitaiguëri Ira Jesus bariseopague aisati ira ogomeantiro isanguenare Moisés. Ipaniaigaca Jerosarénquë. Yosamitaigapëri:

²—Eiroegui jorío. Ametaiga queroquerai apí, anguibocoquima. Iroso yogometagaí omatsiguenga jirai. ¿Pairo te ingantobitaigue negaca pogomerejegui? Yapasitaiga te inguibocotima. Yoguimingatata iriati.

³Yotabitaiguëri Jesus:

—Tojai pomoncaratasitaigaro ora icantasiagueta omatsiguenga jirai, iroro

te pinguemisantaguëtiro ora
yogometaiguëmi Tosorintsi. ¿Pairo
picantobitaiga obirojegui negaca?

⁴Icanque Tosorintsi:

Pinguemisantiri piri aisati piniro.
Aisati icanque:

Ingameta ira cantëgotaguëtasitari
iriri aisati iniro.

⁵Carari obirojegui, pogometaiguëri
pomatsiguenga: “Pingantiri ira
casintimi: ‘Quero nomitocotimi.
Nomëmime quirequi, nangantaneintëgo-
tëmime carari aroque nacanqueri
Tosorintsi nomëri Iriro naguireguite’”.

⁶Pogometaiguë quero picábintsairi piri.
Cara picanque negaca, te pogometiri
Irinibare Tosorintsi, teatisati
pinguemisantiro. ⁷Picantasitaigabita
piquemisantasitabeta. Aisonori
icomantëgotaguëmi ira comantantatsiri
Isaías cara isanguenaque jirai:

⁸ Icanque Tosorintsi: “Ica
matsiguengaca inibatasitëgotina
ora caninaro, carari te
inguenganeintina. ⁹Yamanocota-
sitina cara yapatotasitaiga;
iroonti yogometa irinibare
matsiguenga”.

Ora aguimingasëretiri matsiguenga.

(Mr. 7.14-23)

¹⁰Aique Jesus icaimaiguëri ira
botoibiritaigari, icantaiguëri:

—“Pinguemina, pigóiguero oca
nocomantaiguëmica: ¹¹ora apaiguë, te
oguimingatiro asëre. Iroonti ora
inibatasitagueta iroro aguimingasëreta-
cái cara aquianquero quimingaro.

¹²Aique íatasiqueri Jesus irogomere,
icomantaigapëri:

—¿Teco pigóte igusaneintobitaiguë
miro bariseoegui ora picanqueri?

¹³Yotabitaiganaqueri Jesus:

—Iriro icantaigaro pibega
panguirintsi. Aiquenta irisiabonguiti-

quëro Pabati jonoquëntaberi
antagaisati ora te imanguitiro Iriro.

¹⁴Aro irinaigueta bariseoegui, te
irogóigue; aisati icancari sërari
comarajari ingatsatobaganëmaca ira
basini comarajari. Pitirooti imarigaiga-
naque omoroquë.

¹⁵Icanqueri Jesus Peroro:

—Teni nanguemimi; pingomantina
ora ocanti oca picanquinaca.

¹⁶Icanqueri Jesus:

—¿Teraiquerai pigóte? ¹⁷¿Teco pigóte
pairoraca opë ojáque asegoquë aique
agabisairo? Te ongantiro pairoraca
asërequë. ¹⁸Cara pinibati pairoraca
piquengasëreti; queroca piquenga
caninasati, quero picaninasëreti,
pinibati ora te onganinate. ¹⁹Ora
piquenga opaniaca paneingomtoquë:
cara piquenganeintaguëtiro te
ongomeite, cara póganti, cara
pintaguëtiro tsinane cagaro pijina, aisa
cara tsinane ontaguëtiro sërari cagari
ojime, cara picositanti, cara pitsoiguëgo-
tantagueta, cara picantocotaguëtasitari
pomatsiguenga, omagaro oca paniacha
paneingomtoquë. ²⁰Omagaro oca
aguimingasëretimi. Iroo te pinganinata-
guëtaigue, carari aroca popë
queroquerai piquibocota querootisati
poguimingasëretimi.

Oquemisanqueri Jesus tsinane

Cananasato cagaro jorio.

(Mr. 7.24-30)

²¹Aique íaiguë Jesus aisati
irogomerejegui cara Tiroquë aisati
Sirónquë. ²²Piátasiqueri Cananasato,
cagaro jorio. Ocampëri:

—Natingomi, Obiro imatsiguenga
David itingomi jorio jirai. Nocoguini
pingábintsena naro aisati nasinto.
Inancaro camagari, yogatsitasantëro.

²³Carari te irotopitiro, imairetanë. Aro
icantaiguëri irogomere:

—Pingantiro ojátaje, tojainta
poguiatacái paserigacái.

²⁴Icanquero tsinane Jesus:

—Igáquina Pabati nangábintsaiguero
joríojegui. Icantagari ibega oisha
ibiaga.

²⁵Aro pobaticagueritobiripari,
ocanquero:

—iNatingomi, pomitocotina!

²⁶Yotabitobëro Jesus:

—Te onganinate irágotipiri janequi
iraperi imaiguero otsiti. Cagarimi obiro
jorío. ¿Pairo nomitocobiriquimi?

²⁷Potabitanëri:

—Aisonori, Natingomi, ora picanque,
carari yapiro otsiti opetoqui ora
pariaguetatsi imesanequë casintari.

²⁸Aique icanquero:

—Tsinane, caninataque piquemisan-
quina. Yamai aroque nopabaquemiro
ora pamanocoquina.

Irooti pabisaicoontanaa osinto.

**Jesos yogaguibegajiri tojai
janaitaguetatsiri aronisati angarequë.**

²⁹Aro yogagaiganaca Jesus aisati
irogomerejegui irooti onamijaquë
angaare jitacha Garirea. Aique
itongaiganaque, isobicaigapë.

³⁰Ipcasitaigapëri tojai matsiguenga,
yágaiganaquineri tojai janaitaguetatsiri:
ainta carancaratatsi, ainta comarajari,
ainta ira patebocotatsi, ainta ira te
irinibate, aisati tojai basini.
Yobaticagueritotaguëpari. Aro Jesus
yogaguibegajiri omagaro. ³¹Aro
íquenganeintasantaigacari matsiguenga-
jegui ira niaiguëri Ira Jesus cara
inibatagajiri ira te irinibate,
yosebatagaari ira emëngari,
yanëitagairi carancaratatsiri,
iniacagajiri comarajari. Icantaguë
matsiguenga:

—Caninari Tosorintsi, Ira
iquemisantaiguë joríojegui.

**Yogatsitairo Jesos itasonguëro pan,
yomitojaiganaquero.**

(Mr. 8.1-9)

³²Aique icaimaiguëri irogomere Jesus,
icantaiguëri:

—Tojai nacantaneintëgotaiguëri
antagaisati ira botoibiritaguëna.
Ocarati maba cataguiteri
itsibataiguëna, yamai te inae iraperi.
Itasegasantaiguë. Yamai aroca
nagátagairi iriáigae, iromagotasantanë
queronta yapi, quero yaretaiga
ibangopaguequë.

³³Yotabitaiganaquero irogomere:

—Pinetse, yaca teca ontimingani.

¿Nega nágaiguëneri pan ora
irapaiguë? Tojaisonorinta
matsiguenga.

³⁴Yosamitëri Jesus:

—¿Ati ocarati pan inatsi?

Yotabitanëri irogomere:

—Ocarati 7, aisati ainta arosataanti
sibai.

³⁵Aro icantaiguëri matsiguenga
Jesos:

—Pisobicaigue quibatsiquë.

³⁶Aro yáguëro pan aisati sibai,
icanquero Iriri:

—Aro nega, Pabati, nacarasiaquemi
popabaquinaro oca perintsica.

Aique itibatsaguequero, yotsatengai-
guëri irogomerejegui arota cara
irotsatianquimaro ira botoitaigacha.

³⁷Yapaiguë antagaisati, iquemaigaca.
Aique yobiitaguetajiro ongarataga,
iagajiro cantiri oquibe ocarati 7.

³⁸Yapaiguë tojai sërari icarati 4,000.

Aisati papaiguë tojai tsinane aisati
janequi. ³⁹Aique igátaiganaquero Jesus,
icanquero:

—Yamai pijáigae pobangopaguequë.

Aique yotetaiganaja Jesus aisati
irogomere pitotsiquë, imontiaiganaca
irooti Magararaquë.

Icogabeca bariseo iritosongueme Jesus.*(Mr. 8.10-13; Jr. 12.54-56)*

16 ¹Aique iátasitaiguëri bariseopague aisati saroseopague; icogaigabitapa iraniantimari Jesus irantacaquerime ora te onganinate. Icantabepari:

—Atsi yamai nocogaiguini nanetsemi cara pitasonganti, ora nogóontëmi aroca popaniaca Jonogaguitequë.

²Yotabitaigabaqueri Jesus:

—Pinetsaigue, aroca ochapinitanë piniaquero onguiraaguitetë, ¿Teco pingantaiguë: “Quero oparigui angani”?

³Aisati cara onguëtaguetanë, piniaquero onguiraaguetamanë jonoquë, aisati aítica mingori tsitaro, pingantaiguë: “Yamai omariaque angani”. Pigóiguë ati ocanta jonoquë, omariaqueca angani, carari te pigóiguë omoncaraca tojai Sanguenari ora ocanti iribocapë Agabisaicoontatsiri. ⁴Te pinganinataigue tojainta pitsoingaiiguëri Tosorintsi. Picogabeca pineina cara natasonganque, carari quero noniaguimiro. Patiro piniaquero aikuenta nanganquimari ibega Jonás.

Aique iáque, ijocaiganaqueri ira bariseo aisati saroseo.

Ora piponganta pan irasi bariseo aisati saroseo, iroonti irogomeantane.*(Mr. 8.14-21)*

⁵Aro yaretocotaigaa antatinta Jesus aisati irogomere. Aique irogomere iquengaiguëro pan; yomaguisanquero te iromapëro. ⁶Aro icantaiguëri Jesus:

—Pigamaiguemaro ora piponganta pan irasi bariseoogui aisati irasi saroseoogui.

⁷Aique yosamitobagaigaca irogomere:

—¿Pairo icantobicái: “Pigamema ora piponganta pan irasi bariseo”? Tentajengari nomapëro pan.

⁸Igóque Jesus ora iquengaigaca, icantaiguëri:

—¿Pairo pijibiritaiguë nacantocoque-miro pan? Patiro arosataanti piquemisantaiguëna. ⁹¿Terai pigóiguë? Cani ocarati pabocorooti pan, carari napaagaiguëri 5,000 sërari. Págaigairo pobiitaguetajiro ora ongarataga. ¿Ati ocarati cantiri pinë?

Yotabitanëri:

—Ocarati 12.

¹⁰—Aisati ocarati 7 pan, aisati nopaguetaiguëri pan sërari icarati 4,000. ¿Ati ocarati pobiitaguetaji cantiriquë oquibe?

—Ocarati 7.

¹¹Icanque Jesus:

—¿Pairo te pigóiguë? Te nangueinco-tiro pan ora peguënguichane cara nacanquemi: “Pigamema ora piponganta pan irasi bariseo aisati saroseo”.

¹²Aique igóiguë irogomere te ingantocotiro aisonori ora piponganta pan, iroonti ocantaro pibega irogomeantane bariseoogui aisati irasi saroseoogui.

Icanqueri Jesus Perero: “Obiro Quirisito”.*(Mr. 8.27-30; Jr. 9.18-21; Mt. 18.18)*

¹³Aique iáiganaque Jesus aisati irogomere cara poeboroquë jitacha Sesárea, ora yobetsiquë Jeripo. Aro yosamitaiguëri irogomere Jesus:

—Nopaniaca Naro Jonogaguitequë, nomatsiguengatapë, carari, ¿Pairiraca ijitaiguëna matsiguenga?

¹⁴Yotabitaiguëri:

—Aintapague ijitaiguë Obiro Joan baotisantatsiri. Ainta basini ijitaiguëmi: “Ira Jesus Irianti Erías, ipocaji”. Ainta basini ijiquemi Obiro Jeremías. Aintasati icanque Obiro comantantatsiri.

¹⁵Aro yosamitaiguëri:

—¿Pairo pijitaiгуëna obirojegui?

¹⁶Yotabitanëri Simón aisati ijita

Peroro:

—Obiro Quirisito Agabisaicoontatsiri ira noguiauгуë. Aisati Obiro Itomi Tosorintsi caniatagantatsiri.

¹⁷Icanqueri Jesus:

—Aisonori picanti, Simón itomi Jonás.

Te irogometimiro matsiguenga; Irianti oniaguëmiro Pabati cara Jonogaguitequë.

¹⁸Najitimi Peroro ora popairo ocanti mopë. Nococaquemi pinguemisantacagaiguëri basini matsiguenga tojai cara Naro Itomi Tosorintsi. Irapatoibiritaiгуëna. Nangábintsaiгуëri querota yagobeiri camagari, querootisati yobiacaguiri cara iquemisanquina.

¹⁹Nomëmiro pinguemisantacaguiri matsiguenga aisa ocanta pisirecoquineri sitëcori arota ingasitapëri Tosorintsi cara igáanti. Queroca iquemisantimi matsiguenga yaca quibatsica, pingantiri cara quero iáti Jonogaguitequë. Aisati inganque Tosorintsi: “Aisonori picanqueri. Tenta inguemisantina, quero nomaguisantineri ora icantagueti te onganinate”. Carari antagaisati ira quemisanquero Irinibare Tosorintsi yaca quibatsica, pingantiri cara iriátë jonoquë cara përosati intiomoqueri Tosorintsi. Aro përosati inguenguemi Tosorintsi, inganque: “Aisonori. Nojocajineri ira quemisanquina ora icantagueti te onganinate, nomaguisantajineri”.

²⁰Aique Jesus icantaiguëri irogomere:

—Quero picomantiri matsiguenga: “Iriro Jesus Irianti Quirisito”.

Jesus icomantaiguëri irogomere cara ingamaque.

(*Mr. 8.31-33; Ir. 9.22*)

²¹Aique icomantaiguëri irogomere

Jesos:

—Coraque cataguiteri cara najáque Jerosarénquë. Canta, tojai iratsipiriaca-

gaiguëna ira antiasipari aisati itingomiegui saseriroti aisati ira ogomeantiro isanguenare Moisés. Aisati irógaiguëna, carari ongaraque maba cataguiteri, aro nanganiatanae aisati.

²²Aro yáganëri Peroro casiriconiati, ipëgatsacari:

—Natingomi, te onganinate oca picanqueca. Nocoguini quero itsipiriaca-guimi, querota picami.

²³Aro yapisitasitanacari Peroro Jesus, icantasanotëri:

—Pijáte, picanquina aisati picantari ibega Satanás. Quero pintaguinaro ora te onganinate. Te pigóte ora icocaquina Tosorintsi, iroonti pigóque ora icogui matsiguenga.

Ora inganque ira quemisantantiri Jesus.

(*Mt. 10.38-39; Mr. 8.34-38; Ir. 9.23-27; 14.27*)

²⁴Aique Jesus icantaiguëri irogomere:

—Iranintasantëca pairiraca aguiatanëna inguemisantantina, iranatanëro igorosite, quero icantanonta iriati, iroonti imomirintsibenquinario pairoraca nongocaqueri Naro. Aroca iratsipiriacaqueri basini, përosati inguemisantanëna Naro. ²⁵Ira cogabitacha ingábintsëma yaca quibatsica, tenta iraninte iratsipiriero, aiquenta iratsipiriasantë. Irari quemisantasantënane yaca quibatsica, irooti cara ingamobiquina Naro, aiquenta intiomoquina Jonogaguitequë, intimasantanë caninasati. ²⁶Aintaca sërari irasintaguetimaro antagaisati ora inatsi yaca quibatsica, cara ingamaque iriátë Sharincabeniquë, ¿Pairo iráque? ¿Teco iratsipiriasiquimaro omagaro? Aroca iriátë Sharincabeniquë, tiguëtisonori ingantima iriátë Jonogaguitequë, inganiatanae.

²⁷Nopaniaca cara Jonogaguitequë, nomatsiguengatapë cara niboguë yaca

quibatsica. Aiquenta nopigaima aisati yaca quibatsica, nongobeingatasantapë aisati icanta Pabati icobeingatasanti; intsibataigapëna ironomirepague Pabati irisaanganetsite, aro nongomantëgotai-guëri antagaisati matsiguenga. Nomaiguëri omagaro icanquero ora nococagaiguëri; irianti ira quero iquemisantaiguina, natsipiriacaqueri. ²⁸Aisonori nacantasantaiguëmi, nogomerejegui, aintapague obiroquë ira queroquerai icami iraniaigabajina cara nopocaje Naronta Itingomisonori; noniagaiguëmiro nosanguagueitere.

Ipasiniatitanë Jesus.
(Mr. 9.1-13; Ir. 9.28-36)

17 ¹Aro pabisanaque 6 cataguiteri cara Jesus itonganaque oquibequë oguitoja. Yágaiganaqueri casiriconiati ira Peroro aisati Santiago aisati Joan ireinti Santiago. ²Aro ipasiniatitomopëri Jesus. Yosanguëborotapë aisati icampari ibega paba. Aisati oquëtatasanotanë iguitsagare. ³Aisati iconijatomopëri Moisés aisati Erías, inibatobagobaca Jesus. ⁴Aro icanqueri Jesus Peroro:

—iNatingomi, caninataque ninaigue yaca! Pinintiroca, nobetsiquëmiro yaca maba pongotsi otiomijani, patiro pasi, aisati basini irasi Moisés, aisati irasi Erías.

⁵Iroontita inibatasegui Peroro, paguëtaguëpëri mingori poganguibotai-gapëri posanguëguitocopëri. Aro iquemaigabaquero Irinibare Tosorintsi cara mingoriquë, icanquë:

—Iriro nanintasanti Notomi Ica. Tojai nacaninatasantobiqueri. Pinguemisan-taigueri Iriro.

⁶Iquemaigabaquero oca irogomere, aro ipariaque yaquitomotaiganaca itorogasantanë. ⁷Ipcasitaiguëri Jesus. Yotsagataiguëri icanqueri:

—Pingabiritima, quero pitsorogaigui.

⁸Aro icabiritanaa icogabetajari Moisés aisati Erías, te irinaje, Irianti panibani inasegui Jesus. ⁹Aique cara yanongaiganaca, igáqueri irogomere Jesus icanqueri:

—Quero picomanti oca piniaiguëca. Aiquenta cara nangamaque aisati nanganiatanae, aro pingomantaigueri basini matsiguenga. Pingomantëgotina Naro omagaro ora pigótocoquina aisati cara nopaniaca Jonoguitequë aisati nomatsiguengatapë.

¹⁰Aique yosamitaiguëri irogomere:

—Ira ogomeantiro Sanguenari cantatsi: “Iribocapae iritsita Erías cara queroquerai ipoqui Quirisito Ira Agabisaicoontatsi”. ¿Pairo yogomebiri-queri oca? ¿Pairo te iribocobipë Erías?

¹¹Yotabitaiganaqueri Jesus:

—Aisonori icantaiguë: “Ingonijapae Erías, irobetsicaguepë omagaro”.

¹²Yamai nocomantaiguëmi cara aroque ipocaji Erías carari te irogótaigabaqueri matsiguenga; tojai itsipiriacaigaba-queri. Aisati nanganquima Naro, tojai iratsipiriacaigauëna.

¹³Aique igóiguë irogomere cara Jesus inibatëgotëri Joan baotisantantsiri.

Jesus yogaguibegajiri janequi tingaraachari.

(Mr. 9.14-29; Ir. 9.37-43)

¹⁴Aro cara yanongopaa osobi, ainta arosonori matsiguenga yapatotaiga. Aro ipocasipëri Jesus sërari, yobaticagueritotaguëpari, icampëri:

¹⁵—Natingomi, pingantaneintëgoti-nari notomi; tojai itingaraacani, tojai itsipiriaque. Iparigopiantë tsitsiquë irisacanëma; aisati iparigatapiniquë nijaaquë. ¹⁶Namabitapari yaca pogomerequëca nacantabepari: “Pigaguibegajiri notomi”, carari tiguëti ingantiri iragabiari iragabisaicotajiri.

¹⁷Yotabitanëri Jesos:

—iTe pigóiguero Irinibare Tosorintsi!
iTerai pinguemisantaiguero obirojegui,
terai pinganinataigue! ¿Ati ongantima
nantsibataiguëmi nogometasitaiguëmi
carari te pigóigue tojainta pitsoingai-
guëna?

Aique icanqueri casintari janequi:

—Atsi pomapënari pitomi.

¹⁸Aro Jesos iguisatsatëri ira camagari,
ijoqueri, yogagubegajiri ira janequi.

¹⁹Aique yosamitaiguëri Jesos
irogomere casiriconiati:

—¿Pairo te nagabiobitiri nagátiri ira
camagari?

²⁰Icantaiguëri Jesos:

—Teni pigabeiri tenta pinguemisanta-
santina. Arosataanti piquemisantaiguëri
Tosorintsi. Aisonori nacantasantai-
guëmi: aroca piquemisantaiguëri
pinganqueroca ora oguitoja,
“Ogaganëmata canta”, aro ogaganëma.
Aisa ocanta mositasaguitso otiomijani-
sonori oquibianë, aisa ocanta cara
pinguemisantaiganaque. Pinguemisanta-
santaiguëca, pinganqueroca pairoraca
nongocaquemi. ²¹Carari pinintica
pijogui camagari cantacha ica, patiro
pingantiro aroca pomanocotasantëri
Tosorintsi aisati aroca pítitima.

**Yogatsitai Jesos icomantaigairi
irogomere, icanqueri: “Pënibaque
nangamaque”.**

(Mr. 9.30-32; Ir. 9.44-45)

²²Iroontita yanëitaiganaque cara
Garireaquë, Jesos icantaiguëri
irogomerejegui:

—Nopaniaca Jonogaguitequë,
nomatsiguengatapë cara niboguë yaca
quibatsica. Carari irácagantaiguëna
matsiguenga, ²³irógaiguëna. Ongaraque
maba cataguiteri aro nanganiatanae.

Iquemaiguëro irogomere oca
nibarintsica, aro yogasëretai ganaca.

**Ipënabentiro Jesos ora
irobetsicantaguetimaro ibango Tosorintsi
cara Jerosarénquë.**

²⁴Aique iáiguë Caperinaoquë Jesos
aisati irogomere. Cara ainta ira coigotëri
quirequi irobetsicantaguetimaro ibango
Tosorintsi. Ipocasiqueri ira Perero,
yosamitapëri:

—¿Iripënantapininquerinico Ira
ogometimiri iguirequite arota
iraganinatiro ibango Tosorintsi?

²⁵Icanqueri Perero:

—Jee, iripënantëri.

Cara ipiganaja Perero cara
pongotsiquë, yosamitëri Jesos:

—Simón, ¿Pairo piquianca? Irapague
itingomi, ¿Pairo icoicotopianti
iguirequite? ¿Icoicoquerico
imatsiguengasonori? Teca, ¿Iriantico
icoicoqueri basiniati matsiguenga?

²⁶Yotabitanëri Perero:

—Icoicotaiguëri basiniati matsiguenga.
Aro icanque Jesos:

—Aisonori, te ingoicotiri
imatsiguengasonori. Aisa nacanta Naro,
te ingoicotina Pabati aroquenta
nomatsiguengatacari. ²⁷Carari te
naninte inguisaneintina ira coigotantatsi
quirequi. Yamai pijáte angaarequë,
pimate sima. Ira iritsita páguë,
pintiguiranguiri, piniaqueri poro
quirequi. Páganëri, pomeri ira
coigotantatsi quirequi, popënabentina
Naro aisati popënabentima obiro.

**Icomantë Jesos pairi obaquenguitsine
cara itingomibintanti Tosorintsi.**

(Mr. 9.33-37; Ir. 9.46-48)

18 ¹Aique irogomerejegui Jesos
iátasitaiguëri, yosamitaiguëri:
—Cara igáanti Tosorintsi, ¿Pairi
obaquenguitsine?

²Aro icaimëri janequi Jesos, yogobëri
aganguisati, ³icanque:

—Aisonori nongomantëmiro oca: pinguasërete basinati, pingantiro yacaqueroca. Queroca aisati pincanta ibega janequi, quero paretã cara igãanti Tosorintsi. ⁴Teni inguenguema iriati caninari ica janequica. Pairiraca cantëmarine ibega ica janequica iriro obaquenguitsine cara iragãantanequë Tosorintsi. ⁵Pairiraca ágacananatëri ira cantari janequi iquemisanquinanta, aisati yágacananatëna Naro. ⁶Pairiraca antaquerine janequi quemisanquina ora te onganinate, natsipiriacaqueri. Caninataqueme ingamaque queroquerei intaguiri ora te onganinate, aisa onganquimame iragaguibeintsatsatëgotë nerì oquibe mopë itsonoquë, irojoquerime angaarequë ingamaque. ⁷Aiti tojai ora quimingari yaca quibatsica, aisati ainta tojai intaqueri basini ora te onganinate, carari iratsipiriasantëro ira antaquerira.

**Pijoquiro pairoraca antaquimime
ora te ongomeite.**

(Mt. 5.29-30; Mr. 9.41-48; Ir. 17.1-2)

⁸Aisati icanque Jesus:

—Yamai nosiacagantëmiro. Aroca ontaquimi pobaco ora te onganinate, pijocajiro ora picantagueti quimingari. Aro pobetsiquiro pisëre aisatime ongantima pitotirome pobaco pijoquerome. Aisati piguiti ontaquemiroca te onganinate. Caninataque pinë paboconirobi queroca paguitinirobi cara Jonogaguitequë, arota quero piãti Sharincabeniquë cara pini tsitsi ora te otsibacanete. ⁹Aroca ontaquimiro piroqui ora te onganinate, pijocajiro ora quimingari. Pobetsiquiro pisëre aisatime ongantima páguirome pijoquerome piroqui. Caninataque pijãte paoquinirobi cara Jonogaguitequë, querota piãtacaguero pitirooti piroqui cara Sharincabeniquë cara te

otsibacanete tsitsi aisati pitsipiriasantë përosati.

“Quero pitsoingui janequijegui”.

¹⁰Aitosati icanque Jesus:

—Aisati, quero pitsoingui janequijegui, aintanta ironomire Pabati jonoquë yomisantaiguëri janequi, aisati icomantëgobentaiguiri. ¹¹Nopaniaca Jonogaguitequë, nomatsiguengatapë. Nipocasiqueri nagabisaicotaigairi ira jãtaiguënguitsineme Sharincabeniquë.

Jesús yosiacagantëri oisha ibiaga.

(Ir. 15.1-7)

¹²Aisati icantaiguëri irogomere Jesus:

—Nosiacagantëmiro aisati. Aroca ini casintari 100 iroishate, imiaquimaca poro, ¿Queroco ijocaiganaqueri 99 cara tongagariquë, iriãtasitëri ingogajantiri iroishate ira peguënquicha poro? ¹³Cara iraniajirica, inganinabenqueri iroishate aroquenta iniajiri, pabisëro cara icaninabentaiguiri iraugui te imeguima. ¹⁴Aisa icanta Pabati, te iraninte iriãte Sharincabeniquë paniro janequi.

**Icanque Jesus: “Pogometiri
popiguemisantane cara quero icantagueti
ora te onganinate”.**

(Ir. 17.3; Mt. 16.19; Jn. 20.23)

¹⁵Aisati icantaiguëri Jesus:

—Aroca pigasërequima ingantagueto-moquiminta popiguemisantane ora te onganinate, pijãtasitiri casiriconiati pingantiri. Quero picomantiri basini. Aroca inguemisantobëmi, intimaque caninasati, caninataque, págacananato-bagajima aisati. ¹⁶Queroca iquemisantimi, pijãtasitajiri aisati páganëri basini popiguemisantane, paniro queroca pite. Intsibataiguëmi irogóontimarota pairoraca pinganqueri, aisati ingampëri iriro cara inguasërete-taquimari irapiguemisantane. ¹⁷Queroca

iquemisantaigabaquemi, pingomantëgo-tiri cara yapatotaiga quemisantatsirijegui. Aisati ingamanaaiguëri. Quero ca iquemisantaiguiri antagaisati irapiguemisantane, aro pingueincotaiguëri ibega tsoengatsiri aroque icantagueque te onganinate. Quero pijitiri quemisantatsiri. Irianti cantacha coigotantatsi quirequi ipagantineri cobeingari Iromasati. ¹⁸Pairoraca pingantaiguëri yaca quibatsica, irootisati inganqueri aisati Tosorintsi canta Jonogaguitequënta. Pingantaiguërica popiguemisantane cara icantaguëti te onganinate, iroso quero pomaguisantaguëtineri, aro irooti inganqueri Tosorintsi. Aroca irobetsicasërequima, pijocajineri pingantaiguëri te ine icantaguëti yamai, aisa ocanta ora inganqueri Tosorintsi inguengasëretëmi irojocajineri aisati. ¹⁹Nagatsitaimiro: cara pomanaiguëri Tosorintsi cara Jonogaguitequë obiro aisati basini, aroca pinguengasëretima, aro imaiquëmi Tosorintsi ora pomanaqueri. ²⁰Aisonorinta atiraca irapatotaiguema pite quemisanquinane queroca maba, aisati aintana Naro nantsibataiguëmari.

**Pijocajineri basini ora
icantaguetomoquimi te onganinate.**

(Jn. 20.23)

²¹Aique iáque Peroro, yosamitëri Ira Jesus:

—Natingomi, nigóque cara ingantaguetomoquinaca te ongemeite nopiguemisantane, caninataque nangábintseri nojocajineri ora icantaguetomoquina, quero nipëgatari. Carari iragatsitainaroca, ¿Ati ongarate nojocobentajiri? ¿Aroca ongarate 7?

²²Yotabitanëri Jesus:

—Nangantasanotëmi, quero patiro pijocobentajineri siete, carari tojaisonori pijogopiantaineri përosati;

quero pipëgatari. ²³Aisati ora iragáantane Tosorintsi ocantari ibega ibatorote cogatsi cara iripënantairi iratirite. ²⁴Icaimobëri paniro iromeraro, irebetiri tojaisonori quirequi. Icantabepari: “Popënantajinari naguirequite”. ²⁵Yotabitanëri: “Tiguëti ongantima nopënantajimi yamai tenta irine quirequi”. Aro igáqueri basini: “Páganëri ica. Pomimantiri. Aisati pomimantiro iina, ianiquite, ora yasinta, omagaro; nágairi quirequi irebetëna”. ²⁶Aique yobaticagueritocari iromeraro, yamanaqueri: “Nobatorote, quero popimantina. Aiquenta nopënantajimiri antagaisati”. ²⁷Aro icantaneintëgotanairi iromeraro ibatorote, icanqueri: “Nangábintsaime, nojocajimiri ora pirebetëna nomaguisantocotajimiri. Quero nocoicotajimi”. Aro yomisotocajiri. ²⁸Cara iáque iromeraro, iniopëri irapimeraro irebetiri iriro arosata quirequi. Yágatsonotobëri icanqueri: “Popënantainori ora pirebetëna”. ²⁹Aro yobaticagueritotabecari, yamanaqueri: “Quero picoicotinari yamai. Aiquenta nopënantajimiri antagaisati”. ³⁰Carari te ingábintsaime. Yomianqueri iromingamentoquë icanqueri: “Cara popënantajina, aro nagáqueri cara iromisotocajimi”. ³¹Cara iniaigabaqueri imatsiguenga, yogasëretagaca. Iátasitaiguëri ibatorote, icomantaigapëri: “Naniaiguëri ira picábintsaime cani, te ingábintsaime iriro yamai. Yomianqueri irapimeraro irebetërinta iriro arosata”. ³²Aro ibatorote icaimagantairi aisati iromeraro, icabëri: “Te pinganinate obiro. Picanquena: ‘Quero popimantina’, irooti nojogantaimiro ora pirebetëna. Nacábintsaime, carari te pingábintseri irebetimi obiro arosata. ³³Aisati ¿Caninataqueme pingábintserime obiro ira irebetimi arosata, aisati pingantiname naro cara nacábintseme?”

³⁴Aro iguisanaca ipasatëri yomianqueri icanqueri: “Yamaica quero nomisotocajimi irooti cara popënbentajina antagaisati ira pirebetina”. ³⁵Aisa ocanta queroca picábintsairi ira cantaguetomoquimine te onganinate, queroca pijocajineri, querootisati icábintsaimi Pabati Jonogaguitequë.

**Iáiguë Jesus aisati irogomere
aiquero Joreaquë.**

(Mr. 10.1)

19 ¹Aroque icomantagueque Jesus cara Garireaquë. Aique yogagaiganaja Iriro aisati irogomere cara Joreaquë, canta antatinta Joriránquë. ²Aisati yoguiataiganaqueri tojai matsiguenga. Aintasati tojai janaitaguetatsiri. Yoguibegajiri Jesus.

**Jesus yogometocoqueri ira joquërone
iina.**

(Mt. 5.31-32; Mr. 10.2-12; Jr. 16.18)

³Aisati iátasitaiguëri Jesus bariseopague; icogabeca iraniantëmari irantacaquerime ora te onganinate. Yosamitaigapëri:

—¿Caninataquero irojocajiro iina sërari aítica pairorapagueraca ora te iranintocotiro?

⁴Yotabitobëri Jesus:

—¿Teco pinibatapinintabetimaro Sanguenari? Jirai Tosorintsi yobetsiquëri ira sërari aisati tsinane.

⁵Aisati icanque Tosorintsi:

Cara iráquero iina sërari, irojocanëri iriri aisati iniro, irágasantëro iina, intimacaquero casiriconiati.

Coshoni iroquero iina, pitirooti inganquima paniro ibatsa.

⁶Jirai inabitaca sërari aisati iina; yamai coshoni irogobaquima, intimaiguë inganquima paniro. Iniaiguëri Tosorintsi irianti paniro ibatsa. Ipanirootitaiguëri. Iroto te onganinataguëte irojocobaga-

jima. Querootisati ijocaguiri basini matsiguenga.

⁷Aisati yosamitaigapëri bariseo:

—¿Aisonori? ¿Pairo isanguenabirique Moisés jirai?

Pisanguenatinero pijina pomero ora pijogantaimaro, aro ocaninati pijocajiro.

⁸Icantaigabaqueri Jesus:

—Te pinganinasëretague, aro icanquemi Moisés cara caninataque pijocajiro pijina. Carari te iranintacaguimi Tosorintsi pijocajiro. Icoquemi quero pijoquero. ⁹Nacantaiguëmi Naro, aroca pijoquero pijina, aisati págae basini, aroque paguimintëmoro pijinasonori. Patiro aroca aguimintëmi, aro caninataque pijocajiro. Aisati ira agairone tsinane ora ijoque ojime aroque yaguimintacari ojime.

Icantocoqueri Jesus ira te iráguë iina.

¹⁰Aro icantaiguëri irogomere:

—Aique, queroca ocaninati ijocajiro iina, caninataque quero yáganti.

¹¹Icanqueri Jesus:

—Tiguëti ongantima inguemiro antagaisati sërari oca nacantaiguëmica. Paniro inguemaquero ira yogometasanti Tosorintsi. ¹²Ainta ira te irágobinte iina. Aintasati basini ira yágaguitsoiti, quero pini iina. Aisati ainta te iraninte iráguero iina. Icoquini intimasitima arota inganquineri pairoraca ingocaqueri Tosorintsi. Aroca pinguianquero oca piquemaque, aro pinguengasëretëro.

Jesus yoguëneri janequipague ibaco.

(Mr. 10.13-16; Jr. 18.15-17)

¹³Aique pamapëneri Jesus janequipague, ocantaigapëri:

—Poguineri pobaco notomipague, pomanocotiri Tosorintsi arota ingábintseri.

Icantaigabaquero irogomere:

—Quero paseriguiri Atingomi.

¹⁴Carari icanqueri Jesus:

—Quero picantiri. Nocoguini

iribocasitaigapëna janequijegui. Igóiguë iriro itingomintina. Antagaisati icantaigari ibega ica intiomoquina cara itingomibintanti Tosorintsi.

¹⁵Aro yoguëneri ibaco, yamanaque:

—Pabati, nanintini pingábintsaiguери icaequi janequipague.

Aique íaque Jesus.

Jesus icamanaaqueri ira sërari casintasantachari.

(Mr. 10.17-27; Ir. 18.18-27)

¹⁶Aro ipocasiqueri oboina sërari yosamitapëri:

—Ogomeantatsiri, picaninati. ¿Pairo caninatatsi nanganque naró arota nantimaque përosati canta Jonogaguíte-quënta?

¹⁷Yotabitanëri Jesus:

—¿Pairo picantobiquina Naro caninari? Paniro ini caninari, Irianti Tosorintsi. Carari picoguica pijáte Jonogaguítequë, pingantiro omagaro ora isanguenaque Moisés.

¹⁸Icanque oboina:

—Aiti tojai isanguenaque. ¿Pairo pininti nanganque?

Yotabitanëri Jesus:

—Quero póganti, quero pintiro tsinane cagaro pijina, quero picositanti, quero pitsoiguëgotari pomatsiguenga.

¹⁹Pinguemisantiri piri aisati piniro quero pipëgatsatari; pinintiri pitimanamitane aisa ocanta cara pininta obiati.

²⁰Icanqueri sërari:

—Aroque naquemisanquero omagaro oca cara ninë janequi irooti yamai. ¿Paironibani nanganque basini?

²¹Icanqueri Jesus:

—Pinintica iraniacaninatimi Tosorintsi, atsi pijáte pomimantiro

antagaisati ora pasinta, pomaguetiri ira coguitiaguetcha omagaro opënataga; aique imëmi Tosorintsi ora caninaro cara Jonogaguítequë. Cara pomimantëroca antagaisati, omana piguiatanëna Naro.

²²Cara iquemabecaro oca, íaque oboina yogasëretasantanaca irironta casintaguetasantacha, te iraninte imimantiro. ²³Aro icantaiguëri irogomere Jesus:

—Aisonori nacantasantëmi:

opomirintsitomocari casintaguetachari iriátë cara itingomibintanti Tosorintsi.

²⁴Nagatsitaimiro aitosati, opomirintsitomocari cameyo ingue otiomijanique omoro quitsapi. Carari omomirintsitomotasantëmari casintachari iriátë cara iragáantanequë Tosorintsi.

²⁵Iquemaiguëri irogomere iquenganeintasantaigacari, yosamitobaca:

—¿Aisonorico? ¿Pairo inganque matsiguenga cara irabisaicotajima?

²⁶Jesus inetsaiguëri irogomerejegui, icantaiguëri:

—Quero icantiro matsiguenga, carari Irianti Tosorintsi inganquero antagaisati. Te omomirintsitomotimari Iríro.

Quero itsipiriario quemisantatsiri ira aguiatëri Jesus.

(Mr. 10.28-31; Ir. 18.28-30)

²⁷Aique icanqueri Peroro:

—Pinguengaiguena naroequi, tojai nocogasantaigni naguiataiganaquemi, iroro nojocaiaguëtanëro omagaro nasintaiga. ¿Pairo nágaigae aiquenta?

²⁸Yotabitanëri Jesus:

—Nangantasantaiguëmi aisonori: aronta nopaniaca Jonogaguítequë nomatsiguengatapë, aiquenta nopocaje aisati iroraiquë quibatsi nagáantasantapë antagaisati. Cara nosobiaque

nagáantomentoquë, obirojegui aguiataiguëna yamai, aisati pisobicaiguë pigáantomentoquë ocarati 12. Pigáantaiguëri joríojegui. ²⁹Aroca piguiataiganaquina, quero pitsipiriario. Aroca pijocaiganaquero pobangopague, pirentipague, pitsiropague, piri, piniro, pitomipague, piguebatsitepague, pairorapagueraca, quero pitsipiriario. Aroca pijogobitanënarosata piguiatëna, imaiquëmi Tosorintsi tojai. Aisati irágaiganaquemi cara Jonogaguitequë cara pintiomoqueri Tosorintsi përosati. ³⁰Ainta yamai tojai itingomipague yaca quibatsica, carari quero igáanti canta Jonogaguitequë cara panironta Atingomi. Aintasati yamai tojai itsipiriaiguë yaca, imaintaiguëri matsiguenga carari aiquenta imaiquëri Atingomi iromitocoi-guëri cara igáanti Iriro. Icaranti yamai carari aiquenta irobaque.

**Jesús icomantëgotëri
merantachari obasiquë.**

20 ¹Aisati basini icanque Jesús:—Aisati nongomantaiguë miro ati icanta Tosorintsi cara igáanti. Ainta casintaro irobasite. Oquëtaguetanë iátasitamanëri sërariopague poeboroquë intarobacaatineri irobasitequë. ²Iniopëri iraegui cogatsi intarobacaatineri, icampëri: “Pintarobacaatina yamai irooti chopiniquë, aro nomaiguëmiri paniro quirequi ira jitacha tenario”. Icabëri: “Aro, caninataque”. Aique iáiguë itarobacaquineri irobasitequë. ³Cara ijonogatapë paba, aisati iátaji casintaro obasi poeboroquë, iniaigapëri basini sobicaigatsi te intarobacaate. ⁴Icampëri: “Pinintica pintarobacaatina yamai cara nobasitequë, nopënenbenuimi caninasati”. Yotabitanëri, ⁵“Aro”, aique iáque itarobacaquineri. Aisati catina

paba iátaji poeboroquë itarobacaatacakeri basini. Aisati cara inëmatanë paba igáqueri basini intarobacaatineri. ⁶Aisati pënbique ochapinitanë iátaji. Iniopëri basini te irante. Yosamitapëri: “¿Pairo te pintarobacaabirite”? ⁷Yotabitoberí: “Tenta pairi meratinane”. Icampëri casintaro: “Atsi pijáte pintarobacaatina aisati nobasitequë; pintsibatimari ira obataiguëmi”. ⁸Cara ochapinitanë ira casintaro icanqueri ira omisatineri irobasite: “Popatotaigueri iraegui tarobacaataiguëna nobasitequë, popënenbentiri. Piguibatëri popënenbentiri ira carantënguitsi ipoque. Aique popënenbeneri basini irooti cara popënenbentiri ira obapënguitsi naarai coniamaniquë”. ⁹Aro ipoque ira tarobacaatënguitsi arosata, ipënenbeneri paniro tenario. ¹⁰Aisa ocanta ipaiguëri ira parintënguicha catina, aisati ira boquënguitsi cara ijonogatapë paba. Aique icaimaiguëri iraegui parintënguicha coniamaniquë. Iquengaigabitaca iriro iripënenbentiri tojai, carari ipënenbentaiguëri paniro tenario aisati. ¹¹Yágaigabaqueri iguireguite, iguisatsatëri ira tarobacaataqueri. ¹²Icantaiguëri: “Ira carantënguitsi itarobacaataiguë arosataanti, carari pipënenbentaiguëri iriatiasati popaiguëna naro. Naanti niáigamanë cara oquëtaguetamanë, natarobacaatasantaiguë, icatsiringatasantë paba, tojai nomasobitaiguë. Caninataque náguëmi basini quirequi”. ¹³Panairo yotabitanë casintaro oba: “Nomatsiguenga, teni nomatobitimi. ¿Teco nangantimi naarai, ‘Nopënenbenuimi paniro tenario’, picanquena, ‘Aro?’ Aquengaigaca. ¹⁴Yamai, páganëri pasiatu, pijáte. Nocoguini nopënenbentaiguëri ira carantënguitsi aisa inganquima pibiaca obiro. ¹⁵¿Teco onganinate nopasitarcarico naguireguite?

¿Pigusaneinquinanico obiro aroquenta nacábintsaguëri basini?”

¹⁶Nongomantaiguëmi yaca quibatsica iraegui imaintaiguë imatsiguenga, iraguibataiguëri Tosorintsi cara Jonogaguítequë. Irari aguibataigacha yaca quibatsica ingarantaiguë canta. Aintanta tojai matsiguenga icantaigabitari Tosorintsi: “Pinguemisantina”, carari arosataanti ira quemisantaiguëri. Tojai quero íati Jonogaguítequë.

Mabataque icanque Jesus: “Nangamaque, aisati nangabiritajima nantimaje”.

(Mr. 10.32-34; Ir. 18.31-34)

¹⁷Aique íaiguë Jesus aisati irogomere aiqero Jerosarénquë. Yáganëri casiriconiati irogomere, icomantaigairi:

¹⁸⁻¹⁹—Yamai intsomaigüe Jerosarénquë. Naro paniacha Jonogaguítequë, nomatsiguengatapë cara niboguë yaca quibatsica. Iroro cantënguicha cara Jerosarénquë iráiguëna itingomipague saseriroti aisati iraegui ogomeantiro isanguenare Moisés. Ingantaiguëri ira Iromasati: “Páguiri Jesus, pógui ri tenta ingomeite”. Irisërontaiguëna, iripasataiguëna, iribëquëgotaiguëna corosiquë carari ongaraque maba cataguiteri nangabiritanaima nanganiatae.

Piátasiqueri Jesus iina Sebereo.

(Mr. 10.35-45)

²⁰Aique piátasiqueri Ira Jesus iina Sebereo, otsibatapari otomi, Joan aisati Santiago. Pobaticagueritotasipari ocampëri:

—Nocoguini pingábintsena.

²¹Yosamitobëro:

—¿Pairo pininti?

Potabitapëri:

—Aiquenta, cara pigáantë pigáantanequë, nocoque irisobicomiquimi notomi, paniro pobacosonoriquë,

ira basini pomatepacoquë. Iromitocotai-guemita cara pintingomibintanque.

²²Icabëro Jesus tsinane aisati otomi:

—Te pigóte pairoraca pomanaquina.

Aiquenta natsipirique tojai. ¿Teco pintsorogue cara pitsipiriauquë obiro?

Yotabitanëri Santiago aisati Joan:

—Teni nontsorogue, nangantaiguëro naro.

²³Aro icanqueri Jesus:

—Aisonori pitsipiriauquë, carari quero nopimiro cara pisobicomoquina aiqenta. Paniro Pabati përine pairiraca tsipaquinane Naro cara nagáantë.

²⁴Iquemaiguëri basini irogomere icarati 10. Aro iguisaneintobiqueri ira Santiago aisati Joan, aroquenta icogabeca pitirooti irobataiguëri.

²⁵Iriro cantënguicha Jesus icaimaiguëri irogomerejegui, icantaiguëri:

—Pigóiguë ira itingomipague basiniati matsiguenga cagari jorío yametaiga imerataigari imatsiguenga.

²⁶Carari quero aisati picantaigari ibegaiga iriro. Pinintaiguëca piguibatima obiati, pomitocotaigueri pomatsiguenga pingábintsaguetaigueri, quero pimeratari. ²⁷Pomitocotaigueri pomatsiguenga pairoraca ininti. Pingantimari ibega iromerataga.

²⁸Nopaniaca Jonogaguítequë, nomatsiguengatapë arota nomitocotai-gueri matsiguenga, quero nimeratari. Aisati nipocasique nangamobitaiguëri antagaisati matsiguenga arota iragabisaicotajiri Tosorintsi cara inguemisantaiguëna Naro.

Jesus yogaguibegajiri pite comarajari.

(Mt. 9.27-31; Mr. 10.46-52; Ir. 18.35-43)

²⁹Cara yaretaiga Jesus aisati irogomere Jericóquë. Cara yogagaiganaca, yoguaitaiganaqueri abatsiquë tojai matsiguenga. ³⁰Ainta

isobicaigasegui pite comarajari
onamiquè abatsi. Icomantaiguèri iriro:

—Coraque Jesus.

Aro icaibaitanè pitirooti:

—iNatingomi, Obiro imatsiguenga
David! iPingantaneintègotaiгуena!

³¹Aro iguisatsataigabaqueri ira
botoitaigacha icanqueri:

—iPomairetaigue!

Aiquero iáiguè icaimasantaiganaque:

—iNatingomi, pingantaneintègotina
Obironta imatsiguenga David!

³²Iquemaigapèri Jesus, yaratingopè,
icaimagantèri, icanqueri:

—¿Pairo picogaiguè nanganquemi?

³³Yotabitaiguèri pitirooti:

—Natingomi, nanintaiguini
piniacagajina.

³⁴Aro icantaneintègotaiгapèri Jesus,
yotsagataiguèri iroquiquè. Aito cara
inianai aisati. Aro yoguiataiganaqueri
ira Jesus.

Icanaque Jesus Jerosarénquè.

(Mr. 11.1-11; Ir. 19.28-40; Jn. 12.12-19)

21 ¹Aro yaretaigacaro poeboro
jitacha Betajajé Jesus aisati
irogomerejegui. Pinè Betajajé osobiquè
oguitoja jitacha Olibos ora oguitoja
catingasatiquè Jerosarén. Aro Jesus
igáqueri pite irogomere, ²icanqueri:

—Pijáigue catingasati poeboroquè.

Cara, piniaquero tsinane boro

otsatocotaga, otsibatari itiomijani.

Pintsaicotiro pomapèro yaca. ³Aintaca
matsiguenga irosomitobèmica: “¿Pairo
pitsaicobiritiro boro?” aro pinganèri:

“Icoguironi Atingomi”. Aro inganquemi:
“Páganèro”.

⁴Icanaque Jesus negaca cara
imoncaraquero ora isanguenatocoqueri
jirai comantantatsiri jitacha Sacarías.
Isanguenaque:

⁵Pingomantiri Jerosaresati: “Coraque
Pitingomi. Irro caninarisonori,

quero iquenga Iriati. Iqueicotana-
cari itiomijani boro”.

⁶Aique iáque pite irogomere,
⁷yamapèneri ira pite boro, antiasiporo
aisati itiomijani. Yoguèneri iguitsagare-
pague imiticaraqùè, aro iqueicotanacari
Jesus. ⁸Ainta inaigasegui tojai
matsiguenga yoguiaiguèri Jesus.

Yogaguetaiguèneri iguitsagarepague
cara abatsiquè arota iragaticanèro boro.
Aisati yogaguetaiguèneri otiomijani
otsego anchato aisa icanta icantaigaba-
quineri itingomi. ⁹ibataiganaqueri tojai
matsiguenga aisati yoguiataiganaqueri
tojai. Icaimaiganaque:

—Ainta Agabisaicoontatsiri,
imatsiguenga David. Intsome
antingomintobèmari. Intsome
aniacananatobèri. Igáqueri Tosorintsi
aroquentaniacananatèri Irro. Caninari
Tosorintsi jonoquèntaberi.

¹⁰Aro icanaque Jesus cara Jerosarénquè.

Iquenganeintasantègotobacari
Jerosaresati, yosaminatobagaiganaca:

—¿Pairo ica?

¹¹Yotabitaiguèri basini:

—Irianti Jesus Nasaresati. Ipaniaca
toonquè cara Garireaquè. Irro
comantantatsiri Ira igáque Tosorintsi.

**Jesus ijocaigapèri ira pimantaguetatsiri
cara oquibequè pongotsi irasi Tosorintsi.**

(Mr. 11.15-19; Ir. 19.45-48; Jn. 2.13-22)

¹²Aro icanaque Jesus cara oquibequè
pongotsi irasi Tosorintsi, iguisaigapèri
antagaisati ira manantatsiri aisati ira
pimantatsiri, ijocaigapèri sotoquè. Aisa
icanqueri ira campiatiri quirequi aisati
ira pimantiri paroma; yotéatapèri
imesanepague aisati irisobicomento-
pague. ¹³Icantaiguèri:

—Ocanti Sanguenari:

Icanaque Tosorintsi: “Caninataque
pomanocotaiguenayaca
nobogouquè”.

Carari obirojegui te pomanocotiri, iroonti picositapinintaigabaqueri ira bocaigatsi iromanocotaigapëri Tosorintsi.

¹⁴Aique ipocasitaiguëri Jesos tojai comarajari aisati tojai carancaratsiri. Yogui begaigabaqueri. ¹⁵Cara iniaiguëri itingomi saserirotipague aisati ira ogomeantiro isanguenare Moisés, iguisaneintaiganaqueri Ira Jesos, aroquenta itasorintsitagueque Iriro. Aisati Iriro icaimëgotaiguëri janequi cara oquibequë pongotsi, icantaiguë: —iIntsome antingomintaiguemari imatsiguenga David!

Aro iguisaneintasantaigaca saseriroti, icantaiguëri:

¹⁶—¿Piquemaqueroco oca icantocotai-guëmi janequi? Te onganinate ijitaiguëmi Itingomi.

Yotabitanëri Jesos:

—Jee, naquemaiguëri. Teco pinibatiro Sanguenari ora cantatsi:

Intingomintaiguëmari Ira Quirisito janequi aisati tsorori janequi ira tsotatsi. Irinibacaninataigaba-queri.

¹⁷Aro iáiguë Jesos aisati irogomere, iáiganaque cara Betaniaquë cara isamaigapë. Ora Betania iroonti poeboro otiomijani.

Jesos yogasiguiriqüero iguera.

(Mr. 11.12-14, 20-26)

¹⁸Cara oquëtaguetanai ipigaigaa Jesos aisati irogomere aiqero Jerosarénquë. Cara abatsiquë itaseguë Jesos. ¹⁹Cara onamiquë abatsi inopëro panguirintsi jitacha iguera. Iátasiqero. Ico gabecaro ojito, carari te ine, iroonti osi. Icampë:

—Querota basini pinai ojito oca igueraca.

Aito cara pisiguiricanë iguera, ocamaque.

²⁰Iniaiguëro irogomere, iquenganeintaigacaro, yosamitaiguëri Ira Jesos:

—¿Ati ocanca pisiguiricasitaca iguera omanapague?

²¹Yotabitaiguëri Jesos:

—Nacantasantaiguëmini, aroca pinguemisanqueri Tosorintsi, pingantaiguëro aisa nacanta nacanquero iguera. Aisati pinganquerica Pabati: “Pigaganënar oca oguitojaca, pijoqui ro cara angaarequë”, aro inganquimiro. Carari quero pitsoingui. ²²Aisatica pinguemisanqueri, inganquimiro pairoraca pomanocoqueri.

Yosamitaiguëri Jesos joríojegui:

“¿Pairi agáquemi?”

(Mr. 11.27-33; Jr. 20.1-8)

²³Aitosati icanaque Jesos cara oquibequë pongotsi irasi Tosorintsi. Iroontita yogomeantasegui, aro iátasitai-guëri itingomipague saseriroti aisati irapague ogomeantiro isanguenare Moisés, yosamitaiguëri:

—¿Pairi agáquemi cara pijocaiguëri pimantaigatsiri? ¿Pairi oguëmi cara pijica itingomi?

²⁴Yotabitaiguëri Jesos:

—Aisati Naro, patiro nosamitaiguëmi; aroca potabitaiguëna, aisati nongomantaiguëmi pairi agáquena Naro. ²⁵¿Pairi agáqueri Joan cara ibaotisataiguëri tojai omatsiguenga? ¿Iriroco agáqueri Tosorintsi? ¿Iraco agáqueri matsiguenga?

Icantobagaiganaca jorío:

—Anganquerica: “Igáqueri Tosorintsi”, aro ingancái: “¿Pairi te pinguemisanbitotaiguëri Joan?”

²⁶Carari aroca anganqueri: “Igáqueri matsiguenga”, aro inguisaigacái omatsiguengapague ijitaiguënta cara igáqueri Joan Tosorintsi cara ingomantagueque.

²⁷Aro yotabitaiguëri:

—Teni nogóigue pairi agáqueri. Icanqueri Jesos:

—Aisati Naro, quero nocomantimi pairiraca agáquena nangantaguetecapague pinaiguëca.

Ira saserirotipague aisati icantari ibega oboina te iriátsatiri iriri.

²⁸Aisati icantaiguëri Jesus:

—Yamai nongomantaiguëmiro quingabaguientsi: ainta sërari aisati piteni itomi. Igáqueri itomi obatsisiri: “Notomi, pijáte yamai pintarobacaate cara obasiquë”. ²⁹Yotabitanëri: “Quero nantiro”, carari iquianca, aique iáque itarobacaapë. ³⁰Aisati igáqueri basini itomi: “Notomi, pijáte yamai pinte cara obasiquë”. Yotabitanëri: “Aro, Apa, najáque”. Carari te iriátsatiri. ³¹Yamai nosamitaiguëmi: ¿Pari antasantëneri iriri ora icocaqueri?

Yotabitaiguëri:

—Ira obatsi, aroquenta itarobacaaque obasiquë.

Aro icantaiguëri Jesus:

—Nangantasantaiguëmini oca: irobataiguëmi iriáiguë Jonogaguëtequë ira coigotantatsi quirequi aisati ora antapinintaguetiri sërari cagari ojime. ³²Ipoque Joan baotisantantsiri, icomantapëmi ati pingantaiguëma cara pinganinataiguë, carari te pinguemisantobëri. Irianti quemisantaiguëri ira coigotantineri Iromasati piguireguite, aisati oquemisanqueri tsinanepague antaguetaguiri sërari cagari ojime. Icantaigaa yacaqueroca cara iriáiguë Jonogaguëtequë, carari te pomasiniatitima obi, te piganinataiguëma, quero piáti jonoquë.

Jesus icomantëgotëri ira omisantiro obasi.

(Mr. 12.1-12; Ir. 20.9-19)

³³Aisati icantaiguëri Jesus:

—Aiti basini nosiacagantëmiro: pinguemaigabaquero. Ainta sërari panguiquero obasi. Yotanquero. Aisati

iquiaque omoro cara iragaticaguëtero oguitso aisati ora irágantëmaro oja. Aisati yobetsiquëro pongotsi oquibiantsa jonoquë ora iranetsantimaromaro. Aro yogaiguëri omisantineri irobasite, aique iáque jaanta basiniquë quibatsi. ³⁴Cara omoncaraca cataguiteri cara oragatanë oguitso, igátabcari iromeraro: “Pijáigue, pingampëri ira omisantino nobasite imagantaiguënaromasiati”. Aro iáigabitaca. ³⁵Carari ira omisantino iniaigabaqueri, yágaigabaqueri. Paniro ipasataiguëri, basini yogamagaiguëri, basini ibasegaiguëri mopëquë yoguipigabitacari. ³⁶Ira casintaro igátaigabitacari basini iromeraro tojai. Aitosati icantaigabaqueri. ³⁷Aique iquengasëretaca ira casintaro: “Yamai nagáqueri notomi. Iraniacaninataigabaqueri iriro”. Aro igáqueri itomi. ³⁸Irari omisantineri irobasite inioberri itomi inibatobaganaca: “Coraque itomi casintaro. Cara ingamaquenica iriri, iriroquerai ágairone obasi. Intsome ógaigabaqueri, águero obasi asintaigaimaro eiroquerai”. ³⁹Aro yágaigabaqueri, yáganëri sotoquë obasi, yogamagaigabaqueri. ⁴⁰Cara iribocapë ira casintaro obasi, ¿Pairo inganqueri iraegui omisantaiguëneri?

⁴¹Yotabitaiguëri saseriroti:

—Cara iriboque, irágaigapëri ira catsimari omisantatsiri, iratsipiriacaqueri, irógaigapëri. Aique irogaiguëri basini omisantineri irobasite, irianti caninari, ira pagantirine iraisati oja oba.

⁴²Aro icantaiguëri Jesus:

—Teco pinibataiguero ora Sanguenari ocanti:

Jirai itsoingaguëro mopë ira obetsiquirori mopëpongo, ijoquero tenta irogóiguero cara icoiguëro Tosorintsi iroonti otingomi mopë, otingomi pongotsi, cantaca otingomipoa.

Carari yáairo ora mopë,
itingomiantacaro pongotsi.
Icaninabenquero Atingomi,
iniacaninatëro, icantacagajiri
matsiguenga cara irogajiro
otingomi mopë. Aisati
naquenganeintasantëro naroequi.

⁴³Iroero nocomantaguëtaiguëmi: quero
piniaiguiri Tosorintsi cara igáanti.
Irianti jáiguënguitsine Iriroquë basiniati
matsiguenga ira quemisanquerine
intingomintaiguëmari Tosorintsi.

⁴⁴Pairiraca pariaquenguitsine yaca
mopëca iricarapë itonguiquë; pairiraca
otsinaque oca mopëca onganqueri
cantaca pibega pojongabatsari. Naanti
osigaro ora mopë otingomi
nacantocotaiguëmiro; queroca pigótina,
pitsipirique; queroca piquemisantina,
pijáque Sharincabeniquë. Pairiraca
comëtobënane iripoguiriaquengani.

⁴⁵Aro iquemaigabaqueri Ira Jesus
itingomi saseriroti aisati ira
ogomeantiro Sanguenari, igóiguë cara
Jesus iquenguitsatocotaiguiri irirojegui.

⁴⁶Iguisaneintaigabitacari, icogaigabitaca
irácagantërime, carari yomitsorogai-
guëri matsiguenga igóiguënta
matsiguenga cara aisonori Jesus
icomantëgotëri Tosorintsi.

**Jesus icomantëgotëri ira cajemaiguëri
imatsiguenga cara irágantë itomi.**

(*Ir. 14.15-24*)

22 ¹Aisati icanque Jesus oca
quingabaguirentica.

²—Nongomantaiguëmi ati ocanta cara
itingomibintanti Tosorintsi. Ainta
itingomi yobetsiquëneri itomi cara
iráquero iina. Icaimaiguëri tojai
matsiguenga. ³Igátabecari iromeraro,
icaimagantaigabitacari igaimanejegui,
carari te iribocaigue. ⁴Aisati igátabetajari
basini iromeraro icantaiguëri: “Pingantiri
nagaimane: ‘Aroque pobetsicaca

antagaisati. Yógaiguëri ibaacate aisati
iroishate aneri. Popogopë pinganinasëre-
taigapë””. ⁵Carari te inguemaigabaqueri.
Iáiguë atiraca. Iáque paniro cara
iritoganequë, iáque basini cara
imimantagueantë. ⁶Ainta basini ágobëri
iragátane icantaigabaqueri catsimari.
Aisati yogamagaigabaqueri basini
iragátane. ⁷Cara igóque itingomi,
iguisanaca, igátaiguëri isoraroteegui
iboeborotequë. Yogamagaigapëri ira
igaimane, aique itagaigapëro
ibangopague. ⁸Aique icanqueri iromeraro
itingomi: “Aroque nobetsiquë omagaro,
carari te ingomeite nagaimanejegui, te
iriboque. ⁹Pijáigue cara abatsipaguequë,
pingaimiri matsiguengajegui, pingantiri:
‘Pijáigue ibangoquë atingomi,
pinganinasëretëgotineri itomi
águënguitsine iina””. ¹⁰Aique iáiguë
iromeraropague, icaimaguequeri
imatsiguengajegui. Yapatoitaigaca tojai,
caninari aisati ira te inganinate.
Iagaigaparo pongotsi. ¹¹Aro iáque
itingomi cara irobetsataiguëmari ira
bocaigatsi. Iniopëri paniro sërari ira te
ingue caninaro iguitsagare.
¹²Yosamitapëri: “Nomatsiguenga,
nopaguetaiguëri nagaimane caninaro
quitsagarintsipague arota pinguitsaga-
tima caninasati. ¿Pairo te pinguitsagabi-
tima obiro?” Te irotopitiri. ¹³Aro
icanqueri iromeraro: “Piguëshotiri
ibacoquë aisati iguitiquë, pomisotogui
sotoquë cara tsitiniriquë. Cara,
iraraquma aisati iratsitsiaguítetanë”.
¹⁴Pinguemina: ainta tojai icaimaigabita
Tosorintsi carari te inguemisantiri;
arosataanti ira icoigaiguë.

**Yogomequeri bariseo Jesus cara
inganquineri itingomi ora icoicoqueri.**

(*Mr. 12.13-17; Ir. 20.19-26*)

¹⁵Aique iáiguë bariseoegui,
yosamitobagaigaca:

—¿Pairo anganqueri Ira Jesus aniantimari? Aroca angantacaqueri ora te onganinate, aro cara anguiséri.

¹⁶Aro igátaiguèri irogomere aisati ira aguiataiguiri Eroris. Iáiguè icantaigapèri Ira Jesus:

—Ogomeantatsiri, nigóiguè aisonori pogomeantiro Irinibare Tosorintsi, aisati poniaguinaro catinasati atiraca ongantima naretaiguè mari Tosorintsi. Te pintsoroguirí pairiraca. ¹⁷Yamai pingomantina pairoraca piqianca Obiro: ¿Caninataqueco omèri Sésar aguireguité? ¿Teco onganinate omagantèri cobeingari cara Iromaquè?

¹⁸Igóque Jesus cara icogaigabitaca iromatobitirime, irantacaguiri ora te ongomeite. Yosamitaigabaqueri:

—¿Pairo picogobiti pomatobitina? Te pinganinate. ¹⁹Poniaguinari quirequi ira pipè nabentiri Iromasati.

Aro yamaigapèneri quirequi, ira jitacha tenario.

²⁰Yosamitèri Jesus:

—¿Pairi casintaro oca irosiacagomen-toca? ¿Pairi ijita sanguenatègotènguicha yaca tenarioica, iroonti iripajiro?

²¹Yotabitanèri:

—Iroonti irasi Sésar nogobeingarite.

—Icantaiguèri Jesus:

—Aro, pomaiguèri Sésar ira icoicoquemi, aisati pomaiguèri Tosorintsi ora iraisati, ora icocaquemi Irro.

²²Iquemaiguèri, iquenganeintasantaiganaca. Aique iáiguè, ijocaiganaqueri.

Icantaiguèri saroseo Jesus: “Aisonori angabiritajima”.

(Mr. 12.18-27; Ir. 20.27-40)

²³Irooti cataguitèri iátasitaiguèri Jesus saroseopague, ira ijitasitaiga cara quero icabiritaja igamagaegui. Aro yosamitaigapèri:

²⁴—Ogomeantatsiri, jirai isanguenaque Moisés:

Aintaca sèrari, carari te irine itomi, aique ingamaqueca, caninataque ireinti irágajiro iina; aroca ontsomaaque itomi, irianti irosiguèma itomi ireintitomaco.

²⁵Jirai ainta naroeuguè poro sèrari, aisati ireinti icarati 6. Yágabitaro iina, carari te irine itomi. Aique icamaque iriro. Aro iina yágairo ireinti. ²⁶Aisati icamaque iriro, te irine itomi. Aisati icantaigaca ireintiegui yágaigabitaro tsinane icamaiguè omagaro, teni irinèmate itomi. ²⁷Aique ocamaque tsinane aisati. ²⁸Cara ingabiritajima, ¿Pairi ágairone? Pinetse, ijinantaigabitaro antagaisati ireintiegui.

²⁹Aro yotabitanèri Jesus:

—Tojai pamatobitaigaca obiatiegui tenta pigóiguero Sanguenari, teatisati pigóiguero itasorintsite irasi Tosorintsi.

³⁰Aisonori cara angabiritajima, antimaigae, quero ágai ajina. Antagaisati ira cabiritajachane ingantaiguè mari ibega ironomire Tosorintsi: quero yágai iina.

³¹Ingabiritajima omagaro camaigatsiri. ¿Teco pinibatiro ora icanti Tosorintsi jirai? Icanque:

³²Naro Tosorintsi. Iquemisantina Abaram. Iquemisantina Isac. Iquemisantina Jacob.

Te ingante: “Iquemisantabequina”.

Aroca iquemisanquerini Tosorintsi Abaram, ainta icaniati Abaram. Aisati caniari Isac aisati Jacob. Tosorintsi Irianti Itosorintsite ira caniatatsi.

³³Cara iquemaigabaqueri tojai matsiguenga, iquenganeintaigaca. Icanque: —Caninasati yogomeanti Jesus.

Icomantègotèro Jesus ora obatasti ora icocaqueri Tosorintsi.

(Mr. 12.28-34)

³⁴Ira bariseo iquemocotaiguèri saroseo, cara caninasati yotabitaiganaqueri saroseopague Jesus yoguimairenqueri. Iroro itsorogaiganaque saroseo

cara iraniaitaguë mari aisati. Aro ipocasitaguëri Jesos bariseopague.
³⁵Icogaigabitaca iramasitacaguimarime Jesos irinibarequë. Ainta paniro bariseo ogomeantiro Sanguenari, yosamitëri iriro:

³⁶—Ogomeantatsiri, aiti tojai pogometaguequina Sanguenari. ¿Pairo obatasti ora anguemisanque?

³⁷Yotabitanëri Jesos:

—Pinintasantiri Atingomi, Irironta Pitosorintsite pomasëretasantimari obiati, përosati pinguengueri, pinguemisantasantiri.

³⁸Ocari oca iroro obatasti cara Sanguenariquë. ³⁹Ora otsibata, ocanti negaca:

Pinintiri pitimanamitane pibega cara pininta obiati.

⁴⁰Aroca pingantaiguëro oca, aro pomoncarataguëro antagaisati isanguenare Moisés aisati omagaro isanguenataiguë comantantatsiripague.

Quirisito imatsiguenga David.

(Mr. 12.35-37; Ir. 20.41-44)

⁴¹Cara përosati yapatoitaigasega bariseopague, yosamitaguëri Jesos:

⁴²—¿Pairo piquengasëretëgotacari Quirisito? ¿Pai imatsiguengataca?

Yotabitaiganaqueri bariseo:

—Iriro matsiguengatacari David.

⁴³Icantaiguëri Jesos:

—Jirai Isëre Tosorintsi osanguenatacueri ira David; ijiqueri Quirisito “Natingomi”. Isanguenaque David:

⁴⁴Ira Tosorintsi icanqueri Natingomi:

“Pisobigue yaca nobacosonori-quëca. Pintsibatina nagáantomen-toquë irooti cara nagabeiri antagaisati ira quisaiquëmi, irajitaguëmi Itingomi”.

⁴⁵Iroca Quirisito Itingomi David, ¿Pairo pijitobitaiguëri Iriro

imatsiguenga David? ¿Pairo te pijitobitaiguëri Pitingomi obirojegui aisati?

⁴⁶Aro Jesos yoguimairentasantaiguëri bariseo irooti cara te pai otabitirine. Itsorogaiganaque aro te irosomitaigairi aisati.

Jesos yogometaguëri matsiguenga ati icantaiga ira ogomeantiro Sanguenari aisati bariseoegui.

(Mr. 12.38-39; Ir. 11.42-46; 20.45-46)

23 ¹Aique icantaiguëri Jesos ira imatsiguengajegui aisati ira irogomere.

²—Iraegui ogomeantiro Sanguenari aisati ira bariseoegui ijitasitaigabita aisati icantaigari Moisés: yogomeantaguequero isanguenare Moisés.

³Caninataque pingantaiguero ora yogometaguëmi, carari quero poguiatiri aroquenta icantasitaigacaro irinibare, tenta ingantiro iriati ora icomantaigabitëmira. ⁴Tojai yobomirintsitaiguëmi cara picanquero ora yogometaguëmi, carari te iromitocotëmatimi iriati. ⁵Antagaisati icantagueti iriro, icantasitaigaro arota iraniacanineitaguëri imatsiguenga.

Yogasitaro arosata Sanguenari cara ichotaiquë aisati ibacoquë. Aisati yobetsicasitaigacaro oquibesonori ogarasiquë iguitsagarepague arota iraniacanineitaguëri matsiguenga, ingantocotaiguëri: “Caninari bariseo aisati ira ogomeantiro isanguenare Moisés, iquemisantantaiguëro”.

⁶Aisati cara yapaigui icogasantaiguë intsibataiguë mari itingomipague, aisati cara yapatotaiga jorío icogasanti irisobicomento caninaro. ⁷Icogasantiguë irobetsataiguë mari matsiguengajegui cara opimantagani pairoraca, irobetsataiguë mari: “Ogometinari”.

⁸Carari obiro, quero picantari. Quero

picogui irajitimi “Ogometinari”, panironta ogometimiri, Naanti. Aisati picantobagaiga, pijitobagaiganaca: “Nopiguemisantane”. ⁹Aisati yaca quibatsica, quero pijitasitari piri pairiraca, panironta Piri ini cara Jonogaguitequë. ¹⁰Querootisati pinintacagui irajitimi “Natingomi”, panironta Pitingomi, Irianti Quirisito. ¹¹Pingoqueca pintingomintima, aro caninataque pobatacagui ira basinipague, pomitocotaigueri iriro. ¹²Pairiraca quingachane caninari, irajiquima obatatsi, aro Tosorintsi iraguipasisguitëri, inganqueri carantatsiri. Aisati ira carantatsi, inganqueri obatacagantatsiri cara inguemisantasantëri imatsiguenga.

Jesús isintsitsataiguëri ira ogomeantiro isanguenare Moisés aisati bariseo.

(Mr. 12.40; Ir. 11.37-48; 20.47)

¹³Icantaiguëri Jesús:

—Obirojegui ogomeantiro Sanguenari aisati obirojegui bariseo, tojai ingasitfgataiguëmi Tosorintsi tenta pinintacagui pairiraca iraretima cara iragáantanequë Tosorintsi, teatisati pijáigue obiro. ¹⁴Tojai pamatobianti. Aisati tojai ingasitfgataiguëmi Tosorintsi aroquenta págabitsaquero obango ogamaimentaga iroontita pamanocotasantastitari Tosorintsi arota iraniacaninataiguemi pomatsiguenga. Tojai iratsipiriacaiguëmi. ¹⁵Tojai ingasitfgataiguëmi. Popomirintsibentaigari basini, pogometaguetaiguëri cara iromatobiantë aisa ingantaiguëmi pibega obiro. Yabisanaquemi iriro. Pamanocotasitaigari Tosorintsi obiro, carari te pingantiro caninaro; aisati yamanocotasantastitaigari pogomere, teatisati ingantiro caninaro. Aisa icantimi, icanquero ora iriátanquima Sharincabeniquë. ¹⁶Ingasitfgataiguëmi

obirojegui. Aisa pingantimari ibega comarajari oniagasitari imatsiguenga comarajari negaraca pini abatsi. Picantastitaro: “Aroca inganque poro, ‘Iroontita pinë ibango Tosorintsi, pigóontimaro quero namatobitimi’, aro caninasati yamatobiantë. Carari aroca inganque, ‘Iroontita inë oro cara ibangoquë Tosorintsi, pigóontimaro quero namatobitimi’, aro aisonori iromoncaraquero irinibare”. ¹⁷¿Pairo picantobitaiga negaca? Te pininte pigóigue ora caninari. Ora ibango Tosorintsi ocaninatasanti, aisati ira oro caninari aroquenta poganinatëri ibango Tosorintsi. ¹⁸Aisati picantastitaro: “Aroca inganque matsiguenga, ‘Iroontita pinë cara atagantëneri Tosorintsi obira, pigóontimaro quero namatobitimi’, aro caninasati yamatobiantë. Carari aroca inganque, ‘Cara ini obira omapëneri Tosorintsi arota ataquineri, aro pigóontimaro quero namatobitimi’, aro aisonori imoncaraquero irinibare”. ¹⁹¿Pairo picantobitaiga negaca? Te pininte pigóigue ora caninaro. Ocaninatasanti ora atagantëneri Tosorintsi ibatsa obira. Aisati icaninati ibatsa aroquenta poganinatëri ora atagantineri. ²⁰⁻²²Pinetsaigue. Tojai picantaiguë: “¿Teco ine atagantineri Tosorintsi aisati ora inatsi jonoica?” “¿Teco ine ibango Tosorintsi aisati Iriro tsomaguira?” “¿Teco ine Jonogaguite aisati Iriro sobicatsi cara iragáantomentoque?” Picantastitaro pairorapagueraca pijitasita caninataque pomatobitaigari pomatsiguenga. Pijitasita ¿Teco intime Tosorintsi? Aisonori itimi, igóque ora picantaguëti, ingasitfgataiguëmi. ²³Obirojegui ogomeantiro isanguenare Moisés aisati obirojegui bariseo, ingasitfgataiguëmi Tosorintsi pamatobiantinta. Pinetse: picantaguëtai-gabitacari. Aroca páguë quirequi 10, aro

pomabaqueri paniro irasi Tosorintsi. Aroca páguë 10 osi pobanguirepague, aro pomabitëmari patiro osi. Carari te pinguengaiguero ora icocagasantaigabitiimi Tosorintsi: icogabeca pintimeme caninasati, icogabeca pingantaneintëgotirime pomatsiguenga pingábintserime, icogabeca pinguemisantirime aisati pomoncaratirome pinibare. Caninataqueme pingantaiguerome antagaisati ocapague; aique aroca páguë pairoraca ocarati 10, patiro pomëri Tosorintsi. ²⁴Te pigótëmataigue, carari picogabeca pogometaignerime matsiguenga Irinibare Tosorintsi. Aisonori tojai popomirintsitasantabitacaro ora cagaro icocaquimi Tosorintsi, iroso cantënguicha te pinguengatëmataigueri ora icocagabequimi. ²⁵Ingasitígataiguëmi obirojegui Tosorintsi tojainta pamtobiantii. Piquibasantëro pitasane otisitaquë, carari te pinguibatetiro tsomaguitinina; cara ositititi. Aisa picanta obiro, poganinatasita arota iraniacaninataguëmi matsiguenga, carari te piganinasë retima pisërequë. Përosati picositanti aisati pamtobiantii. ²⁶Te pigóigue. Aisati picantari ira te iranee. Obitsita quibatequerone tsomaguite, aique quero oquebatsitaji otisitaquë. Aroca piganinasëretëma, aro iraniacaninatëmi aisonori matsiguenga. ²⁷Obirojegui, bariseo aisati ogomeantiro isanguenare Moisés, ingasitígataiguëmi Tosorintsi pamtobiantintia. Aisati picantaro yogantari camatsirini, ibotsotiro catari. Ocaninatabitaca sotoquërantii carari tsomagui quimingaro isititi, jagaca itonguiporoqui. ²⁸Iniacaninatabitacaro matsiguenga ora picantaguëti carari te pinganinasërete: tojai pamtobiantii aisati tojai pintapinintiro ora te ongomeite. ²⁹⁻³⁰Ingasitígataiguëmi Tosorintsi tojainta pamtobiantii

obirojegui. Jiraisonori pomatsiguenga ógaiguëri ira comantabitari Irinibare Tosorintsi, Ira caninari. Yamai pobetsicaiguëro pongotsipague pinguengantëmari comantantatsiri. Aisati picantasitaiga obirojegui: “Nantimeme naati jirai, quero nóguirime, quero nacantarime nomatsiguenga ógueri”. ³¹Picanque: “Nomatsiguengatacari jirainisati”. Aisonori picantaiguë, irootisatinta pintaiguë cantacha irasi jirainisati. ³²Aisati posigari pomatsiguenga jirai, obirojegui ógueri aisati. Ora iparintaca jirai, picantaiguë obiro yamai. ³³Picantaigari marangue; pamasiqueri ira basini. Picantaguëtasanoti tojaipague ora te onganinate, te pinganinatëmataigue. ¿Pijiquero quero piáigui Sharincabeniquë? Aisonori pijáiguë canta.

Icomantëri Jesus: “Ingasitígataiguëmi Tosorintsi”.

(Ir. 11.49-54; 13.34-35)

³⁴Përosati icanque Jesus: —Aiquenta nagáquemiri basini comantantatsiri, ogótatsiri, aisati ogomeantirone Irinibare Tosorintsi. Nigótaiguëmi, ainta ira pógagantaiguë, basini popëicotaiguëri, popasataiguëri basini cara papatotaiga, aisati pinguisaiguëri basini negaraca iriátagueque. ³⁵Ainta picantaguëti, picogaiguëti pigamagaigueri antagaisati caninatatsiri. Jirai póguëri Abel, aisati basini tojai. Aisati pogamaguëri Sacarias, itomi Berequías, iroontita iquemisantacagabecari imatsiguenga cara ibangoquë Tosorintsi. Pintimaiguëmi obirojegui jirai, aisati póguërimë. Pasi poguiro póganti. ³⁶Aro Tosorintsi ingasitígatëri omagaro ira cogaiatsi iróguiri basini. Aisati ingasitígatëmi obirojeguinta ógueri.

³⁷Joo, obiro Jerosaresati. Tojai pógapinintiri ira quinguitsatocotaigui-miri Tosorintsi, aisati pobasiaqueri mopèquè ira igáquemi. Aisa ocanta tiapa omisantiri ojaniquite itiomijani, ocábintsaiguèri, aisati nocogabeca Naro nangantimaro, nangábintsaiguemime, carari te pinintaigue pinguemisantobèna. ³⁸Pijitasitaiga Jerosarén caninano, carari nojocanèmi Naro, aisati irojocanèmi Pabati Tosorintsi quero inomotajimi. ³⁹Quero piniaigaina aisati irooti cara piniaigabaquina nopocaje aisati nantingomibintaigapèmi, pingantocotaigabaquena: “Coraque Ira igáque Atingomi. Icaninatasanti Iriro”.

Icanque Jesus: “Aiquenta irogomeriguetèro ibango Tosorintsi”.

(Mr. 13.1-4; Ir. 21.5-7)

24 ¹Aique isotocanè Jesus cara ibangoquè Tosorintsi, iáque. Ipocasitaiguèri irogomere, ijigotaiguè neri ibango Tosorintsi aisati pongotsipague otsibatano. ²Aro icantaiguèri Jesus:

—¿Piniaigabitacarora pongotsipague? Aisonori nongomantèmi oca: aiquenta irogomeriguetèro antagaisati. Irogaguetajiro. Quero pini yaca pite mopè otsibatobagaa.

³Aique iáiguè itonganaque oguitojaquè jítacha Olibos. Isobigopè Jesus. Aro comanoroni yosamitaigapèri irogomere:

—Pingomantina: ¿Ati ongantima cara irogomeriguetèro orapague pongotsi? ¿Pairo ogótacaquinane ati ongantima cara popogopae? ¿Ati ongantima omoncaraquima antagaisati oca picantaiguènaca?

Icomantaiguèri Jesus: “Aiquenta iribocaiguè tojai matobiantatsiri”.

(Mr. 13.5-8; Ir. 21.8-11)

⁴Aique yotabitanèri Jesus:

—Arotasha pine quero yamatobitimi. ⁵Iribocaiguè tojai, ingampè: “Naro Quirisito”. Iromatobitaigapèri tojai matsiguenga. ⁶Pinguemopiantèrota inganque: “Yomanátobacani canta”. Inganque basini: “Aiquenta iromanátobaguima canta jaanta”. Carari quero pogasèreta: tojai irógobaquima, carari queroquerei omoncarata omagara nacantaiganaquemi. ⁷Aiquenta inganaquima matsiguenga inguisaiganaqueri basiniatsi matsiguenga, inguisègotobagaiguèma irógobaquima. Aitosati iritasegaiguè tojaisonorori matsiguenga. Aisati ontojaiganaque janatigantsipague. Tojai osebataguetanèma omagaroguitequè quibatsi. Iratsipiriaiguè matsiguengapague, ⁸iroro cantènguicha queroquerei yobomirintsitasantiri matsiguengajegui. Aiquenta coraque agabenisonori.

Tojai inguisaguetèri quemisantatsiri.

(Mt. 10.17-22; Mr. 13.9-13; Ir. 21.12-19)

⁹Aisati icomantaiguèri irogomere Jesus:

—Aroca irogóiguè matsiguenga piquemisantaiguèna, ingantobitaiguè miro catsimari, irógarantaiganaquemi, inguisaiganaquemi antagaisati matsiguenga. ¹⁰Ainta tojai irojocajiro cara iquemisantabeca, aique inguisaiguèri ira quemisantatsirisonori, irácagantaiguèri. ¹¹Ingonijapè tsoengantatsiri, ingantaigabitèma: “Nanguemisantacagaiguèmi”, carari iromatobitaiguèri antagaisati quemisantabetachari. ¹²Tojai ingantaguequero te ongomeite, aisati tojai irojocajiro cara inintobagaigaca. ¹³Carari nagabisaicotajiri antagaisati ira quemisantaiguènane pèrosati.

¹⁴Pijátagueque antagaisatiquè quibatsi, pingomantagueitaiguèri omagara matsiguenga oca Caninano Nibarintsica,

cara nocogui intingomintaiguena; aique omoncaraquima antagaisati oca nacantaiguëmica.

Aisati icanque Jesus: “Aiqueta imomirintsitaiguë Joreasati”,

(Mr. 13.14-18; Ir. 21.20-24)

¹⁵Aisati icomantanque Jesus:

—Jirai isanquenaque comantantatsiri jitcha Daniel:

Aiqueta ingapë cara ibangoquë
Tosorintsi ira quimingarisonori
cantaguetasantatsi ora te
ongomeite, iraguimingatëro
antagaisati.

Pigóiguero Sanguenari. Cara piniaiguërica ira nocomantëgoti yamaica inganaque ibangoquë Tosorintsi, ¹⁶aroca pitimi cara Jerosarénquë pisigaiganaquima otisipaguequë. ¹⁷Aintabica obiro jonoquë pobango, quero piápanënti tsomagui págapanëntiro ora pasinta; iroonti pisigasantanëma. ¹⁸Aroca pinë pitoganequë, quero pipigasitapanaan-taro basini piguitsagare. ¹⁹Tojai otsipiriaiganaquero tsinane ora pëñibatatsi aisati ora tsotagatsi ojaniquite queronta pisigasantanaca. ²⁰Pomanocotiri Tosorintsi arota quero pisigaiga cataguiteri-quë omarigantete-tica angani, querootisati cara sábaroquë cara pamagoriaigui.

Icanque Jesus: “Tojai iratsipiriaiguë antagaisati ira timaiganaquenguitsine”.

(Mr. 13.19-23; Ir. 17.22-24)

²¹Aitosati icanë Jesus:

—Aique tojai iratsipiriasantaiguë matsiguenga. Iratsipiriasanoiguë abisëro ora itsipiriaiguë matsiguenga jiraisonori irooti yamaica, aisati abisëro omagaro inanënguitsine aiqueta. ²²Aroca ongosamanitanëme cara iratsipiriasanoi-guë opoguiriaiguëri omagaro

matsiguenga ingamaque, carari Tosorintsi ingábintsaiguëri antagaisati quemisanqueri iraegui icoiguë, arota quero ocosamaniti atsipiriagantsi.

²³Aintaca paniro cantatsi: “Irirro

Quirisito Ica”, quero piquemisantiri.

Aisati inganquemica: “Intsome canta

Quirisitoquë”, querootisati poguiatiri.

²⁴Coraque iribocapë tojai matobianta-

tsiri ingampëmi: “Naro Quirisito”. Aisati

iribocapë basini inganque: “Naro

comantëmirine Tosorintsi”. Tojai

iritosongantë, ingoque iromatobitaiguëri

tojai matsiguenga, carari quero

yamatobitiri ira quemisantasantatsi ira

icoiguë Tosorintsi. ²⁵Piquemaquena

yamai nocomantaiguëmi atiraca

ongantima aiqueta queroquera ini.

²⁶Aroca inganquemi: “Ainta Quirisito

cara tera ontimingani”, quero

piquemisantiri. Aitosati, aroca

inganque: “Ainta tsomagui pongotsi”,

quero piquemisantiri. ²⁷Nopaniaca

Jonogaguitequë, nomatsiguengatapë.

Cara omabocapái tegotsitanatsi

moretatsiri, osangueguitetanëro

omagaro jonoquë, aisa nangampaima

Naro cara nopogopae quibatsica.

Nomabocaigapairi, carari iraniaigaba-

quina antagaisati. ²⁸Atiraca ini igamaga,

aito cara imarigasipëri tisoegui. Aisa

ocanta tojainta itsoinganti joríojegui,

iroro iribocasitaguëtaiguëri tojai

matobiantatsiri.

Ati ingampaima cara iribocapae Jesus aiqueta.

(Mr. 13.24-27; Ir. 21.25-28)

²⁹Aisati icomantaiguëri irogomere

Jesos:

—Aro tojai iratsipiriasantaiguë

antagaisati matsiguenga, omomirintsito-

motaiguëri. Cara abisanaque

atsipiriagantsi, aique intsitinitanë paba,

aisati quero iconijaguitetanai

manchacori. Aitosati imariaguepë jonogasaki, aisati osebatanëma omagaro jonoquë. ³⁰Aique nongonijapë Naro cara jonoquë, iragasëretocotaigabaquina antagaisati tsoengatsiri. Iraniaigabaquina cara nopogopë mingoriquë. Nosanguëguitetaigapëri nongobeingatasanotapë nagáantaiguëri omagaro Naro paniacha Jonogaguitequë, nomatsiguenatapë. ³¹Aisati nagátaigapëri nonamireegui intibotë catsiguesonori irapatoitaiguëri antagaisati quemisantaiguëna iragui igoigane Tosorintsi atiraca itimagueti quibatsiquë.

Yosiagantaiguëneri iguera Jesus.

(Mr. 13.28-31; Ir. 21.29-33)

³²Aisati icantaiguëri irogomere Jesus:

—Yamai nosiacagantaiguëmiro anchato jitacha iguera: pinguengasantiro. Cara iroraini otsego, ositanae osi, aro pigóiguë pënibaque osariganaje.

³³Aisa ocanta, cara piniaigabaquero oca nacantaiguëmica yamai, pigóiguë pënibaque orequima cataguitieriquë cara nopogopae. ³⁴Nanganquemi aisonori: queroquerei icamaigui joríojegui tsoengatsiri cara queroquerei omoncarata oca nocomantaiguëmica.

³⁵Omeganëma omagaro ora inatsi jonoquë aisati omeganëma oca quibatsica, carari quero opega nasi nanibare irooti cara omoncaraquima omagaro ora nacantaiguëmi.

Te ogótengani atiraca ongantima cara iribocapae Jesus.

(Mr. 13.32; Ir. 17.26-30, 34-36)

³⁶Aisati icanque Jesus:

—Te irogóte pairiraca atiraca ongantima nopocaje Naro. Te irogóigue ironomireegui Tosorintsi. Nipoque, nomatsiguenatapë carari teatisati nogóte Naro. Paniro igóti Pabati.

³⁷⁻³⁹Jiraisonori, cara itimi Noé,

yapapinintaiguë imatsiguenga, isinguitapinintaigaca, yágapinintaiguëro iina, itimabeta aisa ocanta itimaigabita omatsiguenga yamai. Te inguemisantaiguëro cara icamanaigabitacari Noé: “Coraque onangasantapëma”. Aro yotetanaca Noé pitotsiquë, yasitocoqueri. Aique omabocaigacari matsiguenga angani, ponangasantanaca, pitsongaiguëri, itsiticaiganaque. Aitosati inganquima yamai matsiguenga, atiraca ongantima nopocaje Naro, quero iquemisanti, nomabocaigapëmari. Aique iratsipiriaiguë antagaisati tsoengatsiri.

⁴⁰Aintaca piteni sërari cara togantsiquë, paniro náganë nantsibatanëmari, irari itsipa quero náganëri. ⁴¹Aintaca pite tsinane mitoquirori singui, náganëro paniro nantsibatanëmaro, orari otsipa quero náganëro.

Icanque Jesus: “Piguaiguena”.

(Mr. 13.33-37; Ir. 12.41-48; 21.34-38)

⁴²Përosati icanai Jesus:

—Piguaiguena, pinguenguena, tenta pigóigue atiraca ongantima cara nopogopae. ¿Nomabocaigapëmica?

⁴³Aisa icanta casintaro pongotsi, icositaguetiri. Aroca irogóqueme atiraca ongantima iriboquë cosirinti, ingaguitëme, quero inintacagui icositiri. ⁴⁴Aisa nacanta Naro.

Pinguenguena piguaiguena. Queroca pinguena, aro nopocaje nomabocaigapëmi. ⁴⁵Pingantimari ibega caninari iromeraro casintari, igótasanti, igáanti basini iromeraro itsipa. Icanqueri ibatorote: “Obiro,

pinganquineri basini arota popaagui caninasati”. Aique iáque. ⁴⁶⁻⁴⁷Aroca iraniopëri iromeraro cantatsi caninasati, aro ingampëri ibatorote: “Caninasati picantaguetiro ora nococaquemi. Yamai nocogui pomisantantiro omagaro ora nasinta, nigótinta yamai quero

pamatobianti”. Aro inganinaseretë iromeraro. ⁴⁸Carari quero picantari ibega basini iromeraro te inguemisantiri ira ibatorote, inganqueca: “Yamai játaque ira meratinari, querojengari ipigapaa omanapague”, ⁴⁹aro inguisëri basini iromeraro itsipa, ingapojapinintiri, irisinguitopiantëma. ⁵⁰Aro ira ibatorote iromabocapëmari iromeraro te ingomeite, tenta iragueiri. ⁵¹Aro ingasitígatapëri, iragáqueri intsibataiguëmari matobiantatsiri. Canta, iragasëretasantëma, iraraquima, iratsitsiaguitetanë. Quero picantari ibega iriro, irari posiguima caninari iromeraro quemisanqueri ibatorote.

Icomantëgotiro Jesus 10 tsinane terai ágante.

25 ¹Aisati basini icantaiguëri irogomere Jesus:
—Yamai nosiacagantëmiro aisati ati ocanta iragáantane Tosorintsi. Aintaca 10 tsinane terai ágante. Ocogaiquë otonguiboquimari ojime otsipa aisati ontsibataiguëmari cara jiesitaquë. Aroque otsitinitanë, aro áganëro omicherotepague. ²Pabocorooti tsinane ogótatsiri; ora basini pabocorooti te ogóigue. ³Oraegui te ogóte páganëro omicherote carari te áganë oja ora obotacagajimarone. ⁴Oraegui ogótatsiri páganëro omicherote aisati páganë oja oboontaimaro. ⁵Tenta iriboque omanapague ojime otsipa, opotsiquitaiquë pisamaiganaque. ⁶Aro aganguite oquemaigabaqueri icaimaigapëro: “Coraque pijimetsari, pijáte pitonguibo-guintimari”. ⁷Omanapague ocaguuitaiganaque 10 tsinane, pobetsicanëro omicheroeguite. ⁸Aro ora te ogóte ocantabecaro ogótatsiri pabocorooti: “Pomabaquina arosata oja pasi; otsibaqueca nomicherotepague”. ⁹Potabitaiguëro ogótatsiri: “Quero.

Quero cotonguiboro oja naro aisati obiro. Aroca nomëmi naro, aisati otsibacanë nasi nomicherotepague. Pijáigue pomanantanontima pasi obiro”. ¹⁰Iroontita piáigue omanantaiguë, yareca ojime otsipa. Otsibataigacari cara pongotsiquë iroro pabocorooti tsinane ogótatsiri aisati basini igaimane, icaigapë yapaigapë. Yasitocoigaca sitëcoriquë. ¹¹Aique paretaigapaa ora tsinane te ogóte, ocantaigabitapaari: “Pisrenaro naro aisati, naniaigapaimi”. ¹²Carari yotabitobëro tsmagui: “Quero. Teni nogóiguemi pairiraca obiro. Te naninte popocasitina yaca”. ¹³Pinguengasëretimaro oca nosiacagantëmica. Pigamema, tenta pigóigue atiraca ogantima cara nopigaima.

Icomantëgotëri ira omitoiaiguëneri iguireguita casintari.

(*lr. 19.11-27*)

¹⁴Aitosati icanque Jesus:

—Aisati basini nosiacagantëmiro ati ocanta iragáantane Tosorintsi. Aisa ocanta sërari játénguitsine jaanta basiniatiquë quibatsi: queroquerai iáti icaimaiguëri iromeraroegui, icomantaiguëri: “Nanintini pomisantinari naguireguita”.

¹⁵—Icanqueri paniro: “Jerica pabocorooti iguibe quirequi tojai iripënaró. Pomisantinari”. Icanqueri basini: “Jerica pite iguibe quirequi tojai iripënaró. Pomisantinari”. Aisati ipabaqueri basini iromeraro paniro iguibe quirequi tojai iripënaró iromisanquineri. Paniro ipëri tojai, irironta ogótasantatsiri. Ira basini ipëri arosata tenta irogótasante. Aro ipaguetanëri, aique iáque canta jaanta basiniquë quibatsi. ¹⁶Ira águëri tojai quirequi iáque yamanantë ipimantë. Yomitoiaigasantëneri iguireguita ibatorote, icarati pabocorooti aisati.

¹⁷Aisati itsipa águëri pite íáque, yamanantë, ipimantë, yomitojaigasantë neri, yáguë basini pite. ¹⁸Irari águëri paniro, íáque iquiaquero omoro, imánaquineri iguireguitë ibatorote quibatsiquë. ¹⁹Aiqueta ipigapaa ibatorote, icaimaigapëri iromeraro: “Yamai pomapënari naguireguitë”. ²⁰Ipoque ira águëri pabocorooti, yamapë aisati basini pabocorooti, icanqueri ibatorote: “Jerica piguireguitë popanaquina jirai. Namanantë, nopimantë tojai, aro nomitojaiguëri. Jerica basini, aisati icarati pabocorooti”. ²¹Aro icanqueri ibatorote: “Caninataque picantasantëro ora nococaquemi. Cani nopanaquemiri arosata pomisantënari caninasati, yamai nocogui pomisantinari tojai basini. Aisati naninti tojai pinganinatomotina naro”. ²²Aique ipoque ira águëri pite, yamapë aisati basini pite, icanqueri ibatorote: “Jerica piguireguitë popanaquina jirai. Namanantë, nopimantë, tojai nomitojaiganaqueri. Jerica basini, aisati icarati pite”. ²³Aro icanqueri ibatorote: “Caninataque picanque ora nococaquemi. Cani pomisantënari arosata. Yamai naninti pomisantinari tojai basini. Aisati nocogui tojai pinganinatomotina naro”. ²⁴Aique ipoque ira ágabitënguicha paniro, icanqueri ira ibatorote: “Nobatorote, nigóquimi obiuro, te pingábintsante, notsoroquemi. Najique aroca nomitojaiganaquemirime piguireguitë, págabitsaquinari omagaro. Iroro te nomitojaigaguëtiri. ²⁵Nitiaqueri antagaisati. Jerica naguipigaimiri ira pasi”. ²⁶Yotabitéri ibatorote: “Te pinganinate. Tojai poperataca. Pigótabeca nocogabeca naro pomitojaiguenarime naguireguitë. ²⁷¿Pairo te pomabiritiri ira ogapinintiri quirequi? Pomairime iriro, iripénaben-

tainarime nágantajimarime basini. Iraguipigainarime omagaro nasi”. ²⁸Aro ibatorote icanqueri basinipague: “Págabitsatiri naguireguitë, pomeri ira omisantinari caninasati, aroquenta cani yomitojaiganaqueri pabocorooti iguibe quirequi irooti cara yáguë basini pabocorooti. ²⁹Iriro nomasantë inomotiri tojai, irari inatsi arosata iriro nágabitsaque. ³⁰Yamai páganëri ica cara otsitinitasanti cara iraragasëretasantima aisati iratsitsiaguitetanë”.

**Jesús icanque cara aiqueta
ingomantëgotaiquëri omagaro
matsiguenga.**

³¹Aisati icomantë Jesús:

—Nopaniaca Jonogaguítëquë, nomatsiguengatapë. Aiqueta najátaje, nopigaima aisati. Intsibataigapëna tojai ironomire Tosorintsi irisaanganetsite. Nosobigopë nagáantomentoquë, nantingomibintaigapëri omagaro matsiguengajegui. ³²Nopatotaiguëri antagaisati matsiguenga, negaraca itimagueti. Naro aisati nanganquimari ibega ira casintari ibira inaguiri casiriconiati iroishate aisati igábarate. Aisati Naro ninaqueri casiriconiati ira quemisanquina aisati ira tsoengaiguina. ³³Nanganqueri ira quemisantaiguëna: “Popocaigapë yaca nobacosonoriquëca”. Nanganqueri ira tsoengaiguina: “Popocaigue yaca nomatepacoquëca”. ³⁴Aique nongomantaigabaqueri iragui nobacosonoriquëni: “Omana, inganinatagaiguëmi Pabati. Jiraisonori yobetsiquëmiro iragáantane arota pintiomotaiguëri. Yamai pijáigue pingarataiguëri. Caninataque irobaintaiguëmi. ³⁵Cara nitaseguë, popëna noperi. Cara nomiretë, popëna nomire. Te pigótaigabitina iroro cantënguicha pobangopaguequë pogasomabaquina. ³⁶Te ine

nomanchaqui jirai, obiroy paiguënaroy. Najanaitënti, obiroy bocasitaiguëna. Yomianquina cara iromingamentoquë, pipocasitaiguëna picábintsaiduëna”.

³⁷Aique irosomitaiguëna ira caninataigatsiry: “Natingomy, ¿Atiraca ocanta cara pitaseguë, cara napaagaiguëmi? Teni nanguengueroy. ¿Atiraca ocanta cara pomiretë cara nopaiduëmi pomire? ³⁸¿Atiraca ocanta cara nacábintsaiduëmi nobangopaguequë? ¿Atiraca ocanta cara nopabaquemy pomanchaqui? ³⁹¿Atiraca ocanta pijanaitë, aisaty yomianquemy, niátasitaiguëmi? Teni nanguengai-gueroy”. ⁴⁰Aroy notabitaiguëry: “Aisonory nangantasantaiguëmi: cara picábintsëry paniry quemisanquina, aisaty picábintsëna Naro”.

⁴¹—Aique nangantaiguëry ira nomatepacoquëny: “Yamai pijáigucanta Sharincabeniquë, cara tsitsiquë ora te otsibague. Yobetsiquëroy Tosorintsy jiraisonoriy; yobetsiquëneriy Satanás, cara iriáiguë camagary, aisaty antagaisaty iraguiaitaiguëry. Yamai pingarataiguery canta iriroy aisaty obiroyjegy. ⁴²Jiray nitasegabitacy, tepomaiquena noperiy. Nomiretabitacy, teatisaty pomaiquena nomire.

⁴³Naquenagueque, tepomena jatasintsy ora nasamantëma. Te ine nomanchaqui, carary tepomasitaiguenaro Naro. Najanaitë, tepopocasitaiguena pinetsaiguena. Cara yomianquena iromingamentoquë teatisaty popocasitaiguena”. ⁴⁴Aique irosomitaiguëna: “Natingomy, ¿Atiraca naniaigabitëmi cara pitaseguë, cara pomiretë, cara te ine pomanchaqui, cara te ine negaraca pisamë, cara pijanaitë, cara yomianquemy, cara tepomitocotai-guemy”? ⁴⁵Aroy notabitaiguëry: “Aisonory nangantasantaiguëmi: cara tepingábintseriy iraquemisanquina,

teatisaty pingábintsena Naro”. ⁴⁶Aique iraugy nomatepacoquëny iriáiguë cara Sharincabeniquë përosaty ingasitfgataiguëry Tosorintsy. Irari iraugy caninataigatsiry iriáiguë cara Jonogaguitequë, intiomotaigapëna përosaty.

Yosamitobaca jorío: “¿Ati anganqueri cara ágagantëry Jesy?”

(Mr. 14.1-2; Ir. 22.1-2; Jn. 11.45-53)

26 ¹Tojay icomantanque Jesy, aique icanqueriy irogomere:

²—Pigóiguë ongarague pite cataguiteriy omoncaraquima cataguiteriy jitacha Pásicoa. Nopaniacy Jonogaguitequë nomatsiguengatapë, carary irácagantaiguëna iribëquëgotagantëna.

³Aroy yapatotaigacy itingomipague saserirotiy aisaty iray ogomeantiry isanguenare Moisés aisaty jorío antiasiparipague. Yapatoitaigacy cara ibangoquë itingomy saserirotiy, iray jitacha Caijás. ⁴Yosamitobaca:

—¿Ati anganqueri cara ágagantëry Jesy agamagaiguëry?

⁵Aisaty iquengaigacy:

—Quero águiry jiesitaquë. Iriroy iniacaninataiguë matsiguenga. Arocy águëry inguisaigacáiy eiroygy.

Oshaguëantacary casangajengaro Jesy Betaniasato.

(Mr. 14.3-9; Jn. 12.1-8)

⁶Aique yogaganacy Jesy canta Betaniaquë, Iriroy aisaty irogomere. Aintay ibangoquë Simón, iray iribatsasebaguitagay jiray. ⁷Yapasiguiny Jesy aroy pipogopë tsinane. Pamëgotasitapëry asaity casangajengaro ora pënatachay tojay; pinantaro pobetsicagany mopë sibitaro jitacha aribásitoy. Pisataicoquero oshaguëantacary Jesy iguitoquë. ⁸Aroy iguisëgotaiغانacaro irogomere Jesy, icanque:

—¿Pairo paparaabiriquero casangajengaro? ⁹Caninataqueme omimantërome casangajengaro águërime tojai quirequi omërime tojai ira coguitiacha omitocotaiguërime.

¹⁰Yotabitaiguëri Jesus:

—¿Pairo picantobibiriquero oca tsinaneca? Patiro ocanquinaro caninaro.

¹¹Përo cara irine obiroyeguíquë ira coguitiachari te irine iguireguite; cara pinintica pomitocotaiguëri iriro. Carari quero nini Naro përosati yaca.

¹²Ocabëna caninasati. Oshaguëntobë naro queroquerai iteina. ¹³Aisonori nangantaiguëmi: aiquenta pinguenagueque omagaroquë quibatsi, pinguenguitsatomotaguetaiguëri matsiguengajegui Caninaro Nibarintsi. Aitosati pingomantëgotiro oca tsinaneca arota irogótocotiro matsiguengajegui.

Joras iquianca irácagantëri Jesus.

(Mr. 14.10-11; Jr. 22.3-6)

¹⁴Aique íaque paniro irogomere Jesus. Ijita Joras Cariotisati. Íatasitaiguëri itingomipague saserioti, ¹⁵icantaigapëri:

—Aroca nágagantëri Jesus, ¿Aro popënenbenquina?

Yotabitëri:

—Jee, nomaiguëmi quirequi.

Aro ipaiguëri quirequi iguitso icarati 30. ¹⁶Aique ipigapaa Joras, inetsasantëri Jesus arota irogóontimari atiraca ongantima irácagantëri.

Yobetsiquëneri Jesus cara icarantacaro yapë. Aisati Jesus icomantëgotëri ira ágagantërine.

(Mr. 14.12-21; Jr. 22.7-13, 21-23; Jn. 13.21-30)

¹⁷Pareca Pásicoa cara yametaiga joríojegui yapaigui pan te ingonaguero ora piponganta. Íatasitaiguëri Jesus irogomere, yosamitaiguëri:

—Natingomi, ¿Nega pininti nobetsiquëmiro cara popë Pásicoaquë?

¹⁸Icantaiguëri Iriro:

—Pijáigue cara Jerosarénquë; cara, piniaigapëri matsiguenga, pingantiri: “Icanque Ogometinari: ‘Pënibaque nomoncaraquero omagaro. Nanintini nopaiquë Pásicoaquë cara pobangoquë, Naro aisati nogomerejegui’”.

¹⁹Aique íaiguë irogomere, iniaigapëri sërari. Yoniagaigabaqueri ibango cara yobetsiquëro perintsipague asi Pásicoa.

²⁰Cara otsitinitanë, ipocaiquë Jesus aisati irogomere. ²¹Cara yapaigasegui, icomantë Jesus:

—Aisonori nangantaiguëmi, ainta paniro yaca ira ágagantënane.

²²Aro yogasëretaigaca antagaisati, panirootipague yosamitëri:

—Natingomi ¿Naroco ágagantëmine?

²³Yotabitaiguëri Jesus:

—Irianti ira pëcoquina cara napë noberatotequë. ²⁴Nopaniaca Naro Jonogaguetequë, nomatsiguengatapë yaca quibatsica. Jirai isanguenatocoquina Sanguenariquë, aroque nomoncaraquero omagaro. Irari atsipiriasantërone ira ágagantënane ¡Caninataqueme querome ini iriro, querome itsipireiro!

²⁵Aique yosamitëri Joras, ira ágagantërine:

—Natingomi ¿Naroco ágagantëmine?

Yotabitëri Jesus:

—Jee, Obiro.

Yogomeantë Jesus cara irapapinintobiqueri quemisantatsiri aisati irógobitaiguëmari.

(Mr. 14.22-25; Jr. 22.14-20; I Cor. 11.23-26)

²⁶Cara yapaigasegui, Jesus yáguë pan, icarasiaqueri Tosorintsi. Aique itibatsaguequero, yotsatengaiguëri irogomerejegui. Icantaguëri:

—Jeroca pan osigaro nobatsa.

Popaiguero. ¿Teco nangamobitaiguëmi?

²⁷Aique yáguë irógomento, icarasiaqueri Tosorintsi, ipaiguëri irogomere, icantaiguëri:

—Pógauquemaro obirojegui. ²⁸Iroso garo naraa, ora naraatobitanëneri omagaro matsiguenga cara nangamobitaiguëri. Yamai naraa ocanti irorai Nibarintsi; iroso ingábintsantai-guëmari Tosorintsi cara icanque jirai. Cara irabentaiguëna matsiguenga inguemisanquina, Tosorintsi irojocajineri matsiguenga ora icantagueti te onganinate, quero iquengairo. Nacantaiguëmi yamai arota pigóigue ati ocanta iragabisaicotajiri Tosorintsi antagaisati quemisanquinane. ²⁹Yamaica quero nógaaro oja oba irooti cara nantsibataiguëmi cara iragáantane-quë Pabati. Cara iragáantë Iroso omagaro omasiniatitanë. Aique nóguëmaro iroraia aisati obirojegui.

Jesos icantaiguëri irogomere: “Yamai tsitiniri pijocaiganaquina”.

(*Mr. 14.26-31; Ir. 22.31-38; Jn. 13.36-38*)

³⁰Aroqueque icántataiguë Jesos aisati irogomere, íaiguë cara oguitojaquë jitacha Olibos. ³¹Yaretaigaca. Aro icampë Jesos:

—Yamaica tsitiniri pijocaiganaquina, cara ocomantëgotëmi Sanguenari:

Nóguërica ira omisantiri oisha, aro irisigaiganaquema iroishate, inguenagueque porocague.

³²Carari nanganiatanae, nobataiguëmi canta Garireaquë.

³³Aro icanqueri Peroro:

—Aroca irojocanëmi antagaisati basini icaegui, quero nojoquimi naro.

³⁴Yotabitanëri Jesos:

—Aisonori oca nongomantëmi: yamaica tsitinirica queroquerai icaimi tiapa sërari, ongaraque maba pinganque: “Teni nogótiri Ira Jesos”.

³⁵Icanque Peroro:

—Aroca nantsibatëmi nangamobiquemi, quero nacanti: “Teni nogótiri Ira Jesos”.

Aisati icantaigabitaca omagaro irogomere.

Jesos yamanaqueri Iriri cara panguirintsisiquë jitacha Jetsemaní.

(*Mr. 14.32-42; Ir. 22.39-46*)

³⁶Aique íaiguë Jesos aisati irogomere cara Jetsemaníquë. Icanqueri:

—Pisobicaigue yaca; najáque Naro cara, nomanocqueri Pabati.

³⁷Yáganëri mabani casiriconiati: Peroro aisati piteni itomi Sebereo. Tojai yogasëretasantaca, iquenganeintasantaca.

³⁸Icantaiguëri ira yoganë maba Jesos:

—Tojai nogasëretasantaca agabenisonori. Pisobicaigue yaca, pingaguite.

³⁹Aique yogaganaca caraquerora yaquitomopa quibatsiquë.

Yamanocpëri Iriri:

—Pabati, teni naninte natsipirie, carari quero nacantiro ora nocogabeca Naro, iroonti nanganque ora picocaquena Obiro.

⁴⁰Aique ipigasitapaari irogomere.

Iniopairi isamaigasegui. Yosamitëri ira Peroro:

—¿Teco pabebintsatiro pobotsiquine, te pabetiro pingaguitëmäte arosata?

⁴¹Pingaguite, pomaniri Tosorintsi iromitocotaiguemi arota quero picantaguetiro ora te ongomeite.

Picogabeta pingantirome ora nococaquemira, carari te pingantiro.

⁴²Aro ipiganaja yamanaji aisati:

—Pabati, picocagasanotënaroca natsipiriero, aro caninataque. Nomoncaraquero antagaisati ora picocaquina.

⁴³Ipigapaa aisati iniopairi irogomere aitosati isamaigasegui, tojainta ipotsiquitasantë.

⁴⁴Aisati íátaji yamanocotajiri Iriri. Irootisati yogasitairi ora icanqueri naaraiquerai.

⁴⁵Ipigasitapaari irogomere, icampairi:

—¿Somatsibico? Yamai aroque omoncaraca. Jirai nopaniaca Jonogaguitequë, nomatsiguengatapë. Yamaica irácagantëna ira cagari caninataigatsi. ⁴⁶Pingabiritaiguema, intsome ajáte. Coraque ipoque ira ágagantënane.

Yáguëngani Jesus.

(Mr. 14.43-52; Ir. 22.47-53; Jn. 18.2-11)

⁴⁷Cara inibatasegui Jesus, yarepa Joras ira yogometabeta Jesus. Icarataigapëri tojai matsiguenga. Yamaigapë isabirite aisati anchaqui cara igátaiguëri itingomipague saseriroti aisati antiasiparipague. ⁴⁸Aroque icomantaiguëri Joras icanque:

—Ira nasarapëma Irianti Jesus. Págaiganaqueri.

⁴⁹Aique íatasiqueri Jesus Joras, yasarapari, icanque:

—¿Aintabi, Ogometinari?

⁵⁰Yotabitanëri Jesus:

—Nomatsiguenga, ¿Pairo pipocasiti yaca?

Aique ipocasitaigapëri antagaisati, yágaiganaqueri. ⁵¹Aro paniro irogomere yáguë isabirite, itoguimitatëri iromeraro itingomi saseriroti. ⁵²Jesus icanqueri:

—Pomingairo pisabirite cara poguiroriquë. Antagaisati ira carantobagaro isabirite, ingamantëmaro sabiri iriro aisati. ⁵³¿Teco pigóte nongocaquerica Pabati, iragátaiguënarime tojaisonori ironomire, inguisëcobentina? ⁵⁴Carari arome inguisëcobenquiname, iragabisaicotajiname, quero nomoncaratiro ora ocomantëgotëna Sanguenari.

⁵⁵Aique icantaiguëri ira bocasitaiguëri:

—¿Pairo pamasibiriquinero pisabirite aisati anchaqui? ¿Naroco cosirinti? Tojai piniaigabitëna cara nogometaiguimi cara ibangoquë

Tosorintsi, te páguina. ⁵⁶Carari páguëna yamai aroquenta omoncaraca ora ocomantëgotëna Sanguenari.

Aique ijocaiganaqueri Jesus antagaisati irogomere, isiguetaigana naca.

Yágaiganaqueri Jesus catingasatiquë itingomipague joríojegui icarati 71.

(Mr. 14.53-65; Ir. 22.54-55, 63-71;

Jn. 18.12-14, 19-24)

⁵⁷Aro yágaiganaqueri Ira Jesus ibangoquë Caijás, itingomisonori saserirotipague. Cara, yapatobiritaigari basini itingomipague saseriroti aisati ira ogomeantiro isanguenare Moisés, aisati antiasipari. ⁵⁸Yoguiatanëri Perero icanrantanë. Icapë tantotsiquë tsomagui itsibataigacari sorarojegui. Icoqui irogóte atiraca inganqueri ira Jesus.

⁵⁹Aro itingomipague saseriroti, aisati antiasipari, aisati omagaro itingomipague jorío icarati 71 itsoiguëgotaiacari Jesus arota iróguiri.

⁶⁰Ainta tojai tsoiguëgotacarira, carari te inguengaiguema. Aique ipoque pite basini tsoiguëgotantachari ⁶¹icantaigapë:

—Naquemaqueri cara icanque: “Nogomeriguetëro ibango Tosorintsi; ongaraque maba cataguiteri nobetsicauro aisati”.

⁶²Aro icabiritanaca itingomi saserirotipague, icanqueri Ira Jesus: —¿Pairo te potapibiritiri? ¿Pairo ojita oca icantocotaiguëmica?

⁶³Imairetopitëri Jesus, te irotopitëmatiri. Aique itingomi saseriroti igáqueri:

—¿Teco iraneimi Tosorintsi Ira catimanagerisonori? Pingomantasantina: ¿Obiroco Quirisito, Itomi Tosorintsi?

⁶⁴Yotabitëri Jesus:

—Jee, Naro. Nopaniaca Jonogaguitequë, nomatsiguengatapë. Aiquenta piniaigaina nosobigopë ibacosonoriquë

Tosorintsi sintsirisonoriguinte, aisati piniaigaina cara nopoque mingoriquë, nopigapaima yaca quibatsica.

⁶⁵Aique iguisanaca itingomi saseriroti itisaraanëro imanचाqui, icanque:

—Piquemaigabaqueri. Ijitosorintsitaitaca Iriati. ¿Pairo ongogobique basini comantëgotërine? Piquemaiguëri cara icantocotaguëtasitari Tosorintsi.

⁶⁶¿Pairo piquianca obirojegui? ¿Pairo anganqueri?

Yotabitaiguëri jorfojegui:

—Iriati cantagantënguicha, caninataque ingamaque.

⁶⁷Aro ibasioquiqueri iroquiquë aique ijobaboroqueri iboroquë, icapojaboroqueri. Inchotangaborotëri ⁶⁸icanqueri:

—Jaa, Quirisito, pingomantina: ¿Pairi capojëmi?

Icanque Peroro: “Teni nogótiri Jesus”.

(Mr. 14.66-72; Ir. 22.54-62;

Jn. 18.15-18, 25-27)

⁶⁹Ainta isobiaque Peroro saaguiteroquë. Oniaqueri tsinane ironomire itingomi saseriroti, ocanqueri: —Aisati obiro aguiatiri Jesus, Ira Garireasati.

⁷⁰Iquemaiguëri antagaisati cara icanquero Peroro:

—Teni nogóte pairoraca picanquina.

⁷¹Iátabeca cara icabitapa, oniaqueri basini tsinane ironomire itingomi, ocantocoqueri:

—Ica aisati yoguiatëri Jesus, Ira Nasaresati.

⁷²Aisati icanai Peroro:

—Teni nogótiri ira posamitëna. Igóque Tosorintsi cara nacanque catingasati. Aroca nontsoiguëma ingasitígatinata.

⁷³Aique ocosamanitanë arosata, ainta basini icantaiguëri:

—Aisonori poguiatiri Ira Jesus. Naquemaiguëmi cara pinibati; obiro Garireasati.

⁷⁴Yotabitanëri Peroro:

—Tesonori nogótiri sërari ira picantocoquina. Igóque Tosorintsi aisonori nacanquemi. Queroqa ninibatimi catingasati, nocogui ingasitígatina Tosorintsi.

Irooti cara icaimanë tiapa sërari.

⁷⁵Aro iquengairo Peroro ora icanqueri Jesus: “Queroquerei icaimi tiapa sërari, mabataque pinganque: ‘Teni nogótiri Jesus’”. Aro isotocanai Peroro iáque iragasantaca.

Yáganëngani Jesus Piratoquë.

(Mr. 15.1; Ir. 23.1-2; Jn. 18.28-32)

27 ¹Oquëtaguetamananaque, iquengaigaca iróguiri Jesus antagaisati itingomipague saseriroti aisati antiasipari jorío. ²Yoguëshotai-guëri yáganëri cara itimi basiniati itingomi cobeingari, ira jitacha Pirato.

Icamaque Joras.

(Irag. 1.18-19)

³Cara igóque Joras, ira ágagantëri Jesus, cara iquengaigaca iróguiri Jesus, iquengasëretabitaca. Yogui-pigaineri itingomipague saseriroti aisati antiasipari ira 30 iguitso quirequisonori. ⁴Icantaigapëri:

—Jerica piguireguite. Teni onganinate ora nacanque, tenta ingantëmate Jesus ora quimingaro. Notsoigëgotasitacari naro.

Yotabitobëri saseriroti:

—Jemita ora picanque, iroonti pasi.

⁵Aique imionganaineri quirequi cara ibangoquë Tosorintsi, ipiganaja Joras. Aique iáque, yáguë sibitsa isiticanaca iriati. ⁶Ira itingomipague saseriroti yágairi iguireguite, icantaiguë:

—Te inganinate angábintseri ica quirequica omeri Tosorintsi. Iriantinta ipënenqueri eiro arota irócantitiri.

⁷Aro yosamitobaca:

—¿Pairo anganqueri?

Iquengaigaca:

—Intsome omanantaiguero quibatsi atiantimari ira camatsine ira te aneiri paniacha parigotiquë.

Aro yamanantë quibatsi ara yágapinintaigui, inti cobiti.

⁸Iroo irooti yamai ojitaguëca oca quibatsica: asi iraraa. ⁹⁻¹⁰Aro imoncaraquero isanguenare Jeremías:

Yágaigari ira 30 iguitso quirequiso-nori. Irianti quirequi ipënataca cara yágagantëri Quirisito. Irianti arosata cara yametaiga jorío jirai. Yamanantaiguë quibatsi caninaro asi cobiti. Ira Atingomi agáqueri iromanantëro.

Aro isanguenaquero Jeremías jirai.

Icomantëgotëri Jesus Pirato.

(Mr. 15.2-15; Jr. 23.3-25; Jn. 18.33-19.16)

¹¹Aro yaratingopë Jesus catingasati-quë basinati itingomi cobeingari jitacha Pirato. Yosamitobëri iriro:

—¿Obiroco itingomi joríojegui?

Icanqueri Jesus:

—Jee, Naro.

¹²Aique cara icomantëgotëri itingomipague saseriroti aisati antiasipari, imairetanë Jesus, te irotopitiri. ¹³Icanqueri Pirato:

—¿Teco pinguemiro oca icantocotai-guëmica? ¿Pairo te potapibiritiri?

¹⁴Carari te irotopitëmatiri.

Iquenganeintacari Pirato, te irogóte paio inganque. ¹⁵Aro antagaisati osarini omoncaraca jiesita cara iquengaigaca joríojegui jiraisonorí cara yabisobenqueri ironomire Tosorintsi cara Ejípitiquë. Cara jiesitaquë yameta Pirato iromisotocajiri paniro ira iromingane, ira icoigaiguë jorío. ¹⁶Ainta tojai iromingane. Paniro jitacha Barabás. Irianti ógueri. ¹⁷Cara yapatotaigaca jorío, yosamitaigabaqueri Pirato:

—¿Pairo picogaigui nomisotocajimi?

¿Picogaiguico nomisotocajimiri ira Barabás, iraco Jesus nomisotocajimi, aisati ijitaigui Quirisito?

¹⁸Igótocoqueri Pirato cara iguisagantasiacari Jesus joríojegui tenta iraninte inguemisanteri imatsiguenga. Ijitiba Pirato inganqueme jorío:

“Nocogaigui pomisotocajinari Jesus”.

¹⁹Isobigasegui Pirato iragáantomento-quë cara yameta iqemaguetiri matsiguenga, ocomantabitapari iina:

—Quero pógagantiri Jesus. Icaninati Iriro. Naraningui naquisaniqueri, tojai naqueincoqueri.

²⁰Carari itingomipague saseriroti aisati antiasipari jorío iquiancagajiri joríojegui iromanocoqueri Pirato iromisotocajiri ira Barabás aisati irócagantiri Ira Jesus. ²¹Aisati yosamitairi Pirato:

—¿Pairo picogaigui nomisotocajimi?

Yotabitaiguëri:

—Pomisotocajinari ira Barabás.

²²Aique yosamitaiguëri Pirato:

—¿Pairo nanganqueri Ira Jesus, aisati ijita Quirisito?

Icantaiguëri joríojegui:

—iPopëicotiri!

²³Yotabitaiguëri Pirato:

—¿Paioroco icantagueque te ongomeite ora nopëicobiriqueri?

Icaimaiganaque jorío:

iPopëicotiri!

²⁴Aro igótanë Pirato itsipiriasica yosamitabitacari tojainta iguisaneinqueri Ira Jesus joríojegui. Aro igáqueri ironomire:

—Pomapëna nija.

Yamapëneri, iquibococa irogótacagui jorío te iraninte irócagantiri Jesus. Icanque:

—Teni naninte nara nógantiri.

Pinintaiguica obirojegui, iroonti pasi.

Teni nara agáantirine.

²⁵Yotabitaiguëri matsiguenga:

—Nocogasantaiguë ingamaque.

Caninataque inguisenata naroequi
Tosorintsi aisati caninataque inguiseri
notomijegui.

²⁶Aique yomisotocajiri Barabás. Aisati
igáqueri soraro iripasataiguëri Jesus,
aisa iribëquëgotëri.

Isërontaigacari Jesus soraropague.

(Mr. 15.16-20; Jn. 19.1-3)

²⁷Aique yágaiganaqueri cara
ibangoquë cobeingari, icaimaiguëri tojai
basini soraro. ²⁸Aique yágabitsaqueri
imanchaqui, ipëri basini inaga,
quiraaquisaamagori. ²⁹Imatseiqueri
iroonti totsei. Aisati ipëri chocopi,
icanqueri:

—Pomogotiro oca ocarapi chocopi.

Aique ishongaigapari soraro
yobaticagueritotomemegapari,
isërontaigacari, icantaiguëri:

—¡Obiro Natingomi! ¿Aisonorico
Obiro itingomi joríojegui?

³⁰Aisati ijobataiguëri, yágabitsaqueri
chocopi ipasataiguëri iguitoquë.

³¹Aroqueque icabíntsaiguëri, aisati
yágabitsaqueri quiraaquisaamagori
manchaguinsi, icaagobëri iraisati
imanchaqui, yágaiganaqueri cara
iribëquëgotaiguëri.

Ipëicotaiguëri Jesus cara corosiquë.

(Mr. 15.20-32; Ir. 23.26-43; Jn. 19.17-27)

³²Aro yágaiganaqueri Jesus.

Itonguibocari sërari Sirenesati, ijita
Simón. Aro imeratobacari soraro,
igáqueri:

—Páganëneri igorosite.

Aro yáganëneri.

³³Yaretaigaca Górogotaquë ora ocanti
osigaro iguito igamaga. ³⁴Aro
ipëtabecari Jesus oja obaa ogonoataga
isincana; iniantacaro Jesus, te iraninte
iróguimaro. ³⁵Cara aroque ipëicotai-

guëri soraro corosiquë, aique
imaguimpibintëqueri imanchaquipague
Jesus ipabacaguecaro yotsatiancaro. Aro
omoncaraca Sanguenari ora cantatsi:

Imaguimpibintaiguëro nomanchaqui
ora irogóontëma pairiraca
áganërone.

³⁶Aique isobiaque osobiquë corosi
inetsaiguëri. ³⁷Aisati yoguëro jonoica
corosiquë, isanguenare Pirato.
Isanguenaquero pairoraca ipëicobiri-
queri. Ocanti: “Iriro Ica Jesus Itingomi
joríojegui”. ³⁸Aisati ipëicotaiguëri pite
cosirinti itsibatacari Jesus. Ainta paniro
ibacosonoriquë Jesus, basini
imatepacoquë. ³⁹Ainta yabisanaqueri
abatsiquë, iniopëri Jesus, icabíntsaíga-
përi, ipoteguitotaigapa, ⁴⁰icantaiguëri:

—Pogomeriguetiro ibango Tosorintsi,
aisati ongaraque maba cataguiteri,
pobetsicairo. Atsi yamai pigabisaicota-
jima Obiati. Obiroca Itomi Tosorintsi
piguëtanae corosiquë.

⁴¹Aisati isërontaigacari itingomipague
saserirotijegui, aisati iraequi
ogomeantiro isanguenare Moisés, aisati
bariseoegui aisati antiasipari,
icantobaganaca:

⁴²—Yogabisaicotaiguëri imatsiguenga
carari te iragabisaicotima Iriati. Iriroca
Itingomi joríojegui, iraguëtanae
corosiquë. Nanetsaiguëri, aro
nanguemisantaiguëri. ⁴³Itingomintabe-
cari Tosorintsi Iriro. Icanque: “Naro
Itomi Tosorintsi”. Nanetsaiguëri aroca
iragabisaicoqueri Itomi yamai.

⁴⁴Aisa icanqueri ira cosirinti
ipëicotacaca icantocotaguëticari,
isërontaigacari aisati.

Icamaque Jesus.

(Mr. 15.33-37; Ir. 23.44-46; Jn. 19.28-30)

⁴⁵Cara catanga paba otsitinitanë
antagaisati quibatsi irooti cara
ochapinitanë. ⁴⁶Aro icaibatanë Jesus:

—Eri, Eri, ¿Irama sabacatani?

Ocanti: “Pabati, Notosorintsite, ¿Pairo pijocobitanëna?” ⁴⁷Ainta matsiguenga cara iquemaiguëri icantaiguë:

—Pinguemiri. Icaimëriനി Erías comantantatsiri.

⁴⁸Aro isiganaca poro, yáguë ichomicantaro, yoaquero obaaquë cochori. Yoguëneri chocopiquë itimagonaguitanaca ipëri Jesos iróguimaro. ⁴⁹Ainta basini icanque:

—Irinita. Quero popiri. Atsi anetserita aroca iribocasitapëri Erías iragabisaico-përi.

⁵⁰Aro icaimasantanai Jesos, irooti icamantaca.

Inibatëgotëri ira niaiguëri Jesos cara icamaque.

(Mr. 15.38-41; Ir. 23.47-49)

⁵¹Cara icamaque Jesos, aito cara otisaraanaca aganguisati ora yotigantaro ibango Tosorinti. Iroonti oquibepiriga tera yoguëro arota quero iqui pairiraca. Oparintanaca jonoquë, otisaraanaca irooti osobi. Aitosati posebatanaca quibatsi, moque moque moque, piquëtareaguetanë oquibe mopë. ⁵²Yasirecotanaca camatsiri, icaniatanai tojai quemisantatsiri.

⁵³Aique cara icaniatanai Jesos icabiritanaca iáiguë camabetachari cara Jerosarénquë. Iniaigapairi matsiguenga tojai. ⁵⁴Aro ira capitán aisati isorarote inetsaigaseguiri Jesos, cara iquemaigabaquero posebatanaca quibatsi, iniaiguëro cara otsititanë, iniaiguëri igamaga cara icabiritanaca, iquenganeintasantaca icantaiguë:

—Aisonori, Iriro Itomi Tosorinti.

⁵⁵Ainta jaqueronta tsinanepague onetsaiguëri Jesos aisati. Opaniaca Garireaquë. Coshoni poguiataiguëri Jesos opapinintaiguëri tojai omitocotai-guëri. ⁵⁶Ainta María Magararasato

aitosati basini María iniro José aisati Santiago, aisati iniro piteni itomi Sebereo, aisati basini tsinane. Oniaiguëri Jesos cara icamaque.

Yomianquengani Jesos omoroquë.

(Mr. 15.42-47; Ir. 23.50-56; Jn. 19.38-42)

⁵⁷Cara ochapinitanë ipocasiqueri Pirato poro Arimateasati jitacha José. Iriro irogomere Jesos aisati, iquemisanqueri. ⁵⁸Yamanopëri Pirato: —Camaque Jesos. Nocoguini pinintacaguina náganëri nomianqueri omoroquë.

Aro igáqueri isorarote:

—Pinintacaguiri ica iráganëri igamaga Jesos.

⁵⁹Aique iáque, yáganëri igamaga iponatancari tocoya irorai. ⁶⁰Yoguëri omoroquë cara iroraique yomoroque José. Ititiguëro mopë omoroquë, yasitocoontacari. Aro iátaji. ⁶¹Ainta pisobiaque María Magararasato aisati basini María, oniaiguëri cara yomianqueri.

Iáque soraro yomisantaigabitacaró omoro cara ini Jesos.

⁶²Pabisanaque cataguiteri ora jitacha Pásicoa cara ipëicoiguëri Jesos. Oquëtaguetamanë iátasitaiguëri Pirato ira itingomipague saseriroti aisati bariseopague. ⁶³Icantaigapëri:

—Nogobeingarite, naquengaigairo cara icanque cani ira matobiantatsiri:

“Nangamaque, aique ongaraque maba cataguiteri, nanganiatanæ”. ⁶⁴Yamai nocogaiguë pigátinari soraropague iromisantiro omoro cara yoguëri igamaga. Iranetsasantiro maba cataguiteri arota quero iátasitiri irogomere yágairi igamaga inganque: “Icabiritanaa icaniatanai”. Jirai tojai yamatobianti; yamai aroca iráganëri irogomere, iromatobitasantaiguëri matsiguenga.

⁶⁵Aro Pirato igáqueri isorarote:

—Atsi pijáigue, pomisantanoiguero omoro.

⁶⁶Aro iáiguè yasitocotasantèri, itsinetëgotèri yomisantasantëro omoro soraro.

Cara icabiritanaa Jesus icaniatanai.

(Mr. 16.1-8; Ir. 24.1-12; Jn. 20.1-18)

28 ¹Pabisanaque cataguitèri comagoriantague. Oquètaguetanai, iroonti tominco, tsitiniquerai piáque María Magararasato aisati basini María otsipa piátasiquero omoro cara yoguèri Jesus. ²Iroguito posebatanaca quibatsi aisati. Ainta ironomire Tosorintsi irisaanganetsite yamasobingopè canta Jonogaguitequènta irooti quibatsiquè, ititigapèro mopè ora yasitocoontabitacari, isobigopèro. ³Tojai yobariaguiteti aisa ocanta moretatsiri. Oquètatanotanè catarisonoriguinte iguitsagare. ⁴Iniaigabaqueri soraropague, itsorogasantai gabaqueri. Imogomogoatanaca icanaca ingamanèni. ⁵Icampèro tsinane ironomire:

—Quero pitsorogaigui. Nigóque pipocasitabecari Jesus, Ira ipèicotaiguè corosiquè. ⁶Teni irinaje yaca. Aroque icaniatanai cara icanque. Jooque, pinetse cara yogabitacari. ⁷Pijáigue omanapague pingomantaigapèri irogomere, “Icamabeca Atingomi, yamai aroque icaniatanai. Irobataiguèmi canta Garireaquè. Aro piniaigairi canta”. Aroque nocomantaiguèmi.

⁸Oquenganeintasantaca tsinane aisati ocaninatasantaiguè. Piáiguè pisigaitaganacari irogomere arota ongomantaigapèri. ⁹Cara abatsiquè, iriguito yoniagaparo Jesus, ibetsataigaparo. Piátasiqueri pobaticagueritotasipari opogopèri iguitiquè. ¹⁰Icampèro Jesus:

—Quero pitsorogaigui. Pijáigue pingomantaigueri nogomere iriáigue

canta Garireaquè. Aro iraniaigaina canta.

Ijitasitaigaca joríojegui yáganairi Jesus irogomere.

¹¹Cara piátaigai tsinane, aisati iátagarantai soraro omisantëro omoro. Iáque poeboroquè icomantaigapèri itingomipague saseriroti ora iniaiguè.

¹²Yapatotaiguèri aisati antiasipari, yosamitobaca:

—¿Pairo anganque yamai cara quero icomantëgotiri?

Aro icaimaiguèri soraro, icantaiguèri: —Jerica quirequi nomaiguèmi.

¹³Pingantasitimari matsiguenga: “Cara nisamaigasegui aganguite ipocaiguè irogomere Jesus yáganairi igamaga”.

¹⁴Aroca inguemocotaiguèmi ogobeingarite, pingantiri: “Nisamè”. Nongomantèri naro: “Quero piguisiri soraropague. Teni irisome. Naro cantèri: ‘Pintsoiguema’”.

¹⁵Aro yágaiguèri quirequi soraro, icomantasitari matsiguenga carari itsoigani: “Nisamaiguè. Aique ipocaiguè irogomere Jesus yáganairi”. Aro icantobagaiga jorío negaca irooti yamai.

Iniaigairi Jesus irogomere canta Garireaquè.

(Mr. 16.14-18; Ir. 24.36-49; Jn. 20.19-23)

¹⁶Aro iáiguè irogomere Jesus cara Garireaquè. Icarati 11, panibani Joras. Iáiguè cara oquitojaquè ora icomantèri Jesus jirai. ¹⁷Cara iniaigapairi yobaticagueritotasipari, carari ainta porocague ira tsoenguèri. ¹⁸Aro ipocasitaigapèri Jesus, icampèri:

—Jirai icanquina Pabati: “Pobatacagasanotiri omagaro Jonogaguitesati pintingomibintasanoiguèri, aisati pobatacagasanoguèri antagaisati quibatsisati”. ¹⁹Yamai

pijátagueque omagaro poeboropague-
 quë, pinguemisantacagaigueri
 matsiguengajegui, potsatiancagai-
 gueri imegaiguema nogomerejegui.
 Aroca inguemisanquina Naro,
 pomaotisataigueri. Ora icocaqueri
 Pabati imaotisabiritimari Iriro aisati

Naro aisati Isëre Tosorintsi.
²⁰Pogometaigneri ingantaigue
 antagaisati ora nocomantaiguëmi
 Naro. Atraca pijáte nantsibataiguëmi
 Naro, coshoni nogaiguëmi përosati
 irooti cara nopocaje nobatacagan-
 tapë.